

**NATIONAL ASSEMBLY**  
**SEYCHELLES**

Tuesday 22<sup>nd</sup> November, 2022

*The Assembly met at*

*National Anthem*

*Moment of reflection*

*Mr Speaker in the Chair*

**PUBLIC SERVICE BUREAU**  
**(PSB)**

**MR SPEAKER**

Bonzour tou Manm Onorab, nou bann zofisyé dan lasal e nou piblik al lekout. Byenveni pou nou travay ozordi. Nou a pas direkteman lo biznes *Appropriation Bill. Sergeant at Arms* nou a pas lo Staz Komite. Madanm Raporter ava apel delegasyon.

Bon bonzour e byenveni Vis Prezidan Ahmed Afif ki ek nou pou travay la bomaten. E pou konsiderasyon sa parti Bidze nou annan Mrs Shella Mohideen *Chief Secretary Public Service Bureau*. Mrs Marie Antoine Gilbert *Director Human Resources* dan sa biro. E Mrs Annette Sopha son *financial controller*.

Lo kote Minister Finans nou welcome Ms Astrid Tamatave *Comptroller General*. E Ms Agnes Madeleine son *financial analyst*. Bon nou premye antite i *Public Service Bureau* ki lo Paz 13-19 pou en total R34milyon R966mil. E apre sa nou pou al direkteman dan ‘*other wages and salaries*’ dan sa peryod la ki devan nou, pou en total R394milyon R890mil.

Petet nou ti a fer *Public Service Bureau* avan e pran son vot. E apre mon a fer ‘*other wages and salaries*.’ Vis-Prezidan ou pare ou lントrodiksyon?

**THE VICE-PRESIDENT**  
**AHMED AFIF**

Bonzour Mr Speaker. Bonzour *Leader of Government Business, Leader Lopozisyon*, tou bann Manm Lasanble e tou dimoun a lekout.

Mr Speaker Bidze ki devan nou i *Public Service Bureau* li menm. E i annan en Bidze R35milyon. E sa i konpar avek R16.6milyon ki ti bidzete, revize pou lannen 2022. Rezon prensipal pou sa logmantasyon se lefe ki zot a vwar dan detay, anba *wages* nou pa’n ogmant bokou. Me anba ‘*goods and services*’ i annan en logmantasyon ki sirtou anba en

*item ki apel ‘other uses of goods and services’ avek’ minor capital’.*

Sa de i annan en total R14milyon logmantasyon. E sa logmantasyon i prensipalman annan pou fer avek en proze, pou *digitalize, scan* tou bann dokiman ki *Public Service Bureau* i annan, dan sa lespri pou nou annan tou nou bann *files* dan en laform nimerik. E sa i pou kout R2.5milyon.

Answit i osi annan dan menm lespri pou *digitalize* en proze kot zot pou etabli en *HR information system*. Savedir en sistenm ki annan tou bann detay tou travayer dan Gouvernman. I annan zot rikord, kan zot ti ganny promosyon, ki Departman zot ete, ki bor zot in bouze pandan zot karyer. Ki tou rikord i la.

Me selman parey zot konnen ozordi tou keksoz i dan *file*. E nou ou pe bouz ver en lot letap bokou pli modern. E se pou sa rezon ki sa Bidze i fer provizyon pou moderniz sa sistenm. I osi annan en *capital expenditure* R2.5milyon ki nouvo pou 2023. E sa i annan pou fer avek bann travay kot AG’s Office ki ti dan *National House*. Me pou annan renovasyon pou remet sa *building* a zour. E ki kapab

ganny servis pou Administrasyon.

Alor vwala Mr Speaker sa logmantasyon prensipal ki zot vwar dan Bidze, i annan pou fer avek kapital avek *minor capital* i annan pou fer avek lekipman e *digitalization*.

Nou la byensir pou nou reponn tou lezot kestyon ki zot annan. Mersi bokou Mr Chair.

### **MR SPEAKER**

Mersi Vis-Prezidan. Nou a konmans ek kestyon bann Manm. Onorab Cosgrow.

### **HON WALLACE COSGROW**

Mersi Mr Chair. Bonzour Mr Chair. Bonzour VP. Bonzour tou dimoun lo panel. Bonzour tou Manm e tou dimoun ki pe ekout nou. Mr Speaker mon kestyon bomaten pou *PSB* i konsernan en sirkiler ki zot ti *issue* le 11 Novanm, an se ki konsern peyman 13enm mwan saler. Nou ava note ki in annan bokou deba lo 13enm mwan saler. E i annan en kantite lentere deor la parmi bann travayer sekter piblik e osi travayer sekter prive. Akoz bokou fwa i annan bann lakonpannyen sekter prive ki pran gidans lo sa ki – menm si zot pa fer neseserman parey me zot pran gidans lo sa *benchmark* ki Gouvernman i

*set-up.* Now dan sa sirkiler bokou keksoz in ganny dir.

Me i annan en pwen spesifik ki mon le antre lo la. E sa i konsernan *performance appraisal*. Now nou konnen ki poudir Lalwa i donn 50poursan travayer otomatikman son 13enm mwan saler. Malgre nou anvi ki tou dimoun i ganny tou antye. Me selman Lalwa pou le moman i fer provizyon 50poursan.

*The other 50 percent* i ganny *appraised* par ou anplwayer. E dan sa ka sekter piblik in set en *rule*, ki dan mon pwennvi Mr Speaker i pa byen e i *unfair*. Now ou bezwen ganny ou 60poursan dan ou *appraisal* pou ou kalifye sa lot 50poursan.

Si ou ganny 61poursan *then* ou ganny 61poursan of sa 50poursan. Me par kont si ou tonm zis en pti pe par anba 60poursan, ou pa kalifye pou sa larestan 50poursan.

Mwan pou mwan Mr Speaker mon vwar sa i *unfair*, akoz i annan en kantite dimoun petet zot in travay zot. Zot in travay me selman petet kondisyon, sityasyon pa'n permet zot pou arriv lo sa 60poursan or zot tonm en pti pe pli ba.

Now mwan mon krwar *it is only fair* e mon ti a kontan PSB

i donn nou zot pwennvi lo la. *It is only fair* ki sa bann dimoun i ganny peye zot *whatever percentage* ki zot gannyen pou sa 50poursan ki *appraise*. E mon ti a kontan PSB i donn nou zot pwennvi lo la.

E dezyem Mr Speaker ki pou arive avek larestan larzan ki deza ganny bidzete? Dabor in ganny bidzete dan Bidze pou bann dimoun ki pa ganny *100 percent* zot 13enm mwan saler? Eski sa larzan pou preznan retourn dan kof Gouvernman? En larzan ki ti'n ganny bidzete pou travayer sekter piblik e pep Seselwa? Mersi bokou Mr Speaker.

### **MR SPEAKER**

Mersi. Vis-Prezidan.

### **THE VICE-PRESIDENT**

#### **AHMED AFIF**

Mersi bokou Mr Chair. Mr Chair mon pou atann ou gidans en pti pe lo la fason nou pou reponn bann kestyion. Parske mon not ki - sa konsern ki annan lo 13enm mwan i en konsern valid.

Me selman i pa direkteman pou fer avek Bidze PSB. Alor mon atann ou gidans Mr Chair pou gete si Polisi - en kestyion Polisi konm tel i devret pran latansyon ozordi.

Mon pa *mind* ki nou reponn an bref. Me selman mon pa krwar nou pou al lo tou bann *policy issues* ki annan pou fer avek 13enm mwan. *Incentives*, lafason i ganny donnen. Parske i pa direkteman pou fer avek Polisi. Me mon ava atann ou gidans Mr Speaker.

### **MR SPEAKER**

Wi Vis-Prezidan mon fer byen atansyon ou pwen. Mon krwar ou annan en serten valideite ladan. Me kestyon in ganny poze e mon asire sa size pou monte plizyer fwa. So mon ti ava apresye si nou donn en repons bref e kestyon Onorab Cosgrow i direk. I annan zis de pwen ki kapab ganny reponn briyevman.

E nou a kapab *deal* avek sa. Fotespere ki i pa re vini tou sa. Ouswa ou oubyen *Chief Secretary* i kapab pran la parol pou sa. Wi Vis-Prezidan?

### **THE VICE-PRESIDENT** **AHMED AFIF**

Mersi Mr Chair. Mon a permet avek ou permisyon *Chief Secretary* ava kapab reponn sa premye bout morso lo Polisi, kot ki konsern 13enm mwan e kalkilasyon.

An se ki konsern bann fon ki pa ganny servi an relasyon

avek 13mwan, byensir parey dan nenport ki *item* lo Bidze, sa fon i perdi. E okenn larzan ki pou bezwen pou 13enm mwan son lannen answit, i bezwen dan Bidze son lannen answit. Mersi Mr Chair.

### **MR SPEAKER**

E sa mon pas laparol *Chief Secretary*.

### **CHIEF SECRETARY SHELLA MOHIDEEN**

Mersi Mr Speaker. Bonzour tou dimoun. Bonzour bann dimoun a lekout. I annan en rezon akoz nou'n *set the bar at 60 percent*. Mon krwar in ariv en letan kot nou bezwen entrodwir en kiltir *high performance* dan Gouvernman.

E i annan bokou koze lo ki nou bezwen *improve standard of living*. Nou bezwen donn dimoun plis larzan dan zot pos. E *the only way* pou sa arive se si nou annan en *workforce* ki *productive*.

E pou mwan en *workforce* ki *productive* i en *workforce* ki pou konmanse, sa travayer letan i Desanm i ganny peye saler pou sa travay ki i pe fer. E Lasanble in aprouve ki sa *other half which is 50 percent is based on performance*.

*So basically ou pe ganny peye sa additional 50 percent performance on top of your salary. E nou nou'n zize ki en performans ki 60 percent and above should not get sa remaining 50 percent. E parey mon pe dir ki nou oule fer se anmenn en kiltir high performance baze lo high productivity dan Central Government. Mersi Mr Speaker.*

### **MR SPEAKER**

Onorab Cosgrow mon pou demann ou pou pa fer en deba lo la. Zot in state zot pwen plizyer fwa dan Lasanble. Nou konnen zot pozisyon nou a zis soz- Si ou annan en pwen pou klarifye silvouple zis fer li.

### **HON WALLACE COSGROW**

Mr Speaker mersi. En klarifikasyon baze lo sa dernyen pwen ki Mrs Mohideen in dir nou en? Konmsi *is it fair* ki ou *issue* en sirkiler le 11 Novanm pou ou ziz en dimoun lo en lannen travay. You *set the bar* konmsi 3 kar dan lannen e apre ou ekspekte li kapab *meet* sa bann target. Konmsi *is it fair?* *If you want to apply this petet next year* i en lot zafer. Be ou bezwen - ou pa kapab *set the bar* dan milye semen apre ou dir ek en dimoun achieve sa. Ou konpran? So pou mwan it's

*not fair and I do not think it is possible.*

*(Interruption)*

### **MR SPEAKER**

Ok, mersi.

*(Interruption)*

### **MR SPEAKER**

Manm silvouple en pe pasyans. Onorab Cosgrow *order!* Chief Secretary en repons bref lo la silvouple?

### **CHIEF SECRETARY SHELLA MOHIDEEN**

Mr Speaker zis pou mwan petet enformen ki *performance management system* son lenplimantasyon dan Gouvernman, i en travay ki'n konmans fer depi lannen pase. Bann travayer Gouvernman, sirtou bann *HR* ti pe ganny sesyon. E avan ki nou ti *issue circular* ti annan travay ki nou ti pe fer. Akoz pou mwan sa *performance management system* regardless si ti pou annan sa lentrodiksyon 50/50 i ti pou *the modern way* ki nou ti pou appraise nou bann *public officer*.

So travay ti pe ganny fer pou nou servi li konman en *appraisal system*. So i pa en keksoz ki letan nou'n *issue*

*circular ki dimoun in konnen poudir, ki zot performans ti pou ganny appraise using the new system.* Mersi Mr Speaker.

### **MR SPEAKER**

*Thank you.* Onorab Uranie ou kestyon.

### **HON ROCKY URANIE**

Mersi Mr Speaker. Bonzour tou koleg Onorab. *Bonzour VP avek ou delegasyon e osi tou dimoun a lekout.* Ki zot pozisyon lo *long service allowance* pou bann *teachers*, an vi ki ti annan bann *teachers* ki zot *long service allowance* ti'n *due* pandan sa detrwa lannen passe? E zot annan lensertitud ki zot pou ganny defavorize dan zot saler e benefis ki zot ti sipoze gannyen. Mersi.

### **MR SPEAKER**

Mersi. Vis-Prezidan si sa i tonm dan manda *Public Service Bureau*, wi?

### **THE VICE-PRESIDENT AHMED AFIF**

Mersi bokou Mr Chair. Ankor en fwa mon *seek* ou gidans Mr Chair si bann kestyon ki pa relye direkteman avek Bidze e administrasyon pou ki sa 35milyon in ganny mete. I annan pou fer avek Polisi ki konsern *teachers* dan en lot

Minister. So mon pa konnen si ou le permet. I vin parey *Question Time*. Be selman mon reste anba ou gidans.

### **MR SPEAKER**

Mon a dir ou klerman mon pozisyon Vis-Prezidan. Si ou santi i tonm anba manda *Public Service Bureau*, nou a donn li en larepons. Si ou santi i konsern en lot Minister zis dir i pa responsabilite *Public Service Bureau*. Mersi.

### **THE VICE-PRESIDENT AHMED AFIF**

Mr Chair i pa direkteman konsern *Public Service Bureau*.

### **MR SPEAKER**

Byen nou a kontinyen. Wi ki ou point of Order Onorab Pillay?

### **HON SEBASTIEN PILLAY**

Mersi Mr Speaker. Mr Speaker mon fer referans avek *Order 81(6), ok?* E sa ki pe arive dan Lasanble ozordi i en *attempt* pou blok nou laliberte lekspresyon ...

*(Interruption)*

### **HON SEBASTIEN PILLAY**

... *hold to account* en Gouverneman ki pa oule reponn kestyon. Premyerman Mr Speaker i Polisi sa *service* ki an

kestyon la. Se *Public Service Bureau* ki fer desizyon lo bann kondisyon travayer dan sekter piblik. E enn bann kondisyon travayer dan sekter piblik enkli *teachers* ki mon'n tann Onorab Uranie demande, se en *long service allowance* ki Minister Finans in deside pou li aret donn bann dimoun.

Prezan Mr Speaker mon pe note depi taler ler sa bann kestyon pe monte, i paret ki Lasanble ozordi pa oule sa bann kestyon ganny pran, mon pa konnen pou ki rezon. Me *Public Service Bureau* ki deside lo sa bann keksoz. Si in kapab desid lo en *performance appraisal* le 11 Novanm trwa kar lannen, i li menm ki pe desid lo larestan keksoz.

So mon ti a kontan Mr Speaker ki Lasanble i viv sa ki nou *Standing Order* i dir. E les bann antite reponn zot kestyon. Si i pa oule donn en larepons ofisyelman. I dir nou i pa oule donn ou en larepons. Me les li reponn. I pa ni ou ni Vis-Prezidan ki pou deside. Mersi.

### **MR SPEAKER**

Mersi. Vis-Prezidan in dir sa i konsern en lot Minister. Onorab Uranie i kapab rezerv son kestyon pou en lot moman. Vis-Prezidan ou'n lev lanmen, wi.

### **THE VICE-PRESIDENT AHMED AFIF**

Mon ti oule zis fer en komanter Mr Speaker, ki napa okenn lentansyon lo nou lapar pou nou pa reponn kestyon. Mon pe senpleman rod en gidans. Mon krwar a mon avi bann kestyon ki annan pou fer avek Polisi. Ki mannyer *Scheme* i ganny fer. I kapab ganny fer dan en sesyon spesyal pou sa bann keksoz.

Ozordi nou lo Bidze. E Bidze nou pe koz lo sif ki'n ganny mete pou administre *Public Service Bureau*. Pou pey son travayer pou li, pou *scan dokiman*, pou pey son *rent*, pou pey elektrik, se tou. Si zot anvi koz lo lezot keksoz, nou, nou en Gouvernman ouver, nou pare pou koze.

Me mon pe zis rod gidans avek zot, pou konnen si ozordi i letan pou fer sa. Oubyen nou annan en sesyon spesyal par annan en *statement* lo Polisi bann *Scheme*. Polisi lo 13enm mwan eksetera, kot sa i kapab ganny fer en deba lo la. Me mon reste anba zot gidans Mr Chair. Selman sa kestyon sa enn la la i pa direkteman anba *PSB*. Mersi.

### **MR SPEAKER**

Yes, tre byen. Zis pou repet mon fason prosede lo la. En kestyon lo Polisi ki tous lo manda sa Lorganizasyon, sa antite, i valab me nou biznes ozordi i konsiderasyon Bidze. So kestyon i devret refer lo Bidze. Lo ki mannyer sa Bidze i permet sa antite delivre son manda.

Nou pa antre dan deba lo Polisi. Nou pa antre dan deba lo Polisi, nou zistifye Bidze. E manda ki sa lorganizasyon i annan. Sa i osi kler ki mon kapab fer li avek bann mo limite ki mon annan. I osi kler ki mon kapab fer li. Fotespere ki bann Manm i konpran mwan. *Chief Secretary* ou ti'n lev lanmen. Ou anvi azout en pwen? *At this point* avan nou al lo lot kestyon.

### **CHIEF SECRETARY SHELLA MOHIDEEN**

Mr Speaker petet zis pou dir i pa kestyon pa anvi reponn. Dan ladres Minis Finans, in eksplik tou bann *allowances* ki pou ganny *consolidate*. E *long service allowance* li i pa enn ki'n ganny dir pou ganny *consolidate*.

*So it is not going to be consolidated. Akoz? Akoz long service allowance i pou endividé. I depan kantite letan ou annan dan servis. So bann dimoun ki pe ganny long service*

*allowance will not be disadvantaged by the consolidation. E i annan 4 allowance ki'n ganny mansyonnen dan budget speech to be consolidated.*

E mon krwar zot in remarke ki *long serving allowance was not one of them*. Mersi Mr Speaker.

### **MR SPEAKER**

Mersi. Onorab Uranie mon krwar ou'n ganny reponn. Onorab William.

### **HON ROCKY URANIE**

*(Off-Mic)*

### **MR SPEAKER**

Onorab Uranie ou'n fini ganny de repons. En pti klarifikasyon teknik. Ale Onorab Uranie.

### **HON ROCKY URANIE**

Mersi Mr Speaker. Eski ou pe dir prezan ki sa bann dimoun i pa ti'n gannyen ki ti'n *due* an 2021, 2020 zot pou gannyen prezan? Zot pou vwar sa aparet lo zot benefis, akoz i pou annan en diferans. Mersi.

### **MR SPEAKER**

Chief Secretary. Mon permet ou en repons wi ou non. Dan de mo.

**CHIEF SECRETARY SHELLA MOHIDEEN**

Mr Speaker mon larepons se as *Chief Secretary* mon enplimant bann gran laliny *policy* ki often i ganny aprouve isi dan *National Assembly*. E bann *freeze* i bann gran *policy decision*. E letan desizyon i ganny pran si i annan bann gran *policy decision* ki ganny pran pou nou *reinstate* mon ava akt lo la. Mersi Mr Speaker.

**MR SPEAKER**

Thank you. Onorab William ou kestyon.

**HON WAVEN WILLIAM**

Mersi Mr Chairman. Bonzour Vis-Prezidan avek ou delegasyon. Mr Speaker avek ou lotorizasyon permet mwan fer de pti komanter avan mon demann mon kestyon akoz –

**MR SPEAKER**

Wi pou vi ou bref. Nou annan en kantite Manm ki pe espere pou demann kestyon.

**HON WAVEN WILLIAM**

Mr Speaker premyerman se ki i bon met lo rikord ki letan lamannman ti vin deva Lasanble lo 13enm mwan saler, Lopozisyon pa ti la pou zot fer zot kontribisyon. Sa

premyerman. Dezyenmman Mr Speaker ...

*(Interruption)*

**MR SPEAKER**

Onorab Cosgrow respekte lord Lasanble silvouple!

*(Interruption)*

**MR SPEAKER**

Ekout mwan bann Manm, nou'n pran en move depar ki tou Manm i santi i kapab enteronpe, mon pa pou *allow* sa. Nou a les Manm, Manm in demann mwan pou fer de pwen bref. Parey bokou Manm i fer ler zot adres kestyon. Termin avek ou dezyenm pwen Onorab. Apre si ou annan en kestyon.

**HON WAVEN WILLIAM**

Mr Speaker pou en bon pe letan mon'n dan Lasanble, e mon ti dan lot kote parti. In annan bokou koze lo servis piblik, lo met lord. E la mon ti a kontan felisit *Chief Secretary* pou sa bon travay ki i pe fer.

**(APPLAUSE)**

**HON WAVEN WILLIAM**

Mr Speaker mon krwar poudir dan sa direksyon kot nou pe ale

definitivman nou pou lev standar dan servis piblik. En swe Mr Speaker ki en bon pe letan pep Seselwa pe demande e zot anvi. Mr Speaker mon kestyon i konm swivan;

Mon anvi ki enn se ki mon pou siport zot Bidze akoz mon vwar travay ki zot pe fer. - mon kestyon se si ou kapab eksplik nou en pti pe an detay akoz mon krwar ki ou Departman i en Departman ki vreman enportan pou servis piblik. E ler mon'n get bann keksoz ki ou'n mansyonnen dan bann *challenges*, mon ti a kontan ou eksplik en pti pe ki piblik deor i kapab konpran ki travay ki ou pe fer.

Epi mon dernyen kestyon Mr Speaker e sa Vis-Prezidan avek ou gidans Mr Chairman, ou ava dir si ou pou les pase, i annan bann dimoun ki'n retire pandan lannen. E pou plizyer rezon e zot pe demande si Polisi ki gouvern 13enm mwan saler, eski i annan serten konsiderasyon ki pe ganny pran?

Akoz sa bann dimoun ti dan lanlwa me pou en serten rezon dan milye lannen zot in bezwen arete. So mon aret la. Mon ti a kontan konnen si i annan serten konsiderasyon ki pe ganny pran.

### **MR SPEAKER**

Mersi. Mon aksepte ki nou ankor dan domenn Polisi, me parey mon'n dir avan si i reflekte lo manda *Public Service Bureau* nou a donn sa Manm en repons bref. Vis-Prezidan?

### **THE VICE-PRESIDENT AHMED AFIF**

Mersi Mr Chairman. Mr Chairman lo premye parti kestyon lo ki mannyer manda pe ganny enplimante par *PSB*. Avek ou permision mon les Ms Shella. Lo sa enn dezyenm, i tre bref, zis nou swiv Lalwa lanlwa ki konsern 13enm mwan, e Lalwa i dir i annan kriter pou ou kapab gannyen.

E si par egzanp i dir ki fodre ou fer en *full twelve months in office*. Sa i Lalwa, alor i pa diskresyon ni *PSB*, ni personn pou deside si pou donnen oubyen pa pou donne. I selon Lalwa. Mersi bokou.

### **MR SPEAKER**

*Thank you. Chief Secretary?*

### **CHIEF SECRETARY SHELLA MOHIDEEN**

Mersi Mr Speaker. Mersi Onorab pou ou kestyon. Parey nou'n submit dan nou Bidze i annan bokou *challenge* ki nou pe fer fas avek an se moman, pou nou kapab anmenn sa

servis ki nou ti a swete dan Gouvernman e osi pou *the citizen*.

E nou'n konmans lannen avek en *tool*. Sa *tool* ki nou apel *result-based management*. E sa *tool result-based management* i *the tool* ki nou pe servi pou nou kapab *improve efficiency* dan *public service*. E sa i konmans avek fer bann pli bon plan.

E mon ti ava swete ozordi letan nou isi dan Lasanble se sa kalite kestyon ki mon ti a kontan nou pe ganny demande, pou nou regarde eski sa plan ki nou ekspekte *from* tou nou bann *MDAs* in ganny fer. I anliny avek plan stratezi pei.

Eski larzan pe ganny anmennen dan bann *areas* ki priyorite ki pou anmenn rannman pou nou *citizen*. E sa ki nou nou anvi fer. Ki annan pli bon planifikasyon. E letan i annan pli bon planifikasyon, en lot keksoz ki nou pe met lanfaz lo la, se ki apre sa planifikasyon ki antre dan Bidze. Se nou le *do away* avek en Bidze kot nou ti pou annan *same-same*. Nou abitye demann sa serten kantite larzan.

E sanmenm sa ki nou demande tou le lannen. Nou le Bidze i ganny demande anliny avek plan ki nou pe fer. Avek priyorite pei e apre nou pe osi fer sir ki i annan bon *monitoring*

*and evaluation*. Mon krwar nou tou dan Lasanble, nou pou admet ki annan de ler letan ou fer plan ou enplimante, ou pa pe neseserman ganny sa rezulta ki ou ti a swete.

Alors se sa *monitoring and evaluation* ki pou donn ou lenformasyon. Pou ou konnen si ou pou bezwen *fine tune* ou plan. E apre nou pe met bokou lanfaz osi *to the individuals*. Sa *performance management system* ki nou pe anmennen pou tou *public officers* konnen ki son Minister i anvi fer. E ki rol li i zwe pou ed son Minister. Pou ed son Departman, pou ed son *agency*, pou li kapab arriv lo sa lobzekтив.

So *performance management system* ou set ou bann target anliny avek plan e anliny avek Bidze. E sa se sa demars ki nou le fer. E byensir letan ou pe anmenn nouvo keksoz ou pou bezwen *build capacity*.

So *the bureau in partnership* avek *Guy Morel Institute* i annan en seri training ki nou pe fer. Nou'n konmanse depi konmansman lannen. I *ongoing*. Ozordi la nou annan *training* ki pe ganny fer. E sa *training* i konmanse lannen prosenn. *Additional to training* nou pe osi al dan lorganizasyon.

Pou nou travay avek lorganizasyon i bezwen annan en pe *hand holding* parey nou dir, ki bezwen ganny fer. E nou pe fer sa. E si nou pe fer tou sa demars ansanm nou pou vwar sa sanzman *eventually* ki pou anmennen.

E letan ou pe fer sa sanzman i pa en keksoz ki ou konnen ozordi, de zour a lannen ou pou vwar rezulta. Me selman wi i annan rezistans. Me selman letan ou pe fer en keksoz ki mwan mon krwar i byen, menm si i annan rezistans nou pou bezwen persevere. Akoz sa travay ki nou pe fer nou pe fer li dan lentere nou pei. Dan lentere Sesel. Mersi.

### **MR SPEAKER**

Mersi. Klarifikasyon? Me selman rapel ou ti ankor lo Polisi e nou a pase. Ale *carry on*.

### **HON WAVEN WILLIAM**

Mersi Mr Chairman. Mr Chairman zisteman lo sa ki *Chief Secretary* in dir, mon anvizis en lenformasyon. Akoz baze lo en travay ki Lasanble ti fer avek enn zot zofisyé, mon anvi konnen si tou bann *MDAs* ozordi zot in fini *set up the RBN Committee?* Mersi

### **MR SPEAKER**

Mersi. *Chief Secretary*. Nou a gard repons bref silvouple, *please*.

### **CHIEF SECRETARY SHELLA MOHIDEEN**

I ankor annan en pe *challenge* pou nou set *the RBM Committee* parey nou ti a swete. Tou *MBAs* an se moman i annan en komite. Me selman ki mannyer mwan mon ti a swete, ki mannyer nou, nou ti a swete *the RBM committee* i ganny *set up*, i ankor annan en pe *challenge*. Sa i annan pou fer Onorab avek kapasite. Par egzanp nou ti a kontan tou *RBM Committee* i annan en dimoun ki annan *expertise* dan *monitoring and evaluation*.

*Unfortunately*, nou napa ase mendev dan pei. E sa i bann travay ki nou pe fer ki nou pe *provide training*. So pou nou annan en *functioning* - sa ki mon apel en *real functioning*, *RBM Committee* i pou vini *eventually* apre ki nou pou'n fini fer sa *series of training*. Mersi.

### **MR SPEAKER**

Mersi *Chief Secretary*. Onorab Gill ou kestyon.

### **HON CHURCHILL GILL**

Mersi Mr Chair. Bonzour VP ek delegasyon. Bonzour tou Manm, tou dimoun a lekout. Mon le atir latansyon *Chief Secretary* anba son *current challenges*. Kot in ekrir "*limited accountability and performance in public service impacts service delivery.*"

Mon kestyon se si nou annan en tel sityasyon e an menm tan nou fer *performance-based appraisal*. E sa bann dimoun ki ganny fer *appraisal* en poursantaz i ganny tonm dakor lo la. E si preznan baze lo sa ki ou'n donnent la sityasyon mannyer i ete, si preznan en dimoun i santi in mal *appraised* ki rekour sa dimoun i annan? Sa mon premye kestyon.

Mon dezyenm kestyon i anba menm laliny kot ou'n fer sorti ki i annan bann *budget dependent entities*, ki zot pe fer lenpak lo renimerasyon. E ou'n mete konmkwa i bezwen annan en fason ki travay i ganny fer pou *sustainability* sa bann *wages*. Mon kestyon se ki fason ki ou pe mazin pou adres sa problem?

E mon trwazyenm kestyon

—

### **MR SPEAKER**

Onorab mon ti a kontan ki nou gard lo de la akoz mon annan plizyer Manm.

### **HON CHURCHILL GILL**

Zis enn, akoz dernyen se i annan bann desizyon ki pe ganny pran ozordi konsernan saler e konsernan bann sanzman dan striktir saler. Eski PSB pe mazin revwar PSO? Si wi eski sa en travay i pou ganny fer pandan sa lannen? Oubyen lannen 2023 oubyen 2024? Mersi.

### **MR SPEAKER**

Mon pou demann bann Manm pou gard lo de kestyon silvouple, akoz pou permet nou *deal avek* sa. E i annan plizyer Manm ki pou demann kestyon. Onorab Gill. Ok son kestyon *Chief Secretary* pou reponn.

### **CHIEF SECRETARY SHELLA MOHIDEEN**

Mersi Mr Speaker. Mersi Onorab pou ou kestyon. *Performance management system* i pa set bann target ki enpoze. So i target ki ganny negosye *between the line manager* avek en travayer.

So si mon pe koz kapasite, ou pa pou kapab fer en dimoun fer en keksoz ki an deor son kapasite, akoz i en negosyasyon. E sa i labaz *performance management system*. Actually labaz *performance management system* i pa en sistèm ki

*punitive.* Mon krwar mon'n deza vin *National Assembly* mon'n eksplike.

I en sistem ki empowering kot ou pa zis esper en dimoun *fail a lafen di zour pou ou pini li.* Me i annan sa ki nou *apel the ongoing monitoring.* E i kapab osi dan sa demars ou kapab *fine tune* bann target baze lo bann devlopman ki arive.

E sanmenm sa ki mon pe dir letan ou'n fer en sistem ki ou annan tou sa travay ki fer, nou pe ekspekte ki nou bann travayer i kapab *perform.* E mwan mon krwar travayer i devret kapab *perform* par lao sa 60poursan. E se sa ki pou fer ki nou pou annan en Gouvernman ki prodiktiv.

E se sa ki pou anmenn bon servis pou nou bann *citizen.* Se sa ki nou citizen pe ekspekte en? Zot pe ekspekte bon servis. E pou nou anmenn bon servis nou bezwen fer tou travayer *accountable.*

E ki mannyer nou pe fer sir ki nou met en cap lo *wage bill.* Nou pou desantraliz serten servis dan Gouvernman. Me sa ki apel *establishment* nou pa pou desantralize. I vedir ki tou bann *MDAs* pou kontinyen vin kot *Public Service Bureau* pou zot negosye zot striktir, avek zot bann pos. Nou pe moderniz

detrwa tool. *PSO is one of them* ki nou pe travay lo la nou pe modernize. E sistem ki nou evalye pos *as well* nou pe modernize.

E sa bann tool par egzanp *evaluation* pou determinen ki valer saler. Sa ki nou apel *the salary of the post.* Ki letan bann dimoun i *apply for a position,* zot a vin *in the salary of the post.* E sa nou pou fer li byensir *in line* avek sa *11 percent GDP.* Mersi.

### **MR SPEAKER**

Mersi. Onorab wi. I annan enn ki in tous briyevman lo la se pou rewvar *PSO.* Kan ki ou ekspekte antreprann sa legzersis? E ki son dirasyon? Mersi.

### **MR SPEAKER**

Tre byen *Chief Secretary* ou kapab zis adres sa silvouple?

### **CHIEF SECRETARY SHELLA MOHIDEEN**

Mersi Mr Speaker. Onorab travay lo *PSO* in vreman avanse. *Actually* nou'n fini *review* li an antye. Ki nou pe fer la bann travayer dan *public service* ki servi *on a daily basis*, nou pe fer zot teste bann sanzman ki nou'n fer. E konman nou fini teste bann sanzman la nou pou

anvoy li an deor kot nou bann *stakeholders*.

Me selman osi ki nou'n fer nou'n demann nou bann *stakeholders* ki servi *PSO*, pou zot anvoy bann pwen kot nou kot zot santi ki nou devret touse dan reform. E sa i en travay ki pe ganny fer. E i sipoze fini avan lafen 2022. Mersi.

### **MR SPEAKER**

Mersi. Onorab Mondon ou kestyon i la?

### **HON TERENCE MONDON**

Yes Mr Chairman. Ti en pti kestyon, leklersisman. Premyerman mon vreman apresye sa travay ki pe ganny fer pou *digitalize* lenformasyon dan domenn ladministrasyon piblik.

*ADP* in dir nou sa sonm 2.5milyon pou ganny servi pou entrodwir *HR information system* e osi sa *digitalization*. Mon anvi konnen sa *digitalization* eski zot pou fer li zis pou nouvo ladministrasyon. Bann travay ki'n pas anba sa nouvo ladministrasyon. E swa zot pou *go back* enn pti pe tou bann lenformasyon depi ansyen ladministrasyon. E sa eski i ti pe ganny *outsource* ouswa *DICT* ki pou enplimante. Mersi Mr Chair.

### **MR SPEAKER**

Mersi Onorab. Wi *Chief Secretary*.

### **CHIEF SECRETARY SHELLA MOHIDEEN**

Mersi Mr Speaker. Mersi Onorab pour ou de kestyon. Sa proze *digitalisation* i an 2 parti. I annan en parti kot nou annan bann *files* ki nou bezwen *scan* pour nou ganny sa lenformasyon dan *digital form*. E li sa proze i pou kout 2.5milyon.

I annan 2 rezon akoz nou anvi fer sa. Enn *obviously* letan ou annan lenformasyon dan *digital form* i fer *access of* sa lenformasyon pli vitman e nou pou le ki sa i anmenn en pe *efficiency*. En pe plis *efficiency*. Be osi nou bezwen pe mazin annan sa ki nou apel *backup* en. Si i ariv keksoz avek *file*. E par egzanp zour ou pou retire ki ou bezwen ou lenformasyon personnel ki ou pe vini ou pe vin rode.

Si in ariv en keksoz ek ou *file* napa *backup*, mon krwar sa i nesesar. E avek Covid osi nou'n vvar ki letan ou annan *file* ki ou pa kapab *access* annan de ler afekte ou *continuity of business, ok?* I vedir ki i annan en kantite lavantaz pour nou fer sa travay ki nou pe al fer.

De lot parti i en *HRIS*. En *HRMS* system *actually*. Ki nou le entrodwir dan Gouvernman. Li i pour en very *comprehensive human resources management system* ki pour annan 2, 3 module. Par egzant la nou'n konmans lントロディクション *performance management system*. Pour le moman nou pe fer li *paper base*. I fer li *paper base* i quite *challenging*. So moving forward sa i pou lo sa *system*.

Nou'n vwar osi ki par egzant sa succession i en keksoz ki nou bezwen anforsi dan Gouvernman. I annan en *module succession*. So ki mannyer nou'n fer sa pour konmanse. Nou'n vwar li konman proze. Nou'n kontakte *local as well as international supplier* pour konmanse. Zis pour zot fer en demonstrasyon avek nou. E apre nou'n fer zot donn nou en *quote for budget purposes only*.

E apre la sa i al byensir dan nou *procurement plan*. Nou bezwen esper Lasamble aprouv nou Bidze. Lasamble i ava aprouv nou Bidze, nou swete. Apre la nou kapab met li dan nou *procurement plan*, nou a fer *procurement process* pour nou *procure*.

E pour fer *the scanning* mon pe mazinen *probably* nou

kapab ganny en *local supplier*. Me solman sa *Human Resource Management System* ki nou pe swete gannyen, nou ava regarde. Savedir *local supplier as well as international supplier* i kapab *bid*. Apre nou ava regarde lekel ki kapab donn nou sa enn, ki nou kapab *customise for the Government of Seychelles*. Mersi

### **MR SPEAKER**

Mersi. Onorab Aglae.

### **HON EGBERT AGLAE**

Mersi Mr Speaker. Bonzour VP, *Chief Secretary* avek ou *panel*. Mr Speaker avan mon demann mon kestyon mon ti a kontan en leklersisman avek ou. An vi ki ou'n dir pou dir nou pa devret merit kestyon Polisi. I annan plizyer antite ki'n pase oparavan ki nou'n kestyon Polisi.

Si nou pou set the *rules* la, annou apply li pour bann lezot antite ki pou vini, e ki i ava kler. E ou koman sa gardyen *Committee Stage* ou merit egzekit sa. Akoz mon santi i annan en pwa de mezir la.

### **MR SPEAKER**

Byen mon a reponn ou ankor en fwa e mon reponn tou Manm. Nou pa antre dan en deba Polisi zis pour ou fer en pwen lo Polisi

sa departman, sa antite. Nou kestyonn manda sa Lotorite. E sa i kapab enplik en kestyon lo Polisi. Letan ou pe kestyonn manda dan sa Bidze. Sa Bidze in donn sa antite resours pou deservi son manda. Si i annan en pwen Polisi ki antre ladan i *ok*. E i antre dan tou bann soz kestyon. Me selman nou pe evit zis demann kestyon lo Polisi *for the sake of* Polisi. Mersi.

### **HON EGBERT AGLAE**

Mersi Mr Speaker, mon note. *Chief Secretary* kot i konsern zot manda, *Scheme of Service* i annan serten antite osi ki'n vin devan Lasamble. Mon ti a kontan konn pozisyon *Public Service Bureau* lo la. Eski zot pe do away avek sistem *Scheme of Service* pou adopte en sistem *grid*. Parey i annan serten mansyon ki'n ganny fer. Mon le kler lo la. Sa i enn.

Dezyenmman kot i konsern – akoz i annan serten dimoun ki'n met konsern devan kot i konsern *RBM* e sa sistem *appraisal* ki an plas, pou kapab aprouv 50poursan ouswa 100poursan sa *end of year* 13enm mwan.

Mon ti a kontan petet demann ou eski ou santi ki sa *time frame*, ki plizoumwen sa dernyen kar lannen ki zot pe sey fer sa *appraisal* lo la, i

rezonnab pour zot kapab sorti avek en nivo inefikasite, baze lo sistenm *appraisal*, pou dir poudir pandan sa dernyen kar lannen travay in ganny fer.

Akoz mwan mon santi pou dir i devret reflekte depi lo en baz le premye Zanvye ziskan le 31 Desanm. E la ou a ganny *the full value of* efikasite dan okenn Minister ouswa departman. Mersi.

### **MR SPEAKER**

Mersi. Mon a fer ou remarke ki *Chief Secretary* in fini reponn enn fwa lo ou 2enm kestyon. Lo sa zafer dat. Donk *Chief Secretary* silvouple nou le gard bann respons bref e nou pa oule antre dan en deba lo Polisi. So si ou annan en pwen pou zistifye ou Bidze *please make it*. *Chief Secretary*? Vis Prezidan mon'n pas laparol avek *Chief Secretary* si i *ok* avek ou. Yes, *please*.

### **CHIEF SECRETARY SHELLA MOHIDEEN**

*Ok*, mersi Mr Speaker. Onorab ou konnen sak fwa mon ganny demande sa kestyon sa 50poursan, la i *worry* mwan en pti git akoz travay ki nou pe fer se pour anmenn en kiltir. E ou bezwen komans en letan. Konmsi pour mwan ou bezwen konmanse.

Akoz *performance management system* depi 2013 nou'n konmans koz lo la. E mwan mon en dimoun ki ti ganny anvoye aletrance pour mwan al *study performance management system* pour nou vin enplimante.

So ou konnen tou le tan letan ou pe anmenn en sanzman la, tou le tan ou pou annan rezistans. Rezistans, ou kapab enplimant li lannen prosenn, ou kapab enplimant li *3 years from now*. Toultan ou pou annan rezistans.

E en bon pe rezistans ki pe anmennen, i en bon pe bann dimoun ki petet zot, zot santi zot pa pou gannyen akoz zot pa pe *perform*. Akoz mwan – ou pe ganny dimoun ki pe anmenn komanter kot ou. Mwan mon annan en bon pe dimoun ki pe anmenn komanter kot mwan, ki pe dir mwan Miss Shella lontan nou ti'n devret anmenn en sistenm ki bann ki pa travay pa ganny benefis bann dimoun ki travay.

**(APPLAUSE)**

### **CHIEF SECRETARY SHELLA MOHIDEEN**

E mwan koman en ansennyan mon'n dan ledikasyon, mon *train bann adult*. E bann adilt ki vin kot nou often zot pe dir ek

nou bann ki trenn lipye, bann ki travay apre a lafen dizour zot ganny menm benefis. So mwan pour mwan mon pa krwar sa sistenm pe evalye dimoun depi la letan zot in ganny sa *circular*.

Ou dan lanplwa depi le 4 Zanvye, sepa le 3 Zanvye mon krwar nou ti konmans travay. E ou pe bezwen ganny evalye pour sa travay ki ou'n ganny fer pour en lannen. E si sa pa pe ganny byen enplimante, wi i annan sa ki nou apel en *Grievance Committee* ki'n ganny formen, ki sak *portfolio* i annan zot *Grievance Committee*.

E si i annan okenn travayer - mon konnen i annan bokou dimoun ki pe ekout mwan la bomaten - Si i annan okenn travayer ki santi ki, ki mannyer zot in ganny evalye i *unfair* zot ava al kot zot *Grievance Committee* e *Public Service Bureau* pour antre ladan pou fer sir ki i annan *fairness*.

E Onorab les mwan osi azoute ki letan ou fek enplimant en keksoz la, ou pa ganny li parfe lo premye zour. I pour annan son bann *teething problems*, i pou annan son bann *hiccups*. Me selman si nou pa konmanse zanmen nou pou konmanse. Nou pou toultan pe rod bann rezon akoz nou pa

enplimante. E letan i pase e i pa pe ed Sesel.

Ki nou anvi dan Sesel se en *workforce* ki *productive*. E pour mwan *performance management system* in ganny prouve. Par egzant ki mon pe regard *Botswana* kot mon'n fer en kantite *case study* lo ki mannyer zot in enplimant pour zot, zot in nobou tir zot pei dan *poverty by setting bann very challenging target*, kot tou *citizen* ti vin ansanm avek *target* pour zot anmenn zot pei to that *next level*.

E mwan mon krwar Seselwa i annan potansyel, Seselwa i annan abilite. E si nou set nou bann *target* - parey mon'n dir, mon'n eksplik Onorab letan i ti demann son kestyon, i pa bann *target* ki enpoze sa. I bann *target* ki ganny negosye. I en *negotiated agreement between the employee* avek son *line manager*. E si nou pe enplimant li byen, nou pou vvar Onorab benefis pour nou pei *eventually*. Mersi. E i annan en lot kestyon pour *Scheme* Mr Speaker ...

### **MR SPEAKER**

2enm kestyon mon krwar ou'n fini reponn. Ou le zis konfirmen, *please*.

### **CHIEF SECRETARY SHELLA MOHIDEEN**

Son premye kestyon ti *Scheme of Service*. I annan travay ki nou pe fer avek *Scheme of Service*. Ki travay nou pe fer ek *Scheme of Service*. Par egzant i annan bann novo filozofi ki nou pe anmenn dan Gouvernman. *One of them* par egzant i *job enlargement*. *Job Enlargement* kot nou santi letan nou pe evalye en sertern pos en dimoun i kapab fer plis ki sa ki i pe fer an se moman.

E sa osi i a anliny avek sa *high performing Government* ki nou pe anmennen. E i vedir ki nou pe *review* bann novo *job description*. Nou pe re evalye. I vedir sa pos i ganny eleve. E saler ki sa dimoun i devret gannyen. Sa i travay ki pe fer. I annan kalifikasyon dan *Scheme* ki nou pe vvar nepli relevan nou pe tire. I annan bann standar ki nou pe mete ki swa nou krwar i tro ba, swa i tro o, ki nou pe travay lo la.

Apre nou annan sa *consolidation* ki nou pe fer. E sa *consolidation* apre sa 10 percent i bezwen antre dan *Scheme*. So wi pour annan en *review Scheme* ki nou pe fer anliny avek tou sa travay ki nou pe fer at the moment to modernise the Government. Mersi.

**MR SPEAKER**

Mersi. Onorab mon krwar nou'n pas ase letan lo la. Ale poz ou klarifikasyon.

**HON EGBERT AGLAE**

Mersi *Chief Secretary*. Zis petet an pasan akoz i paret mwan ki *still annan ankor serten konfizyon*. Sirtou bann *line managers* ki pe pas lenformasyon avek zot bann travayer baze lo sa bann form ki zot pe donnen. Petet *in regards to* peryod letan, evalyasyon, petet i zot devwar pour zot repas *proper information* pour dir ki *time frame* ki zot sipoze pe swiv panga i konfiz sa bann travayer menm. Mersi

**MR SPEAKER**

Mersi. *Chief Secretary* mon krwar ou a not sa pwen. Mon pas lo kestyon Onorab Roucou.

**HON MICHEL ROUCOU**

Mersi Mr Chair. Bonzour VP, *Chief Secretary* avek tou bann lezot Manm. VP ou'n tous en pti lo kote sa 2.5milyon ki pour renovasyon kot AG's Office. Kan ki travay pour konmanse ki nou espekte pou dir bann lazans ki ti dan sa *building* i kapab tournen. Apre osi *Chief Secretary* ou'n koz en pti pe lo kote bann *entities* ki zot vwar

pou dir anba zot *challenge*. Ki zot war zot pa tro kapab antre ladan. Mon pe mazinen ou pe koz bann *entities* parey STC, PMC. Ki aprezan i annan en pti pe sa *challenge* pour zot. Si ou kapab koz en pti pe lo la. Mersi.

**MR SPEAKER**

Mersi. *Chief Secretary* pou pran. Wi.

**CHIEF SECRETARY SHELLA MOHIDEEN**

Mr Speaker son dernyen bout kestyon eski i kapab repete? Sa enn ki ou'n demann mwan lo *challenge*. Mon pa'n byen konpran kestyon.

**HON MICHEL ROUCOU**

I annan bann parastatal ki ou dir se ki i en *challenge* pour zot kapab antre ladan, pou enplimant serten bann prosedir ou kapab dir ki zot pe sey anmenn dan Gouvernman li menm li. Ki zot pe fer ladan pour zot kapab *deal* avek sa, pou fer sir pou dir tou dimoun i lo menm *level* ki Gouvernman pe mazin pran.

**MR SPEAKER**

Onorab mon pa siny si ou dezyenm kestyon i lo *Public Service Bureau*. Les mwan a dir mon konsernen avek letan. Nou pe al lo 1erdtan e mon lo mon

zis 6enm kestyon. So mon pe demann bann Manm e delegasyon pour nou *focus* en pti pe. *Chief Secretary?*

**CHIEF SECRETARY SHELLA MOHIDEEN**

Mr Speaker zis petet si mon pe demann li. I pe demann mwan kestyon lo *bullet 3?* Ok mon *bullet 3 question* i *budget dependent entity* e bann parastatal zot, zot *state-owned entity*. So zot pa neseserman tonm anba mon manda.

**MR SPEAKER**

*Thank you.* Lot kestyon *Chief Secretary.*

**CHIEF SECRETARY SHELLA MOHIDEEN**

*Sorry ou premye kestyon was?*

**MR SPEAKER**

*Building.*

**CHIEF SECRETARY SHELLA MOHIDEEN**

*Ok thank you.* Sa travay i pou konmanse lannen prosenn. Ki nou pe fer an se moman, i annan bokou proze ki SIA pour *undertake*. I pou komanse boner lannen prosenn. Lekel ki vin ladan. Akoz mon krwar ou'n demande kan ki AG's *Office* pour retourne ladan. Nou pa ankor fer desizyon osi lekel

*entity* ki pou retourne ladan. Me selman i dan en *state* kot nou bezwen fer reparasyon. Epi letan nou fer reparasyon i ava en desizyon pour nou regarde lekel ki pou retourne dan sa bout *building*. Mersi.

**MR SPEAKER**

Mersi. Onorab Lemiel.

**HON SYLVANNE LEMIEL**

Mersi Mr Chair. Bonzour VP avek ou delegasyon madanm Mohideen, e tou bann dimoun ki a lekout. Mr Chair letan mon lo pwen limero 5 *program performance*. E programm enn ki tonm anba son *governance management and administration*, nou vvar ki anba *sub program 2* i dan zot Manda pour zot osi administre en pti pe bann kontra PSE.

Mon kestyon ki mon annan la i se ki nou konnen poudir i annan 2an de se la. I annan sa 5 *percent annual gratuity* ki mon krwar in aret donnent. E an menm tan i annan sa – letan ou'n evalye sa travayer ki lo kontra in ganny li son 15 pwen *whatever*, i annan en *performance* larzan ki i gannyen par lao son larzan ki sa i vin en pti *increase*. E sa osi mon konpran in aret donnent.

So letan PSB i la devan nou, mon ti a kontan konnen

eski dan zot bann revizyon ki zot pe fer, dan zot bann diskisyon ki zot pe diskite, sa de size i bann diskisyon ki pe re ganny met lo latab, e ki pou ganny rekonsidere. Oubyen zot pe al aboli li net?

En lot pwen i se ki mon vwar anba zot *program 1* menm ‘other goods and services’ mon vwar anba *long service award* R83mil. So lannen pase ti napa sa. So petet ti a bon nou ganny en pti pe lesplikasyon pour kwa sa larzan. Eski zot pe al organiz sa, eski pour zot travayer pour zot. Donn nou en pti pe plis detay lo la.

### **MR SPEAKER**

Mersi. *Chief Secretary.*

### **CHIEF SECRETARY SHELLA MOHIDEEN**

Mersi Mr Speaker. Mersi Onorab. Onorab tou bann benefis ki ti pe ganny donnen dan *PSE* ki’n arete ti akoz *budgetary constraints*. Konnen avek *Covid* ki ti’n *happen* avek *the economic downturn*, i annan bokou benefis ki ti aret peye. E diskisyon ki nou’n konmans fer sa lannen, was eski nou re entrodwir sa benefis, ouswa nou donn en *salary increase across the board*?

E desizyon ki’n ganny pran la, se ki nou donn sa

*increase across the board*. Ki nou krwar i benefisye plis dimoun ki zis sa bann dimoun ki lo *PSE*. An se moman *fiscal space* pa pe *allow* nou pour nou fer tou lede. Si ou pou vwar Bidze nou 11 percent *GDP* i actually 11.3 percent *GDP*. So nou slightly par lao. Napa okenn *fiscal space* an se moman pour nou kapab fer sa travay.

Me solman wi Onorab i en keksoz ki nou kontinyen evalye. Nou ava kontinyen evalye *fiscal space*. E petet mon re tous mon pwen ki mon dir ki pour nou kapab *increase* sa 11 percent *GDP* nou bezwen met plis larzan dan lekonomi. E ki mannyer nou met plis larzan dan lekonomi, se letan *each and every individual* i become *productive*. E se sa ki nou anvi fer. E apre letan nou a fer sa nou ava *increase* sa 11 percent. E i annan bann lezot benefis apre ki nou kapab konsidere. Sa premye kestyon.

*Long serving award* i en award ki ti abitye fer me selman akoz *Covid* pa ti pe ganny fer. E la ki sityasyon in amelyore, nou’n fer provizyon ki nou pour tous bann lannen ki nou pa ti fer e osi sanmenm sa -konmsi nou’n *budget* for bann dimoun ki ti merit gannyen nou pa’n kapab fer akoz *Covid* i pour zot

e tou le zot ki merit gannyen zot dan sa Bidze. Mersi Onorab.

### **MR SPEAKER**

*Thank you Chief Secretary.*  
Onorab Romain.

### **HON GEORGES ROMAIN**

Mersi Mr Chair. *Chief Secretary* mon kestyion in *partially* reponn ler ou'n koz lo sa *process digitalise* ki pou ganny *tender*. Me solman mon annan en lezot *current challenges* ki mon'n war I dir '*insufficient internal capacity for the Bureau to fulfil its mandate.*' E mon pe demann ou en kestyion ki si dan sa Bidze zot in fer provizyon pou fer *recruitment*. Oubyen si kekfwa ou pe *mean* kekfwa lekipman osi ki manke. Mon ti a kontan si ou ti kapab donn lesplikasyon, si dan sa Bidze pou fer *recruitment*. Mersi Mr Chair.

### **MR SPEAKER**

*Thank you. VP, Chief Secretary i ava pran. Yes?*

### **CHIEF SECRETARY SHELLA MOHIDEEN**

*Ok.* Mersi Mr Speaker. Mersi Onorab. Dan sa Bidze nou pou annan zis en *recruitment* ki nou'n demande. Ankor i annan pou fer ek *fiscal space* en? Nou bezwen realistik nou pa kapab

depans larzan ki nou pa kapab depanse. So nou'n demann *one recruitment* e apre i sa de sistenm ki mon'n fini koz lo la.

Me selman *internally* i annan travay ki nou pe fer pour nou osi *build capacity* bann *individual through training*. E sa i larzan ki'n ganny mete dan Bidze atraver *public sector college*. E osi i annan enn de *in-service training* petet mwan osi mon annan kapasite pour mwan fer pour nou kapab *build* nou kapasite pour nou kapab delivre nou manda. Mersi.

### **MR SPEAKER**

Mersi. Onorab Pillay

### **HON SEBASTIEN PILLAY**

Mersi Mr Chairman. Bonzour tou dimoun. E bonzour *Board PSB* ki la. E bonzour tou bann travayer ki a lekout ki pe swiv nou deba ozordi. Mon premye kestyion i an relasyon avek *the policy which the service provides. Policy and the policy of the service* ki *PSB* i provide.

In annan plizer sirkiler ki zot *issue* avek bann diferan landrwa. E zot *issue* sa bann sirkiler lo *basis* parey ou pe dir nou zot le improve performans. Bomaten ou ti ganny demande en kestyion *regarding* bann *long service allowances* ki konsern bann *teachers*. E bann sirkiler

ki ganny *issue* pou fer bann antite konnen poudir zot pa pe kontinyen peye i bezwen ganny fer atraver *Public Service Bureau* mon prezimen.

So kestyon i koumsa. Eski ou konsider lefe ki en teacher in travay 22an, 25an, 30an. En ners ki'n travay 30an e ler i pe ganny sa *long service allowance* ki sa i *something* ki tro bokou ki i devret pe gannyen. Prenon kont ki logmantasyon atraver zot *Scheme of Service* pa ganny fer *as frequent as it can be done?* Premye kestyon.

Mon 2ennm kestyon. Lefe ki Minister Finans in pronons son lekor baze lo sa ki *PSB* in dir osi. Kot in dir i annan tro bokou *Scheme of Service*. Eski ou kapab donn nou ozordi en larepons kler e konkret,

Eski i pe al annan sanzman an se ki konsern bann *Scheme of Service* pour bann kad travayer; - par egzanp kad travayer Imigrasyon, kar travayer Lasante, *bann nurses*. Kad travayer dan Ledikasyon. Kad travayer Lapolis, kad travayer dan Lafors Defans. Eski zot pe *move* pou annan okenn sanzman dan sa bann *Scheme* ki konsern sa bann kad travayer? Prezan Mr Chairman nou vin lo sa pwen...

## MR SPEAKER

Nou le pran 2 kestyon Onorab. 2 kestyon silvouple. Ou'n mete 2 kestyon nou a kontinyen.

## **HON SEBASTIEN PILLAY**

Mr Speaker ou'n menm *allow* Manm pou fer *statement* avan zot kestyon.

## **MR SPEAKER**

Anr ou annan en *statement*?

## **HON SEBASTIEN PILLAY**

Mon pa'n fer okenn *statement* mwan. Mon pe fer kestyon mwan.

## **MR SPEAKER**

*Sorry* nou a pran 2 kestyon. Onorab mersi. *Chief Secretary*.

## **HON SEBASTIEN PILLAY**

Mon pa ankor fini Mr Chairman. Mon pa ankor fini demann mon kestyon Mr Chairman.

## **MR SPEAKER**

Ou pa'n demande 2 kestyon?

## **HON SEBASTIEN PILLAY**

Wi be mon 2ennm kestyon i relye ek sa ki mon pe al dir la.

## **MR SPEAKER**

Bon ou'n war en largiman. Silvouple *expand* lo ou 2ennm kestyon. E nou a termin la.

## **HON SEBASTIEN PILLAY**

Mr Chairman ler mon pe esper mon 2enm kestyon prenon kont sa ki nou'n ganny dir e sa ki mon fek demann *Chief Secretary*.

13enm mwan saler prezan in vin baze lo en *performance contract*. En *performance appraisal*. E nou'n ganny dir par Vis-Prezidan ki ler sa poursantaz i ganny peye, sa ki pa ganny peye i retourn dan Gouvernman. Be kestyon ki mon annan sa ki, sa poursantaz ki reste i pa afekte Bidze 2023. I pa afekte Bidze 2022. Akoz pa donn travayer zot full 13enm mwan? Mersi Mr Speaker.

### **MR SPEAKER**

Mersi. Sa 3enm kestyon i an deor ou 2enm kestyon e in deza ganny touse lo la. *Chief Secretary* silvouple adres kestyon Onorab. Vis-Prezidan eski ou ti'n lev lanmen, *sorry* mon pa'n -. Wi *ok* ou kapab konmanse si oule.

### **THE VICE-PRESIDENT AHMED AFIF**

Mr Chair vi ki ou'n dir nou'n deza adrese mon ti le zis fer en pti pwen lo 13enm mwan. Si ou pou zis pran sa larzan, ou'n fer tou *appraisal* ou'n fer tou keksoz, i annan bann ki'n ganny peye, akoz baze lo

performans. Apre i reste en larzan ou dir be i *ok* pran donn tou larestan dimoun. Akfer ou'n fer tou sa legzersis? I pa fer sans ditou. Mersi.

### **MR SPEAKER**

Mersi. Mon krwar sa i ase. Prezan 3enm kestyon. *Chief Secretary* pou kontinyen.

### **CHIEF SECRETARY SHELLA MOHIDEEN**

Mersi Mr Speaker. Mersi Onorab pour ou kestyon. Mon pa pou kapab asiz la Onorab pour mwan dir ki bann *teachers* avek bann *nurse* pa *deserve* zot *allowance*. Mon a dir ki tou travayer ki travay dir i *deserve* zot saler, zot *deserve* tou zot bann benefis. Pour mwan tou travayer i *deserve* benefis, *ok*?

Par egzant *nurse* i *deserve* zot benefis. Bann *pharmacies* ki travay avek lopital i *deserve* benefis. E si mon kontinyen lalis pour long. So pour mwan tou travayer i *deserve* benefis. E mon krwar i *fiscal space* ki annandler i annan serten sakrifis ki en pei i fer, pour ou regarde ki peyman e ki peyman ou pa fer.

E if money was not an issue e nou ti annan larzan pou peye, mon krwar nou ti pou pey tou bann benefis ki devret peye. So si i annan par egzant pou pe

dir parey Onorab ti demande taler. I annan serten bann 5 percent ki kommela i *on hold*. I *on hold* akoz nou'n pas dan en kriz ekonomik e nou napa *fiscal space* pour nou peye. E letan lekonomi i *becomes better* e nou annan *fiscal space*, sa bann peyman pou ganny fer.

Me selman ki *deserve*. Tou travayer ki travay dir i *deserve*. E i sa osi akoz nou pe dir ki nou pe enplimant ankor, mon pe repete *performance management system* ki bann dimoun ki delivre zot ava ganny *better reward*.

*Scheme of Service* Onorab, pour lemoman nou pou reste avek bann *specific Scheme of Service*. I annan aepre parey mon ti dir. Mon ti vin eksplike aepre en mwan pase, nou annan nou aepre 100 diferan. *More than one hundred specific Scheme of Service*. Dan *short term* sa pou reste.

Ki nou pe fer an se moman, nou pe eksplor eski nou kapab entrodwir en novo model. Akoz mon pe dir sa? Letan i annan mouvman dan Gouvernman *from one Scheme to another Scheme*, annandler i annan bann lenplimantasyon ki vin difisil.

Kot ou vwar i annan dimoun ki kapab perdi serten benefis. Akoz dan en *Scheme* i donn en

serten kalite benefis epi letan i al dan sa lot *Scheme*, i annan lezot kalite benefis.

So mon pa pe dir ki sa bann *Scheme* i annan lerer avek. I zis - E tou keksoz i annan son letan mon krwar ou enplimante, ou evalye. E letan ou evalye si i annan en sistèm pli modern pour ou enplimante, se sa ki ou fer.

So wi Onorab i annan en travay ki nou pou fer pa *short term* me dan *long term*, pour nou regarde si i annan en lot *model* ki nou kapab servi pou ranplas bann *specific Scheme*. Solman pa dan *short term*.

### **MR SPEAKER**

Mersi. Ou klarifikasyon, nou a fer bref Onorab.

### **HON SEBASTIEN PILLAY**

Mersi Mr Chairman. Mon note ki anpasan ou deside kan en larepons i ase pour en kestyon. Mon vreman apresye ou *l'eau vive* pour konnen ki larepons ki bon. Mon le zis *remind* Vis-Prezidan ki ou ki'n dir ki sa larzan i perdi apre. So si en larzan pou al perdi, mon ti pe dir donn dimoun. Me sa i desizyon Gouvernman.

Mon ti a kontan klarifye en keksoz avek *Chief Secretary PSB*. Nou pe ganny plizyer antite ki pe vin devan Lasanble

pe dir nou la nou pe ganny 2 mesaz sorti kot Gouvernman ; - 3 annefe. Nou'n ganny enn sorti kot Minis pour Finans. La nou ganny enn sorti kot ou. E nou ganny enn *from* bann antite ki'n vin la.

Par egzant si mon pran *DRMD*, *DRMD* i dir nou pou dir li in travay lo novo *Scheme*, me apre Finans i konfirmen napa nanryen. Lot i dir in travay lo novo *Scheme* apre Minis i vin dir pou dir zot pa pe entrodwir bann novo *Scheme*. So lekel dan Gouvernman ki pe koz laverite avek travayer la deor ?

Pour enn fwa pour tou vi ki ou ki ansarz *PSB* e se zot ki desid lo sa bann *Scheme*? Dir nou kwa ki pe arive an sa ki konsern travayer.

E mon dernyen pwen Mr Speaker. Mon bezwen dir pou dir mon soke e dezapwente. *Chief Secretary* sa komanter i pa pour ou. Ou pa en politisyen ozordi dan sa Lasanble ou la konman en teknisyen.

Be mon soke pou vwar ki mannyer bann politisyen ki swadizan lager pour lentere travayer ozordi pe met tou bar dan larou. Dan nou larou lo sa kote latab pour nou kapab demann kestyon lo lapar travayer Seselwa. Sa i kler e ou pe rod tou fason. E zot pe menm -.

*(Off-Mic)*

### **HON SEBASTIEN PILLAY**

Napa *misleading the House!* E la mon le reponn Mr Speaker ...

### **MR SPEAKER**

Onorab ekout mwan en kou silvouple. Sa pwen ki ou pe al lo la i pa valid. Mon pa war ki mannyer en lakiz zeneral ki en parti pa pran lentere travayer, i antre dan Bidze *PSAB*. Final *Chief Secretary* si ou annan en repons lo son premye pwen silvouple lo *Scheme of Service* - mon krwar in ganny adrese plizyer fwa - silvouple *Chief Secretary* nou a pran ou dernyen komanter.

### **CHIEF SECRETARY SHELLA MOHIDEEN**

Mr Speaker dan mon *submission* Bidze i annan en *statement* ki mon'n fer ki apel '*lack of capacity*.' *Lack of capacity* i osi annan de ler konprenezon bann term. E sa *Scheme of Service* la i ganny servi par bann *MDAs* letan annandler zot pa ni menm pe *sort of refer to Scheme of Service*.

Par egzant si zot le *salary increase* zot apel sa *Scheme of Service*. *Scheme of Service* li it's *sort of like your career ladder*.

Ou *career progression*. E letan ou *progress* - Akoz ou kapab ganny en *increase* dan ou saler san ki ou'n ganny promote. Ou kapab ganny en *increase* lo ou saler par egzanp akoz ou'n perform byen.

Letan *fiscal space* ti permet kot ou ti kapab ganny en *increment* pour ou ganny en *increase* dan ou saler. So petet Onorab annandler letan zot vin isi pour zot koze kekfwa zot koz lo *Scheme of Service*. Ou konnen i annan bann term ki nou servi in – konmsi nou servi li dan plas kanmarad.

So *Scheme of Service* li i en *career progression*, ki dir pour ou antre dan sa pozisyon la, la *the starting salary* eksatera. E i annan menm lorganizasyon ki travayer i travay pour 2an.

Akoz la i dir koumsa pour ou ariv la i 2an. I dir ou koumsa i devret bouz laba li, i devret ganny promote. Ou pa oblize ganny promote si ou pa ankor *perform*, ou konpran?

I annan en pe *lack of understanding* ki mwan mon kapab dir ou Onorab, *Bureau* i ava fer en pe ledikasyon, pour nou fer sir ki nou konpran kwa sa en *Scheme of Service*. Ki petet dan *next* prezantasyon Bidze letan nou vini nou ava annan en *common language*

*what is Scheme of Service*. Mersi.

### **MR SPEAKER**

Mersi *Chief Secretary*. Onorab Vidot ou kestyon.

### **HON AUDREY VIDOT**

Mersi Mr Chair. Bonzour tou dimoun prezan e tou dimoun ki a lekout. Premyerman Mr Chair ma dir ou mersi pou donn mwan menm privilez parey mon koleg Onorab William. Mon le zis met lo rikord se pa Lasanble ki ti *freeze* benefis bann travayer, se *Public Service Bureau*. E se pa nou *United Seychelles* ki pe *praise Public Service Bureau* pour sa. Me LDS ki pe fer li.

Mon kestyon ki mon annan an referans avek Bidze. Sa R34milyon 966mil ki *Public Service Bureau* pe gannyen pou enplimant son bann manda e son bann programm, mon le demann avek li. Parey bann antite oubyen bann departman, ki deza annan serten *Scheme*, me i annan serten *Scheme* ki zot ankor pe travay lo la.

Mon donn en senp legzanp, parey yer Departman Defans ti devan nou Lasanble. I annan en konsern lo *Scheme* pour bann *brass band*. E zot in dir nou zot ankor pe travay lo la.

Petet dan sa bann prononsman ki ou'n fer, Ms Shella, eski i posib ki zot travay en pti pe pres avek Ladefans pou asire ki nou vwar – menm si zot in dir nou i pa dan Bidze 2023. Me nou ti ava voudre vwar *at least mid 2023* sa *Scheme* in ganny prezante avek Gouvernman, pou ki zot ganny sans pou aprouve.

Akoz sa bann dimoun i annan bann kad parey ki lontan pe demann sa sipor, me zot pa pe gannyen. E nou ti ava voudre vwar en lakonplisman ladan.

E dezyenmman ou'n dir dan ou Bidze mon mazinen, zot annan pour zot *update* en pti pe zot bann komunikasyon pour bann antite piblik kapab konn zot bann *Scheme*. Parey lo zot *network – website*. Eski la aktyelman la tou bann *Scheme* i azour oubyen i ankor annan serten defayans? Eski si wi, si 2023 sa pou'n nobou kapab ganny adrese avek Bidze ki zot annan. Mersi.

### **MR SPEAKER**

*Thank you. Yes Chief Secretary.*  
Premye pwen si i tous lo ou manda?

### **CHIEF SECRETARY SHELLA MOHIDEEN**

Mr Speaker *actually* mon travay tre byen avek tou bann departman *including* Lafors Defans. So mon ava pran kontak pour mwan regarde ki sipor kou kapab donnent. Nou ava vwar ki pe arive e tou sipor i ava gannyen. Ou 2enm kestyion. Repas en pti kou lo -.

### **HON AUDREY VIDOT**

Mon 2enm kestyion i referans avek, parey pou met bann antite piblik azour avek zot bann *Scheme* lo zot *website*.

### **MR SPEAKER**

*Chief Secretary?*

### **CHIEF SECRETARY SHELLA MOHIDEEN**

Onorab parey mon dir i annan apepre *over 100 Scheme of Service*. E menm avan mon vini i annan travay ki pe ganny fer avek *Scheme of Service*. E sa travay i kontinyen. *Travay Scheme of Service* i varye ki nou annan pour fer.

Par egzanp mon ava donn ou en legzanp. I annan lorganizasyon ki nou pe travay avek, i dir ou koumsa i annan en pos ki in *advertise* pour 1an i pa ankor ganny en dimoun. Ou bezwen rode akoz, e ou al dan *Scheme*. Annandler i pa pe gannyen akoz sa kalifikasyon ki i pe demande i en kalifikasyon,

par egzant ki pa tro egziste lokalman.

So i sa bann kalite refleksyon ki nou pe fer, pour nou regarde eski sa bann standar ki zot pe mete dan *Scheme of Service* i azour avek larealite ozordi ? E sa i travay ki *ongoing*.

E i osi annan bann devlopman ki pe arive dan Gouvernman. Akoz letan ou annan nouvo striktir ou pou annan nouvo pozisyon. E letan nouvo striktir ek nouvo pozisyon ou bezwen ale retourn dan *Scheme*. Si par egzant i annan bann pos ki ti *at a certain level*, letan ou'n *upgrade the post*, ou'n fer sa *job evaluation*, ou vwar ou bezwen fer sanzman, ou pou bezwen al dan *Scheme*.

*Often letan nou koz lo Scheme, the focus is very much on the salary component. But a Scheme is a lot more than the salary component. Actually i sa career ladder ki ou vwar, ki ou konmans la dan ou karyer e si ou reste dan sa profesyon ki mannyer ou monte.*

En lot travay osi ki nou pe fer, se ki mannyer nou pa vwar zis bann *vertical promotion*. Nou osi get bann *horizontal promotion*. Sa osi i en travay ki nou pe fer dan *Scheme of Service*. E letan ou annan ou

sans *Scheme* i en travay ki nou pou fer ki pou *ongoing*. E mon pa pou dir i pou arete.

Akoz tanzantan kantmenm ou'n fek *revise en Scheme* si i annan en nouvo devlopman ki arive, ou pou bezwen retournen pour ou fer sir ki - *nothing is cast in stone* parey nou dir. I bezwen annan sa *ongoing work* ki nou fer pou fer sir ki *Schemes of Service* i reste *up to date*.

Be parey mon ti'n reponn kestyon taler nou osi pe regarde, eski i annan en lot sistem ki nou kapab entrodwir pou ranplas sa *hundreds of Scheme of Service* ki nou annan. Nou pa ankor fer desizyon lo la. Nou ankor pe fer travay nou ankor pe fer resers e *at the right time* mon a kapab vin *National Assembly* pour mwan fer en prezantasyon lo la. Mersi.

### **MR SPEAKER**

Mersi. *Chief Secretary*. Onorab Bistoquet.

### **HON ROSIE BISTOQUET**

Mesi Mr Speaker. Bonzour VP ek ou tim. Mwan mon byen satisfe. Annefe bann piblik ki pe koze deor, sirtou bann ki travay dan sekter prive zot byen satisfe avek sa sanzman. E letan mon get anba ou manda, mon

remarke ki i annan en fraz konmsi ki vreman for. Ki mon krwar i lakle pour sa sekter ki'n ganny kree, "To champion the service modernisation and reforms."

Akoz sa parey bann piblik pe dir. Parey lot kote pe konplent pou dir i annan en kantite problem. E an menm tan zot pe konplent ki napa ase larzan. Dimoun pa pe ganny larzan. Fodre fer reform, bann Minister pa bon, servis pa bon dan Gouvernman. La letan nou fer reform avek sa novo sistenm zot trouve osi pa bon menm. Be kan pou bon?

Mr Speaker mon kestyon i koumsa. Mon kestyon i al koumsa; kot i konsern *returning graduate allowance* letan mon get anba *wages and salary*, i annan bann *graduates* ki anmenn sa devan.

Zot pe dir par egzanp bann *returnees* ki'n sorti depi par egzanp 10an pase zot pa ti pe benefisyé anba sa *returning graduate allowance*, e konpare avek bann ki'n vin en pe par egzanp 5an pase, 3an pase.

Eski i annan okenn laranzman ki'n ganny fer? Or if anything petet sa i kapab fer pou sa bann group dimoun? Petet rezourd zot sityasyon.

Apre i annan sa *allowance* ki ankor anba *the allowances*.

Mon pa konnen ki mannyer i apele, si i en *allowance* ouswa si i en *pension* ki bann dimoun ki'n travay dan sekter esansyel par egzanp bann ners - sa R1000mil la. Ners, *Teachers* avek Gard ti gannyen, zot pe demande eski sa pou annan en *increment* ladan ouswa non?

Mr Speaker mon annan 3enm mon kapab demande?

### **MR SPEAKER**

Mersi Onorab, ou'n demann de kestyon mersi. *Chief Secretary*, i annan de kestyon lo *allowances*.

### **CHIEF SECRETARY SHELLA MOHIDEEN**

For graduate allowances ki mannyer nou pe al enplimant li apre *consolidation*, i vedir ki prezan i pou dan saler. Letan ou vini ou en graduate ou ganny saler en *graduate*. Annandler sa bann pti bout *allowance* ki kree sa ki ou pe koz lo la, eski mwan mon gannyen? Eski mwan mon pa pou gannyen?

So mon kapab 10an dan servis, letan mon vini mon pran en louvraz dan Gouvernman, mon ganny en *graduate allowance*. So sa i sa *consolidation*. So endirekteman zot pou benefisyé akoz *graduate*

*will receive a graduate allowance moving forward.*

E ou 2enm kestyon ou pe koz lo *Public Service Special Pension*. An se moman zot pe ganny R1000, i annan en serten provizyon ki nou'n fer, me selman nou ankor pe fer diskisyon. E li osi mon a kapab *pronounce lo la at the right time*. Mersi.

### **MR SPEAKER**

*Thank you.* Bon mon'n arriv a lafen kestyon lo sa laliny Bidze. Ou ti'n lev lanmen? Bon si ou ti'n lev lanmen eskiz mwan, petet mon'n mank ou. Wi, Onorab.

### **HON JOHAN LOZE**

Mersi Mr Speaker. Mr Speaker mon poz mon kestyon anba gidans *Standing Orders 81(6)*, spesifikman lo sa morso ki dir, “such debate being confined to the policy of the service for which the money is to be provided.” Mon'n lir zis en bout ankor ozordi, mon pa kontan gaspiy letan Lasanble.

Mr Speaker *Chief Secretary* i eksplik son pozisyon tre byen, dan tou keksoz ki i eksplike. Be la konsernan bann *Schemes* preznan in kree en konfli la. Lenpresyon ki nou pe gannyen se ki, sa bann *heads of* serten

*MDAs* ki pe vin isi devan nou, zot menm zot, zot pa pe konpran *Scheme of Service*.

Mon ganny lenpresyon ki problemm *from what*, la fason ki *Chief Secretary* in eksplike, be letan ou pe get bann heads of bann *MDAs* zot ki pa konpran. Zot ki pa efikas, pa zot travayer so possibleman keksoz ki ou pou bezwen adrese la, se *top down* la sa zafer *Scheme* la. Sey komans ek bann *heads* avan, lev zot nivo konpetans apre ou ava bouz lo travayer.

Mr Speaker, mon annan en kestyon lo kestyon grid saler avek *performance based management system*. Kwa ki defann ki sa grid saler i ganny servi, parey i ti entansyonnen depi lo komansman, pou li fer sa *performance-based management system*?

Kot en travayer i ava ganny appraise lafen lannen, e tou le-z-an i ava bouz en *step*. Ouswa de *step* dan sa *Band*, baze lo son *appraisal* e lo son performans ki prezerv lespri *high performance, governance* ki *Chief Secretary* in eksplik nou. Kwa ki defann ki sa i arive? Ouswa si i posib pou li arive pou fer li dan sa fason.

En fason ki travayer Seselwa, sirtou travayer dan servis piblik, pa ava ganny *deprived of* zot benefis lafen

lannen. E *yet* mentenir sa largiman *high performance*, ki *Chief Secretary* pe *maintain*.

Akoz letan ou balanse *Chief Secretary*, tou *constitutional appointees* i otomatikman bann *high performance workers*. Akoz nou benefis lafen lannen nou pa pe ganny pouse nou. Be travayer Seselwa li pou li, i pe ganny zize en lot fason. Mwan mon ti a swete ki nou tou, nou ganny zize parey lo sa bout.

De, sa kestyon *high performance* mon sizesyon se ki bouz li ayer. Bouz li dan grid saler li menm, e servi li dan sa fason. Mon pa pou fer plis polemik ki sa Mr Speaker.

Selman i mon swe ki travayer Seselwa pa ganny vole son benefis lafen lannen, pandan ki mwan mon ganny tou sa ki pou mwan. Mersi Mr Speaker.

### **MR SPEAKER**

*Thank you Onorab. Chief Secretary* wi si ou kapab adrese?

### **CHIEF SECRETARY SHELLA MOHIDEEN**

Mersi Mr Speaker. Onorab mon a fer en koreksyon, si i annan en term ki annandler nou pa servi li, dan la fason ki nou servi i pa vedir ki dimoun i *inefficient*.

Nou bezwen zis korize ki nou tou, nou servi en term e nou annan menm konprenezon. So mon a koriz sa en, mon pa'n dir ki akoz nou pa pe servi menm langaz letan nou refer lo en term, ki mon pe dir ki nou bann *leaders* i *inefficient* dan Gouvernman. Ok?

Kot i konsern *performance management system* eski *reward* i kapab vin, *in terms of movement from one step to the next*? Sa i en diskisyon ki nou a bezwen ganny fer pou nou kapab konsidere. La pou le moman mon pa pou kapab donn ou en larepons, wi ou non. Akoz ou ki mannyer nou pe enplimant *performance management system* la, *approval* i *as per the law*.

E Lalwa in ganny aprouve par *National Assembly*, e nou, nou pe enplimant li parey Lalwa in ganny aprouve. Mersi Mr Speaker.

### **MR SPEAKER**

Wi, lekel klarifikasiyon Onorab?

### **HON JOHAN LOZE**

Zis pou klarifye Mr Speaker. Wi, Lalwa in ganny aprouve par Lasanble Nasional, be pa par nou kote, nou pa ti ladan nou. Be selman Mr Speaker, *Chief Secretary* in anmenn en bon largiman lo kestyon lespas

fiskal. Ki ozordi dan en pei napa lespas fiskal, pou nou prezant benefis avek bann travayer Seselwa, ki dan servis piblik.

Be *Chief Secretary* pa sa lenpresyon ki prezantasyon Bidze. E la fason ki Bidze in ganny defann par bann manm dan Lasanble in donnez dan lespri travayer Seselwa. So, ou'n vin ou avek en bon defans ek en largiman, ki'n fini ganny *countered* par Minis Finans li menm. E tou manm lo kote *LDS*, ki'n defann sa Bidze koman en Bidze parfe, e ki larzan nou annan.

Mon koleg Onorab Norbert Loizeau ti menm dir Minis Finans in dir li, i annan ankor larzan kot sa i sorti la pou met dan Bidze! Mersi Mr Speaker.

### **MR SPEAKER**

Mersi. Mon pran sa plito koman en komanter, *Chief Secretary* mon'n war ou lev lanmen. Alors si ou ava fer en pwen.

### **CHIEF SECRETARY SHELLA MOHIDEEN**

Wi, Mersi Mr Speaker. Onorab *fiscal space* pou bann benefis ki nou pe koz lo la, i *set at 11 percent GDP*. E se sa ki mon pe koz lo la mwan. Mersi.

### **MR SPEAKER**

Mersi. Bon nou ava prezan pran vot lo sa laliny Bidze. Pou *Public Service Bureau* ki pou R34milyon 966mil ki a faver, lev lanmen silvouple? Manm ki kont?

Lo Bidze pou *Public Service Bureau* pou R34milyon 966mil, 23 Manm in vot pour, 0 kont e 7 Manm in *abstain*. Donk sa Bidze in aprouve par Lasanble.

### **OTHER WAGES AND SALARIES (GRATUITIES, COMPENSATION FOR CONTINUOUS SERVICE)**

### **MR SPEAKER**

Mon konnen nou pe *run out of time*, selman mon pe avans lo sa lot laliny '*other wages and salaries*', pou en Bidze R394milyon 890mil, mon pou zis komanse lo la pou nou kontinyen apre si i neseser. Vis-Prezidan ou ava en lentrodiksyon lo sa Bidze silvouple.

### **THE VICE-PRESIDENT AHMED AFIF**

Mersi bokou Mr Chair. Mr Chair avek ou permisyon sa laliny ganny prepare an detay par Minister Finans. E avek ou permisyon, mon ava demann Ms Astrid pou kapab donn detay. Mersi.

**MR SPEAKER**

Yes, Madam Tamatave.

**COMPTROLLER GENERAL  
ASTRID TAMATAVE**

Mersi Mr Chair. Bonzour Mr Chair. Bonzour tou manm Onorab e tou dimoun a lekout. Mr Chair ‘other wages’ i annan 4 gro konponan ladan, premye i *gratuities* pou en sonm R45.5milyon.

Eskize sa i trouve lo paz dan *Budget Book*, i dan Seksyon 2 i anba ‘detailed summary of expenditure’. E i anba i trouve lo paz 30. So gratwite parey mon’n dir Mr Chair i en sonm R45.5milyon e sa i en increase R12mil konpare avek son *Revised Budget 2022*.

2enm konponan ladan i R76.9milyon sa i pou cater konpansasyon letan bann travayer dan sekter publik i *resign from post*. So sa i sonm konpansasyon, e sa i en logmantasyon R13milyon konpare avek *Revised Budget 2022*.

Nou annan en son R131.08milyon pou bann *constitutional appointees emoluments*, e son detay i anba Seksyon 5 dan Liv Bidze. E petet zis pou al en pe briyevman lo la, par rapor avek kestyon ki manm Onorab yer ti demande

*in terms of la kantite bann formers* ki egziste.

The total of R131.08milyon i enkorpor saler Prezidan e *former President* ki en total R3.3milyon. Saler Vis-Prezidan e *former Vice-President* R1.9milyon. Saler bann *Ministerial Emoluments* ki en total R17.1milyon. E ladan R6.3milyon i pou bann *former Ministers*. E nou annan 14 *former Ministers*.

Anba Seksyon D en sonm R1.8milyon pou Speaker ek Depite Speaker. E sonm R32.5milyon pou bann Manm Lasanble, sa i enkli R16milyon pou bann *former Members of the National Assembly*. E i annan 72 zot an total.

Anba Seksyon E saler pou bann *constitutional appointees* sa i enkli Oditer Zeneral, *Electoral Commission*, *Constitutional Appointment Authority*, PSAB, avek *former Ambassadors* ki enkli 8 zot. Sa i en total R7.1milyon.

Anba Seksyon F anba *Judiciary Act* en total R29.3milyon, pou bann Ziz ek bann *Masters*, Mazistra e sa i enkli en total 4 *former Judges*.

Anba Seksyon G *appointment* anba *Attorney General* ek *former Attorney General* en sonm R1.4milyon. E Mr Chair nou’n fer en

provizyon parey Minis in dir dan ladres, saler sekter piblik pe ganny revize from Avril. E i annan en komite ki pou ganny *set up* pou fer revizyon saler bann lapwentman konstitisyonnel.

E nou ekspekte ki i annan en *proposal for salary amendment* pou bann *constitutional appointees*, e nou'n fer en provizyon dan Bidze 2023 pou sa sonm. Mersi Mr Chair.

Anba Pansyon, *the next line, Pension Scheme* en sonm R140milyon, e sa i pou *employer contribution* pou tou travayer lo zot kontribisyon Fon Pansyon.

E an vi ki *Truth and Reconciliation Commission* son manda i terminen Desanm sa lannen, so nou pou napa en antite from Zanvye 2023, nou'n fer en provizyon pou 13enm mwan saler bann travayer *Truth*, anba sa laliny Bidze. So thank you Mr Chair.

### **MR SPEAKER**

*Thank you.* Mon kapab ganny lentansyon bann Manm ki pou annan kestyon. Eski mon pou annan zis Onorab Cosgrow? Bon, me osi Onorab Loze. Tre byen mon pou annan 3 Manm ki pou annan kestyon. Mon pe kalkile, nou kapab kontinyen

pandan sa peryod, e fini avek sa laliny si mon pou napa lezot Manm.

Donk, mon krwar nou a kapab prosede ziska 11er rezonnab. Alor mon a pran kestyon Onorab Cosgrow.

### **HON WALLACE COSGROW**

Mersi Mr Chair. Mr Chair mon annan en senp kestyon baze lo bann lenformasyon ki Ms Tamatave in donn nou. Mon annan en senp kestyon lo *constitutional appointments*.

Ler nou pe get sa larzan from 2021 e i ti R81milyon, e letan nou pe get 2025 i R212milyon en pti pe plis ankor. Konmsi Mr Speaker si Ms Tamatave i kapab eksplik nou, kwa sa kantite *increase* ki pe fer sa Bidze *constitutional appointments* get bokou.

Menm sa lannen - *I mean* lannen prosen 2024 avek 2025 ki preski dir ou a krwar double. So kwa ki pe fer li mont sa kantite? Nou konnen 2025 i annan en eleksyon, eski zot pe prezimen ki poudir mazorite bann Minis, Vis-Prezidan ek Prezidan pa pou la - pou *out* ek pou pey zot pansyon bann zafer ladan? Mersi.

### **MR SPEAKER**

Mersi, Ms Tamatave. VP mon pas bann kestyon avek Ms Tamatave avek ou permisyon.

**COMPTROLLER GENERAL**  
**ASTRID TAMATAVE**

Mersi Mr Chair. Mr Chair dan Bidze 2025 parey nou okouran, an 2025 pou annan en eleksyon Prezidansyel. E pou annan en eleksyon Lasanble, e pou'n arriv 5an.

E pou tou Manm Lasanble, ek tou bann Manm *Ministerial*, Egzekitiv zot *end of term gratuity i for due* an 2025. So sa provizyon ki nou'n fer dan Bidze, pou tou bann Manm Lasanble avek Prezidan ek bann Minis.

**MR SPEAKER**

Mersi. Klarifikasyon Onorab, wi?

**HON WALLACE COSGROW**

Wi Mr Speaker mon dakor mon konpran ki Ms Tamatave pe dir. Be si ou get zis menm *between* 2022 ek 2023, in mon aepre R40milyon. Konmsi eksplik nou en pti pe sa *steep* logmantasyon.

**MR SPEAKER**

Mersi, Ms Tamatave.

**COMPTROLLER GENERAL**  
**ASTRID TAMATAVE**

Mr Chair, petet mon pa'n nonm sa sonm. Parey mon'n dir from Avril 2023 parey Minis ti'n anonse, pou annan sa legzersis ki pou ganny fer, pou revizyon saler *proposal*, pou revizyon saler *constitutional appointees*.

So nou'n fer en sonm provizyonnel dan Bidze from Avril, ziska Desanm 2023 pou 9 mwan. E sa sonm nou'n *cater* pou li pou 12mwan an 2024 e 2025. *Thank you Mr Chair.*

**MR SPEAKER**

*Thank you.* Onorab Pillay?

**HON SEBASTIEN PILLAY**

Mersi Mr Chairman. Mr Chairman si ou a permet mwan, mon pou lir en mesaz ki mon'n gannyen avek en dimoun k en *PHD holder* dan Gouvernman, zis permet mwan.

**MR SPEAKER**

I lo sa size?

**HON SEBASTIEN PILLAY**

*I relate* ek sa.

**MR SPEAKER**

Bon nou ava pas li koman en pti komanter.

**HON SEBASTIEN PILLAY**

Mersi bokou. I dir mwan koumsa ou konnen mon'n perdi R2mil lo mon lapey depi Fevriye

2022. Mon *performance allowance in freeze*, mon annan en *PHD, Staff* ki pli ba ki mwan i ganny plis ki mwan. Annandler mon demande akfer lekol dan sa pei.

La in anras nou, nou *end of year gratuity* selman pou constitutional appointees i ganny bokou plis ki mwan, pou dir i reste eksetera, eksetera, eksetera. So mon kestyon Mr Chairman -

### **MR SPEAKER**

Yes?

### **HON SEBASTIEN PILLAY**

Sa bann dimoun zot lo bann *PSC Contract* e i annan *compensation*. Sa *issue compensation regarding PSC Contract*. Akoz ki Gouvernman prenon kont i annan sa bann dimoun ki'n deza fini etabli ki zot sipoze ganny peye.

Avan zot pran en desizyon *to cut off*. E re vwar ki mannyer sa *continuous service* i ganny kalkile, nou pa pey sa bann dimoun, sa ki ti'n agree dan zot Kontra orizinalman. Par egzanp *gratuity*, par egzanp sa bann keksoz?

Akoz ler nou pe koz *compensation for continuous service*, i annan sa konponan *continuous service* ki relye avek *PSC contract*. Ki souleve dan

serten *area parey* kot Oditer Zeneral, parey sa. So mon ti a kontan konnen si pou annan en posibilite pou Minister Finans konsider sa, pou bann travayer ki dan sa konteks?

Mon 2enm kestyon Mr Chair, mersi pou permet fer sa komanter pou met an konteks mon kestyon. Ler mon regard sa size gratwite, konpansasyon pou *continuous service, constitutional appointments*, eksetera, i kler ki i annan de standar dan pei. Menm si mwan mon en politisyen ozordi, mon tonm ladan, i annan de standar. Eski i annan travay ki pe ganny fer pou *breach* sa bann diferan standar ki egziste?

Pou anmenn en pe plis *fairness* dan la fason ki keksoz i ganny gete? Mon konnen ou pou kontan reponn sa enn kestyon. Si Ms Tamatave i kapab reponn sa kestyon. Mon krwar i avek li laba. Eski nou pe travay lo la?

E byensir Mr Chairman mon dernyen kestyon, mon'n vwar nou'n mansyonn *Truth and Reconciliation staff regarding thirteenth month salary*.

Mon krwar sa bann *staff* i devret ganny peye zot 13enm mwan, me eski dan konteks *Truth and Reconciliation staff*, zot osi zot pou pas atraver en

*performance appraisal* pou zot 13enm mwan? Mersi bokou Mr Chairman.

### **MR SPEAKER**

Mersi. Nou ava pas kestyon pou Ms Tamatave.

### **COMPTROLLER GENERAL** **ASTRID TAMATAVE**

Mersi Mr Chair. Mr Chair pou premye kestyon *in terms of peyman dues* en travayer baze lo en Kontra, si en Kontra in ganny sinyen antre en travayer ek en anplwayer, Tou term dan sa Kontra i ganny *fulfill*. Si i annan en peyman pou pey sa travayer konpansasyon letan son Kontra i fini, mon prezimen sipoze, i bezwen ganny peye.

Si i pa pe ganny peye, i annan *misperception somewhere*. Me selman *as far ki nou konnen*, letan ou annan en Kontra ki'n ganny sinyen ant de parti, letan son Kontra i terminen, tou *dues* ladan i ganny egzize.

Akoz sel keksoz ki par egzanp bann Kontra ki ti annan bann *annual gratuity* tou travayer in ganny zot *annual up to last year*. Bann novo Kontra ki sa bann provizyon pe ganny re tire. Me selman dan bann *old contract*, tou travayer ki ti egziste ti pe ganny sa peye.

Dezyenm *in regarding* de standar, mon pa kler *in terms what are the two standards* ki Onorab pe *refer to*. Selman an term gratwite dan Bidze bann Minister, ou pou vwar i annan gratwite ki dan serten Minister - Dan tou Minister ou pou war zot gratwite e sa i sa gratwite tou le 5an, kot travayer i ganny R10mil sa i dan Bidze bann Minister. Sa ki la i pou bann gratwite apre an Kontra.

*In terms of* dernyen kestyon Onorab. Onorab ou kapab repet ou dernyen kestyon *please?*

### **HON SEBASTIEN PILLAY**

Yes, i en kestyon lo size *fairness* lo la fason tretman i gannyen.

### **MR SPEAKER**

*Panel?*

### **CHIEF SECRETARY SHEILA MOHIDEEN**

*Performance management system i apply* pou tou *public officers, yes.*

### **MR SPEAKER**

Klarifikasiyon.

### **HON SEBASTIEN PILLAY**

Mersi Mr Chairman. Mr Chairman mwan mon annan en pti klarifikasiyon. So mon'n ekout byen Ms Tamatave, e

mon konnen sa *Comptroller General*, Ms Tamatave i *very serious about management* son larzan pei. I son rol, i son louvraz e i bezwen fer sa.

Me mon *come back to* bann *policymakers* ki la lo sa latab, e i annan enn pli enportan la se Vis-Prezidan. I annan konplent ki *regarding performance allowance* bann dimoun ki lo *PSC Contract* zot pa'n ganny peye.

I annan osi konsern – *well* mon pe met sa devan zot, si napa *then* zot ava vin dir Lasamble napa. Be i annan konsern *regarding* sa. E sa in ganny tire dan bann nouveau Kontra, an sa ki konsern *performance allowance*.

So mon kestyon, ki mannyer ou pou ankouraz en dimoun ki lo en *PSC Contract* ki travay avek Gouvernman? Akoz ler sa dimoun pou kite lo sa *PSC Contract* e sa i pou vin lo kestyon ki Onorab William ti demande;- ozordi ou annan sa problemm Mr Chairman, ki dimoun ki'n *retire* dan louvraz en pe lannen pase, depandan lo saler ki zot gannyen, pansyon ki zot gannyen ozordi, relatif avek pansyon ki en dimoun ki dan menm louvraz ozordi pou gannyen demen, i annan en gran gap.

So i pa permet tou dimoun viv an dinyite. So mon kestyon i se ki, ki mannyer nou asire vizavi sa Kontra, bann keksoz ki sa dimoun i bezwen gannyen pandan letan ki i pe deservi sa Kontra - Nou'n dir i annan keksoz ki ti'n koupe akoz *Covid*. Tou sa ki ti'n koupe i ganny - *were reinstated* pou sa peryod, ki i ti sipoze gannyen, *and then* bann nouveau Kontra i mars lo bann nouveau kondisyon. Mersi Mr Chairman.

### **MR SPEAKER**

Mersi. Mon krwar petet eski *Chief Secretary* i pli byen plase pou li adres sa?

### **CHIEF SECRETARY SHEILA MOHIDEEN**

Mersi Mr Speaker. Mersi Onorab, mon pa pe tro konpran si i annan dimoun ki pe dir ti annan serten keksoz dan zot Kontra ki zot pa'n ganny peye?

Si i annan i enportan ki sa i ganny met a latansyon mon lofis, e nou ava regarde akoz zot pa'n ganny benefis. Menm si ti annan bann *policy decision* ki ti ganny fer *regarding performance allowance*, si ti dan ou Kontra, ou ti pou bezwen ganny peye.

Akoz i dan ou Kontra, tou sa ki dan ou Kontra ou ganny peye. E se letan ou fer *policy*

*decision la, i toulstan bann nouvo Kontra. Unless parey dan Lalwa lanplwa, annan de ler i dir ou, ou kapab fer - . Menm letan ou pe al dan sa nouvo Kontra, i annan sa *negotiation* ki ganny fer apre la ou met dimoun.*

*So performance allowance i en *policy* li. Non? I en *policy*. So mon krwar I back to sa ki Onorab Lemiel ti'n dir. We still have sa 11 percent GDP, pou nou travay avek. E letan mon pe koz *fiscal space*, mon focus i lo sa 11 percent, akoz Public Service Bureau se sa, nou manda. Se pou fer sir ki nou pa exceed. So tou desizyon pou bezwen ganny fer baze lo si *fiscal space* i allowed pou nou fer bann *policy decision*.*

*But Onorab, ou kestyon was nou pa pe peye, nou peye si i dan son Kontra.*

### **MR SPEAKER**

Onorab mon krwar ou kestyon in ganny reponn. Wi, mon pe dir sa akoz mon'n pran en risk pou dir nou ava ale ziska 11er. Annou sey kapab *meet* sa silvouple. Wi, Onorab ale ou pwen.

### **HON SEBASTIEN PILLAY**

Mersi Mr Chairman, e mon kontan sa largiman 11 percent *wage to GDP ratio*. Mon

konpran en letan ti 7 percent, in mont 10 percent ozordi i mont sa nou konpran.

Be mon ti a kontan met devan Lasanble Mr Chairman, nou ankor pe aprouv pou nou form nou antite, pou *increase the wage bill of Gouvernman*. So i pa kapab bann ki ozordi pe bezwen travay, pou soufer pou bann nouvo desizyon.

*So then Gouvernman i bezwen vin pli efikas. Sa i zis mon pwen Mr Chairman. Mersi.*

### **MR SPEAKER**

*Thank you, the Chief Secretary i a note. Onorab Loze ou kestyon.*

### **HON JOHAN LOZE**

Mersi Mr Speaker. Mr Speaker mon retourne lo sa 11.5 percent *wage to GDP ratio* ki nou pe koz lo la.

Mon ti a kontan si Ms Tamatave i kapab eksplik travayer, kote sa i sorti? Eski sa *tombe du ciel*? I sorti dan *policy* ki Gouvernman i reve? Ouswa si serten negosyasyon ki ganny fer avek IMF, ant Minister Finans ek IMF ki zot agree lo serten bann keksoz?

*Now nou annan nou 11.5 percent *wage to GDP ratio*. Nou annan nou en set nonm travayer Seselwa ki'n travay li. I la an servis, i pe travay. Gouvernman li lo son kote i*

kontinyen kre bann nouveau eleman, anmenn bann nouveau keksoz ki met pwa lo sa *wage to GDP ratio*. Ki deza an egzistans.

E olye konsolid benefis bann travayer an servis, zot, zot ganny leskiz ki i annan sa *11.5 percent wage to GDP ratio*, ki bezwen ganny pran an konsiderasyon. E la kot nou issue of *fairness* i vini nou. Nou konpran ou nou *Chief Secretary*, nou konpran ki ou annan sa pou travay ladan. Be sa ki nou, nou ti a swete se ki sa pti pannyen 11.5 dizef ki ou annan la, i ganny partaze ase ekitableman ek sa ki deza la, pe travay! Mersi Mr Speaker

### **MR SPEAKER**

Mersi. Petet Ms Tamatave i pli byen pase pou eksplik sa *11.5 percent*? Byensir eskiz mwan VP si mon'n - . VP? Ms Tamatave, wi?

### **COMPTROLLER GENERAL ASTRID TAMATAVE**

Mersi Mr Chair. Mr Chair sa *11.5 percent of GDP* i form parti enn nou bann *benchmark*, dan sa Lagreman ki Gouvernman in sinyen avek *IMF*. So i form parti dan sa bann *benchmark*. E sa i ti la depi avan koman en *benchmark*, avan i ti pli ba. Avan i ti pli ba.

La i pli o i vedir nou annan lespas pou nou donn plis resours, in terms of sa *wages allocation*. E sa in osi *allow* nou pou nou donn en *salary review* sa lannen, *from April*.

So *within* sa poursantaz, Gouvernman nou'n kapab negosye pou nou kapab trouv lespas pou nou donn en *salary increase* sa lannen. Mersi Mr Chair.

### **MR SPEAKER**

Mersi Onorab, nou bezwen terminen. Ki klarifikasyon?

### **HON JOHAN LOZE**

Mr Speaker la nou'n etablir klerman pou dir sa *11.5* sa *a pas tomber du ciel*. Bon, in asize Minister Finans avek *IMF*, zot in negosye, in konpran sa in ganny *set as a benchmark* senpleman akoz i annan lespas pou sa ganny itilize. Be prezan nou propozisyon servi li pou benefisyé dimoun ki pe travay silvouple! Mersi Mr Speaker.

### **MR SPEAKER**

Mersi. Bon, *ok*, nou'n prezan pare pou pran vot lo sa Bidze pou '*Other wages and salaries*' dan *Appropriation Bill*. Ki pou en total R394milyon 890mil, Manm ki an faver lev lanmen silvouple? Mersi, Manm ki kont? Lo Bidze '*Other wages*

and salaries' R394milyon 890mil, 27 Manm in vot pour, 0 kont e 3 in *abstain*. Sa Bidze in aprouve par Lasanble. Mersi.

Bon mon pou remersye delegasyon ki la. E ki pou kit nou an se moman. Donk mersi bokou e bon kontinyasyon pou zot travay. Nou ava pran *break* la, e nou ava re pran travay 11:30. Mersi.

**(BREAK)**

**OFFICE OF THE MAYOR OF VICTORIA**

**MR SPEAKER**

Byenveni Mr David Andre *Mayor of Victoria*. Madanm Lydia Charlie *Executive Director* dan son biro, Madanm Solange Marimba administrative assistant, Mr Dan Fontaine *Chairman Paradis des Enfants Entertainment Limited*. Wi nou ava konmans ek Bidze pou *Mayor of Victoria* ki lo paz 42 ziska 44 pou en total R6milyon 923mil. Mr Andre ou ava fer en lentrodiksyon lo sa Bidze silvouple.

**MAYOR DAVID ANDRE**

Mersi Mr Chairman. Bonzour Mr Chairman. Bonzour tou Manm Onorab. Bonzour tou dimoun ki pe ekoute. Parey ou'n dir Mr Chairman Lofis Mer

Lavil in ganny en Bidze R6milyon 923mil.

Manda Biro Mer Lavil an bref konmsi pou fer sir ki lavil i reste en lavil vibran, ki akeyan, ki prop e ki angaze avek tou bann dimoun ki frekant lavil e ki travay dan lavil.

Mon espere ki son misyon i ava enn ki pou fer sir ki Sesel i annan en kapital, en lavil ki non selman i annan tou sa bann ki keksoz ki mon'n dir, me selman o nivo kiltirel osi i reprezent sa lavil ki nou'n dir Kapital Lemonn Kreol. Vwala mersi Mr Chairman.

**MR SPEAKER**

Mersi, nou ava pran kestyon bann Manm. Onorab Aglae i kapab konmanse?

**HON EGBERT AGLAE**

Mersi Mr Chair. Bonzour *Mayor* ek ou lekip. Premye kestyon ki mon anvi demande, an vi ki Mer Lavil ou menm, ou annan en lot pozisyon konman Sekreter Deta mon krwar pou Kiltir, eski ou saler pe sorti anba *Mayor's Office* or i annan en lot saler ki ou pe gannyen konman Sekreter Deta pou Kiltir?

Dezyenmman, i annan sa issue eleksyon Mer Lavil ki'n ganny prozekte. Si ou ti kapab VP i la anr VP pa la. Si ou ti kapab pronons nou lo la, vi ki i

annan en Lalwa *pending* lo sa size, ki sipoze vin devan Lasanble, pou kapab annan legzekisyon osi posibleman lannen prosen? Mersi.

### **MR SPEAKER**

Mersi. Mr Andre?

### **MAYOR DAVID ANDRE**

Mersi Onorab. Mersi Mr Chairman. An se ki konsern saler Mer Lavil, mon pe ganny mon saler Mer Lavil parey mon'n gannyen depi ler mon'n pran dan sa pozisyon 2017, ki epi mon'n ganny re-elekte ziska Desanm sa lannen le 31 Desanm. Mon pa pe tous okenn lezot saler, oubyen okenn lezot *allowance*.

Savedir sa fonksyon Sekreter Zeneral Kiltir ki mon pe fer la, si ou get li koumsa, mon pe fer li mon pa pe gannyen sa saler. Mon pe mars la lo sa saler Mer Lavil, ziska ler mon ava pran sa fonksyon li tousel a parti lannen prosenn.

Pou eleksyon Mer Lavil, wi i annan en propozisyon ki Gouvernman in fer, pou fer eleksyon Mer Lavil. E sa parey ou'n dir sa Lalwa, sa *Bill* pou vin devan Lasanble, e letan i ava vin dan Lasanble, Lasanble i ava deside ki mannyer pou fonksyonnen. Se tou ki mon kapab dir lo la pou lenstan.

### **MR SPEAKER**

Tre byen. Mersi. Onorab Cosgrow?

### **HON WALLACE COSGROW**

Mersi Mr Speaker. Mr Speaker mon pou swiv - enn mon kestyon mon pou swiv dan laliny kestyon Onorab Aglae. An se ki konsern sa de rol, eski i annan en Bidze pou Biro Mer Lavil e osi Sekreter Zeneral pou Departman Kiltir, eski ou kapab dir nou ki priyorite akoz nou pe donn nou en saler la. I annan en lot travay anba en lot lorganizasyon, ki priyorite ki ou pe donn ou rol konman Mer Lavil?

Eski i annan plis priyorite lo sa lot? Kan mannyer ou balans sa letan pou fer sir ki louvraz Biro Mer Lavil i pa enn ki ganny neglize? Akoz souvandfwa nou war ou bokou plis dan bann aktivite ki annan pou fer avek kiltir, e nou pa tro war konmela Mr David Andre dan bann keksoz ki annan pou fer avek lavil. So ki mannyer ou balans tousala, vi ki nou pe donn ou en Bidze e ou saler i sorti ladan?

E apre dezyenm kestyon an se ki konsern bann diferan lorganizasyon, gouvernmantal e osi bann lenstitisyen prive ki fer letour - *I mean* ki dan Victoria

en? Ki bann travay ki zot pe fer pou petet amelyor lanvironnman Victoria, an term lapropte, an term egeyman dan Victoria. E ki kontribisyon sekter prive i annan dan sa domenn? Mersi.

### **MR SPEAKER**

Mersi Onorab. Mr Andre Mer Lavil.

### **MAYOR DAVID ANDRE**

Mersi Mr Chair. Mersi Onorab pou ou kestyon. Sa de rol i de rol ki konpliman kanmarad si oule. Ou'n demann mwan sa kestyon ofet si mon pa pe negliz en rol pour en lot? Non, non, non i pa sa. Kot Mer Lavil avek Ms Charlie avek Mrs Solange nou annan en fason travay. Nou annan bann priyorite, nou annan bann travay ki nou'n planifye mannyer pou fer.

E kot Kiltir osi i annan lekip ki anba PS Ms Kalebi. E i en kestyon etablir ou priyorite, etablir organizasyon e i pa en gran problem. Nou konnen lekel priyorite e tel moman, lekel priyorite lot moman. E sa de keksoz i ofet i konpliman kanmarad e napa okenn moman kot enn in ganny *jeopardise* par rapor a lot.

Me parey mon'n eksplik ou sa rol koman Mer Lavil mon pe al

fini mon manda la le 31 Desanm. Donk mon espere sa nouveau dimoun ki ava vini, i ava petet vin avek bann nouveau proze pou lavil. E mwan mon ava travay plis lo bann proze kiltir. Mersi.

### **MR SPEAKER**

*Thank you.* I annan en dezyenm bout ou ti a kontan elabor lo la?

### **MAYOR DAVID ANDRE**

Eskiz mwan bann diferan lorganizasyon ki travay avek nou parey toulstan diferan lazans, LWMA, Transpor, tou sa bann lorganizasyon ki nou travay ansanm. E ofet nou, nou parey nou annan en doit de regard si mon kapab servi sa term. Kot nou idantifye sereten keksoz e ansanm nou travay avek zot pou fer sir ki bann keksoz dan Victoria o nivo lapropte, o nivo sekirite, avek Lapolis, i ganny adrese e nou annan en bon lantant avek tou sa bann Lazans e nou'n fer bokou keksoz, nou'n war rezulta. E mon satisfe.

Byensir i ankor annan louvraz pou fer. Definitivman i annan *room for improvement* parey nou dir. Me selman nou travay an tre close kolaborasyon avek tou sa bann Lazans pou fer sir ki sa bann adrese. Mersi.

**MR SPEAKER**

Mersi. Onorab Uranie.

**HON ROCKY URANIE**

Mersi Mr Speaker. Bonzour *Mayor* avek ou lekip. Ankor enn fwa tou koleg Onorab e zabitant Zil Pros ki a lekout.

Eski i annan provizyon dan Bidze pou siport bann lagreman e lesanz ki zot sinyen avek bann lavil, sirtou parey legzanp sa enn *Petit Co* ki La Digue in sinyen, pou ede fer ki sa bann lesanz, sa bann programm i mars byen? Mersi.

**MR SPEAKER**

Mersi Onorab. Mer Lavil.

**MAYOR DAVID ANDRE**

Wi mersi Onorab. Definitivman parey ou'n dir enn bann keksoz ki nou fer kot Biro Mer Lavil, nou fer bann esanz avek bann diferan lavil. E sa bann *twinning programme* - bann *jumelage*. Sa i ede pou konekte Victoria avek plizyer lezot lavil dan lemonn, kot nou kapab fer serten proze materyalize.

E parey ou'n dir resanman nou ti annan enn ki nou'n fer nou'n sinyen avek La Digue, *Petit Co* an *France* an *Normandie*. E sa bann delegasyon in vini, in vin isi, in ganny sans al La Digue, zwenn

ou menm ou avek ou delegasyon.

E Wi i annan serten provizyon nou'n mete dan nou Bidze malgre i pa en gran larzan ki nou annan la pou lenstan. Me solman i annan provizyon ki nou fer sir ki sa bann *jumelage* i materyalize e i aport benefis pou bann kominate, definitivman. Mersi.

**MR SPEAKER**

Wi Onorab pwen klarifikasyon?

**HON ROCKY URANIE**

*Mayor* eski i posib pou mwan kapab ganny sa sif apepre konbyen zot in deza mete dan Bidze? Mersi.

**MR SPEAKER**

Mersi. *Mayor* eski ou annan sa sif?

**MAYOR DAVID ANDRE**

Nou napa en sif la dan nou Bidze ki diriz *twinning* spesifikman. Me parkont i annan en *rubrique Hospitality* ki nou servi larzan avan nou ti annan.

Me solman avek *Covid* ek bann keksoz ki'n vini Minister Finans i pa'n donn sa larzan. Me solman i annan serten fon anba en *rubrique Hospitality* ki nou kapab servi pou *accueil* bann dimoun, oubyen si i

annan en delegasyon ki pe sorti Sesel pou al aletranze kot sa lot lavil ki nou *jumle* avek. Mersi.

### **MR SPEAKER**

*Thank you Mer Lavil. Onorab William.*

### **HON WAVEN WILLIAM**

Mersi Mr Chairman. Bonzour Mer Lavil avek ou lekip. Mr Chairman mon anvi demann avek *Mayor*, letan mon regard zot manda an menm tan mon pe regard *challenges*, e mon vwar poudir napa okenn landrwa ki montre poudir zot pe kree ouswa fer reveni.

E kestyon se ki, eski ler zot fer bann aktivite bann reveni ki zot i vin anba en fon, anba Mer Lavil or ki bor i ale? Akoz mon pe vwar anba *challenges* poudir ou'n nonm poudir difikilte pou anmas larzan kot *La Passerelle*. Letan mon regard bann prozeksyon bann aktivite zot annan lide fer, an menm tan mon pe demann mon lekor eski zot ganny *grant osi*? An term pa zis *in kind* me an term finansyel.

An menm tan nou rekonnet poudir letan nou fer aktivite i annan bann dimoun osi ki fer biznes anvil i kapab kontribye. Me napa landrwa ki montre poudir zot pe fer okenn reveni apard ki apopriyasyon

Bidze sa 6milyon. So mon anvi konn en pti pe egzakteman ki bor ki larzan i ale, sirtou letan zot fer bann aktivite. Mersi.

### **MR SPEAKER**

Tre byen. Wi Mer Lavil?

### **MAYOR DAVID ANDRE**

Mersi byen Onorab pou sa kestyon. Wi sa enn nou bann defi ki nou pe gannyen. Me sa ki mon kapab dir ou se ki resanman nou'n konmans kolekte serten larzan avek sa proze kot *Passerelle*. Ou konnen i annan en *Café* ki'n ganny fer. Donk i annan en *rental* ki sa dimoun sa propriyeter, anfen sa biznes i pe peye.

Epi i annan bann kiosk – osi i annan 3 kiosk ki nou'n fer o bor la, ki osi i annan serten kontribisyon zot pe konmans fer e sa larzan, pou laplipar i retourn dan *Consolidated Fund* normalman. A mwen ki Minister Finans kekfwa en *beau jour* a deside fer otreman. Me selman nou pe konmans kolekte en serten larzan lo sa bann landrwa ki mon pe dir ou.

Apre efektivman, wi i annan serten donasyon ki nou gannyen avek serten dimoun, serten biznes. Par egzanp pou Nwel la i annan serten dimoun ki'n kontribye pou aste serten

lalimyer pou met dan lavil, oubyen serten keksoz pou dekor lavil.

Donk mon ti a kontan profit sa lokasyon pou remersi sa bann dimoun. Donk i annan serten kontribisyon ki piblik avek biznes pe fer, pou fer sir ki nou travay i enn ki anfen ki aport en serten benefis. Mersi.

### **MR SPEAKER**

Mersi Mr David. Onorab Roucou.

### **HON MICHEL ROUCOU**

Mersi Mr Chair. Bonzour Mer ek ou lekip. Mr Andre mon war poudir i annan 3milyon pou *Paradis des Enfants*. E si ou kapab dir nou anvi ki en landrwa kot ou war poudir son *games room* laplipar son bann *game* pa pe marse. E ler bann dimoun i vin laba zot zis pou servi zis sa bout deor.

Dir nou ki plan zot annan. E si zot annan plan zot anmenn bann lezot envestiser dan sa landrwa la, pou ede lev li en pti pe met li en pti pe lo en lot nivo. Mersi.

### **MR SPEAKER**

Mersi. Mr Andre?

### **MAYOR DAVID ANDRE**

Mersi bokou Onorab. Wi *Paradis de Enfants* i ganny en

sonm 3milyon avek Gouvernman ki al plis pou pey bann saler avek enn de kou loperasyon. Me solman bann larzan ki kolekte atraver *rent* bann landrwa ki bann dimoun i annan bann pti biznes ladan, i osi ede pou fonksyon li.

E pou reponn ou kestyon *about games room*. Pe al refer *games room* la. Nou'n ganny serten finansman pou nou kapab refer li. E i annan menm Lanbasad *La Chine* ki'n osi fer en donasyon en *flying chair* ki sipoze arive nenport *quel moment* la, pou nou kapab enstale met bann novo latraksyon dan *Paradis des Enfants*.

So i annan en travay ki'n ganny fer. I annan serten finansman ki nou'n kapab gannyen avek bann biznes, oubyen parey mon dir Lanbasad *La Chine* ou lezot lorganizasyon, pou ede ki lannen prosenn i ava annan bann novo zwe, novo latraksyon pou bann zanfan. Mersi.

### **MR SPEAKER**

*Thank you.* Onorab Gill.

### **HON CHURCHILL GILL**

Mersi Mr Chair. Bonzour Mer Lavil dernyen fwa ki nou ti pe diskit Bidze mon ti demann ou

en kestyon konsernan en plan - en plan nasyonal lo ki ou anvizaze vwar pou Victoria, e ou ti dir mwan wi ou annan sa plan i bann dimoun ou pe travay avek.

E parey ou'n dir ou ti pran sa pos an 2017. Apre ou'n reganny apwente an Desanm i pou fer ou environ 5an. E eski ou santi poudir sa ki ou ti anvi *achieve* dan sa plan ki ou ti dir mwan then, konsernan Victoria.

E an menm tan avek lanons Minister Touris ki ti pe ankouraz annan en *Cultural Tourism* Sesel, pou fer kliyan depanse, eski ou santi poudir nou lavil dan letan ou *tenure* la in kapab fer en diferans? Si wi ou a dir nou be la, la sa bann diferans.

Apre an menm tan si nou pou get ozordi mannyer i ete, nou pou realize poudir si nou oule *compete* lo nivo rezyon, i annan ankor en pe travay ki nou bezwen fer ki ou kapab dir nou dan sa direksyon, si i form par dan plan fitir. Mersi.

### **MR SPEAKER**

Mersi Onorab. Mr Andre.

### **MAYOR DAVID ANDRE**

Mersi bokou Onorab. Definitivman mon pou dir ki in annan en diferans en depi ler

mon'n vin Mer Lavil an 2017. Mon'n kontiny travay ki mon bann predeseser avan in fer.

E sa ki mon kapab dir se ki, mon krwar tou dimoun i bezwen apresye poudir Victoria i ankor annan - Anfen i ankor wi e i pe gard sa *charme* ki nou pe dir Kapital Lemonn Kreol, en landrwa ki *safe*.

Malgre i annan serten pti betiz ki dimoun i fer en pe partou, partou kote. Me selman zeneralman en lavil ki *safe*. Napa dimoun ki ganny atake vreman. En landrwa ki relativman prop - e bann dimoun ki travay dan Victoria -

Parske pa blyie letan nou pe koz Victoria nou pe koz sa aglomerasyon sa 8 distrik en, ki form parti Victoria. E bann MNAs dan zot distrik zot pe fer en travay osi formidab, pou fer sir ki zot anmenn en kontribisyon pozitiv pou Victoria. E ki letan dimoun i vin Sesel, touris zot santi zot, dan en landrwa ki byen ki annan bann aktivite, ki annan en kiltir ki vivan.

Malgre ki pandan 2an nou konnen nou pa'n kapab fer keksoz. Me mon santi poudir i annan bokou keksoz pozitiv ki'n arive. E enn bann keksoz ki mon kapab dir se ki, mon krwar mon'n enfliyans Gouvernman

pou revwar, re-vizit nouveau devlopman Victoria.

La nou pe koz sa nouveau *Waterfront* ki Gouvernman i annan plan pou fer, ki pou reflekte ankor plis sa ki Sesel i reprezante. Donk sa parey ou konnen i pe ganny travay lo la. Mon sipoze i pou materyalize kekfwa ankor dan 1an ou de pli tar.

E pou mwan sa i en gran achievement, e ki tou dimoun ki parey monn dir ki vizit Victoria, ki travay dan Victoria mon krwar zot santi zot alez. E mwan letan mon pou sorti dan sa lofis mon pou santi ki monn fer en kontribisyon kantmenm pa bokou.

Me selman kantmenm i annan serten lefe ki mon sikseser ki vini i ava kontiny lo la. E osi i annan en keksos ki nou'n konmans travay lo la dernyerman sa *Victoria Emergency Plan*.

Parske pa blye poudir ti annan bann dezas ki ti arive lapli, eksetera. Donk Biro Mer Lavil i osi *instrumental* dan sa lekip, pou fer sir Victoria pa ganny andomaze par bann okenn dezas naturel or what ki arive. Mersi.

### **MR SPEAKER**

Onorab i annan en pwen pa'n reponn?

### **HON CHURCHILL GILL**

Wi sa bout kot mon'n demande si nou pou *complete* rezyonal e i annan serten ki nou bezwen fer, e sa i pou fitir. Si kekfwa sa osi i annan en refleksyon ki lo ou nivo Mer Lavil, zot in deza fer, pou nou kapab compete rezyonalman? Mersi.

### **MR SPEAKER**

Mersi Onorab. Mr Andre.

### **MAYOR DAVID ANDRE**

Wi definitivman. Biro Mer Lavil i pe travay an partenarya avek bann diferan pei dan larezyon sirtou, par egzanp *La Reunion*. O nivo Por, par egzanp i annan bann dimoun sorti La Reunion ki'n vini pou vvar ansanm avek Biro Mel Lavil, ansanm avek *Port Authority* ki mannyer nou kapab servi Por Victoria ansanm avek bann lezot Por dan larezyon.

E ki mannyer nou kapab kolabore ansanm pou fer bann aktivite, ki swa bann aktivite ekonomik, oubyen kiltirel. Donk i annan bann travay ki pe ganny fer avek sa bann lazans. Mersi.

### **MR SPEAKER**

Mersi. Onorab Vidot.

### **HON AUDREY VIDOT**

Mersi Mr Chair. Bonjour *panel*. Mon kestyon i lo ‘Hospitality’ anba programm 1 kot ‘wages and salaries, office expenses.’ Mon vwar i annan en logmantasyon. Mon ti le konnen si 2023 zot annan en kalandriye ase sarze, petet an term bann viziter ki pe vini? Oubyen si i pou plizoumwen *cater* pou bann programm lokal, ki petet anba ‘Hospitality’ ki zot pe kouver. Si zot kapab ekliersi sa bout.

Apre dezyenmman mon vwar poudir i annan en rediksyon - en gran rediksyon lo kote *adverts* avek donasyon. Petet mon pou le tous sa laspe *advert*. I annan bokou kestyon parfwa ki bann piblik i demande petet, ki lofis Biro Mer Lavil vreman son fonksyon. E ki bann travay ki vreman zot annan langazman fer dapre zot manda?

Petet mon war i tris ki mon war en pti rediksyon - an gran rediksyon plito. Sa ti pou en loportinite petet pou sansibiliz en pti pe piblik. Zisteman ekliersi byen sa pozisyon konman Mer e konn vreman rol Mer Lavil.

E petet osi donn bann fasil pou dimoun petet donn serten input pou ede, en fason, pou zot osi kontribye ki mannyer nou ti ava voudre vwar nou lavil Victoria vreman ganny valorize,

e montre son vre lenportans pou nou idantite Sesel. Mersi.

### **MR SPEAKER**

Mersi Onorab. Mr Andre?

### **MAYOR DAVID ANDRE**

Mersi bokou Onorab pou ou kestyon. Wi i annan sa logmantasyon dan ‘Hospitality’ budget line. Parey mon’n eksplike sa i pou cater en bon pe pou bann programm *twinning* osi sa, en?

Lamazorite akoz letan bann dimoun i vin Sesel nou, nou pran swen avek zot isi lokalman. Letan nou delegasyon i al aletranze osi nou bezwen pey serten kou. I annan serten moman kot zot *more or less* pey preski tou keksoz. Me selman still nou bezwen en larzan.

So sa larzan ‘Hospitality’ en bon pe i pou kontribye towards the *twinning programme*, en? Apre pou rediksyon dan *advert* wi se vre, me selman nou’n realize poudir i annan bokou keksoz ki nou kapab fer dan sa lespri pou nou esey ekonomize.

Me selman an menm tan pa *jeopardise* nou bann plan. Nou servi bokou medya sosyal e nou annan bokou bann rakont ki nou fer avek bann dimoun, swa atraver bann lazans, swa

menm atraver bann distrik. Kot dimoun i konpran en pe pli byen ki rol Biro Mer Lavil e kalite kontribisyon zot kapab fer.

Ou pou reste etonnen kantite dimoun ki telefonn nou, oubyen ki zis vin kot nou lofis pou vin demann en kestyon. Menm anmenn serten sizesyon lo serten keksoz zot ti a kontan vwar dan lavil. Donk pou mwan sa i en siny pozitiven? Me bon, i annan en rediksyon me selman mon pa krwar sa i pou afekte nou travay o nivo vizibilite. Mersi.

### **MR SPEAKER**

Mersi *Mayor* Andre. Onorab Sandy Arissol.

### **HON SANDY ARISSOL**

Mersi Mr Chair. Bonzour *Monsieur Le Mer* avek ou delegasyon. Mon anvi retourne ankor en kou lo sa pwen *current challenge* ki'n koz lo la taler, *in regards to* bann lokasyon kot ou pe anmase *La Passerelle* la.

Mon ti anvi demande kan *La Passerelle* ti kommanse e ki difikilte zot pe gannyen. Parske parey zot in eksplik nou poudir sa dimoun i bezwen pey en *rental*. So ler ou fer biznes avek mwan, mwan mon responsab pou *rental* tou le mwan. E eksplik nou en pe sa.

Dezyenmman i annan sa zafer *playground* la, *Paradis des Enfants*. I annan sa Bidze ki pe ganny mete pou pey saler bann dimoun. Eksplik nou en pti pe dan *Paradis des Enfants* vreman, ki annan dan *Paradis des Enfants*, ozordi ler nou pe koze la?

Parske mwan mon konnen *Paradis des Enfants* dimoun i servi la konnen en *shortcut* zis pou zot al lot kote, pou zot al *Cat Cocos* pli vit.

Eski i annan en fonksyon dan *Paradis des Enfants*? Ki kalite zouzou i annan? Ki kalite keksoz ki annan? Kwa ki Gouvernman pe anmase vreman avek *Paradis des Enfants*, konpare avek larzan ki nou depanse an term ki mon'n vwar dan saler la - 3milyon keksoz mon krwar in koz lo la. Mon ava aret la Mr Chair. Mersi.

### **MR SPEAKER**

*Thank you* Onorab. *Mayor*?

### **MAYOR DAVID ANDRE**

Mersi Onorab. *La Passerelle* ofet ti ouver an 2019 e tou swit apre nou'n tonm dan *Covid*. E sa dimoun ti ganny gran difikilte, akoz pa ti kapab ouver pou en bon pe letan. Ou konnen ou pa ganny drwa al dan bann restoran eksatera, eksatera. Me

la sa bann keksoz in renormalize e in konmans pey son *rental* e i fer li byen san okenn difikilte.

Donk nou pe konmans kolekte en larzan *from* sa. E antretan i annan osi 3 kyosk ki bann dimoun in vini pe servi pou vann bann souvenir, avek bann pti *ice cream or whatever*. Donk zot osi zot pe kontribye pou anmenn en keksoz dan lavil.

Donk sa ou lenstan mon kapab dir i pozitiv, e mon espere ki lannen prosenn i pou al ankor plis, parske la dimoun pe desann anvil, pou annan aktivite, donk zot biznes pou mars bokou pli byen, en?

*Paradis des Enfants*, parey ou konnen i ti anba SSI avan e Gouvernman in deside ofet donn sa responsabilite Biro Mer Lavil depi lannen pase letan SSI ti fermen. Donk nou'n pran sa i annan en *Management* e i annan bann aktivite ki pe pase. Aktivite ti'n redwir, parey mon'n dir pandan bann moman kot manrmay pa ti kapab ale akoz *Covid*. Me la aktivite in repran.

I annan bann dimoun ki fer laklas ladans. I annan ki fer laklas pou bann pti zanfan, i annan bann dimoun ki vin fer bann *birthday parties* dan

*weekend* oubyen lezot zour. Zot peye pou vini.

I annan bann zwe ki pe marse la. Me parey monn eksplike ti annan e bon pe sa bann zouzou ki ti'n kase, ki ti'n abandonnen. E nou nou'n fer an sort sa lannen, ki nou'n trouv serten fon pou nou kapab repar serten sa bann zouzou, oubyen anmenn bann nouvo zouzou, parey mon'n eksplike ki la konmansman lannen.

*In fact* i annan en bon pe ou konmans fonksyonnen pandan lepok Nwel. E lannen prosenn definitivman i pou annan bokou plis aktivite, bokou plis zouzou pou bann zanfan. So mon anvi reasir ki i dan bon direksyon e ki nou pou war en gran diferans dan *Paradis des Enfants*, apartir Nwel sa lannen ziska lannen prosen. Mersi.

### **MR SPEAKER**

*Thank you Mayor.* Onorab Ernesta.

### **HON PAUL ERNESTA**

Mersi Mr Chair. Mer Lavil, koleg Onorab ek tou dimoun a lekout bonzour. *I mean* midi in deza sonnen bonn apre midi. Mr Chair mon kestyon i an swivi avek kestyon Onorab Arrisol lo sa ki konsern *Passerelle*.

Mer Lavil li menm in dir ki i annan serten koleksyon zot in konmans anmase. I pa'n nonm sa sif, petet ti a bon nou ti ava konn sa sif, konbyen egzakteman pe anmase. Akoz deza nou pe vwar i annan 200mil ki pe ganny mete pou *fence of La Passerelle*.

Apre lo kote Lansiv Café osi mon mazinen i annan serten reveni ki pe anmase lo la, konbyen zot pe anmase? Par lefet ki Mer Lavil osi mon krwar i Sekreter Deta pou Kiltir. Lontan nou konnen dan lavil ti annan serten animasyon ki ti ganny pase, pou ki lavil i reste vivan.

E la nou santi i annan serten regresyon. Nou konpran petet akoz letan *Covid*, me i annan serten lapros travay pou fer ki lavil kapab reanimen parey ti ete lontan? Mersi Mr Chair.

### **MR SPEAKER**

*Thank you. Mayor.*

### **MAYOR DAVID ANDRE**

Mersi bokou Onorab. Si oule sa sif ki sa dimoun kot restoran *Passerelle* pe peye i R8mil par mwan, apre bann lezot kyosk ki annan R1500 par mwan bann lezot pti kyosk, *ok?* Fodre pa nou blyie ki sa dimoun ki pe *run* sa restoran *Passerelle* sa

dimoun in envestir tou son larzan dan sa *building* li menm. Gouvernman pa'n pey en sou sa zafer la *ok?* Mersi.

Epi pou reponn ou kestyon lo animasyon dan lavil, definitivman i enn manda Mer Lavil ansanm avek Departman Kiltir pou fer serten aktivite. Mon krwar nou war en logmantasyon dan bann aktivite dan lavil par egzanp ou'n mansyonn Lansiv Kafe; Lansiv Kafe i kot mize ki tonm anba, anba Lenstitisyon Kiltir e sa in ede pou anmenn en kantite dimoun dan lavil dimoun i vin vizit mize zot asize zot pran en pti drink en pti manze. Sa nou annan animasyon an ennler la.

E nou osi fer bann aktivite dan semen letan nou ti fer lafet moutya pa tro lontan pase, mon pa konnen si ou ti desann ou ti war lavil antye ti anvair avek dimoun. E dimoun ou ti santi ti annan sa laswaf pou vini pou vin fer en keksoz.

Donk i annan bokou keksoz ki pe arive e mon garanti ki si sityasyon i reste parey i ete, nou pou war bokou plis aktivite ki pe ganny programmen dan lavil sa lannen ki vini la. Mersi.

### **MR SPEAKER**

Mersi. Onorab Pillay pare pou ou kestyon?

### **HON SEBASTIEN PILLAY**

Wi Mr Chairman. *Ok mwan mon pou pare. Bonzour delegasyon Mer Lavil. E bonzour tou dimoun ki pe swiv. E bonzour tou Onorab.* Mon ti a kontan ganny serten klarifikasiyon lo serten sif, ki mon krwar menm si i annan bann kestyon ki'n ganny demande ki'n frot o bor, i pa'n vreman anmenn en larepons konkret, ki mon ti a prefere ganny en lesplikasyon en pe pli kler.

Dan ou Bidze pli gro sonm i al pou *wages and salaries* 1.3milyon. Apre dezyenm pli gro sonm i anba ou *goods and services* e ladan 3milyon ladan i pou *Paradis des Enfants*. Mon ti a kontan ganny en *breakdown* kwa ki sa 3milyon i *entail* pou *Paradis des Enfants*? Akoz mannyer mon konpran i annan bann aktivite biznes ki pe pase dan sa sit i annan dimoun ki pe fer reveni dan sa sit.

So mon ti a kontan konnen kwa egzakteman ki sa 3milyon ki Biro Mer Lavil i mete dan sa *Paradis des Enfants*, son *breakdown*. Apre anba ou akizisyon, anba ou *minor capitals* mon war en lot sonm

R1milyon. Klerman detay avek mon kwa ki pe ganny aste avek sa R1milyon?

Akoz ler mon regard Bidze, Bidze Mer Lavil, *basically* ler mon tir sa de gro konponan ou napa nanryen pou fer preski nanryen avek. So mon ti a kontan ganny en klarifikasiyon lo sa de pwen?

E mon dernyen pwen Mr Chairman i an relasyon avek en sif dan Bidze menm. I konsern sekirite;- mon war anba '*security and enforcement*' i annan R302mil. Ankor enn fwa eksplik nou sa *security and enforcement* si sa pe ganny fer par en sekirite prive, e ki bann prosedir ki'n ganny swiv pou donn sa sekirite prive pou sa Kontra? Zis pou fer sir poudir nou annord avek bann norm? Mersi Mr Chairman.

### **MR SPEAKER**

Mersi. Mayor.

### **MAYOR DAVID ANDRE**

Mersi Onorab. Petet bann sif mon ti si ou permet mwan Mr Chair mon kapab demann Mr Fontaine pou donn en detay lo sa 3milyon ki Onorab pe demande. Mr Fontaine i nou *Chairman Board Paradis des Enfants*, so i annan bann sif avek li i kapab petet eklersi ou lo la si ou i ok.

Konsernan sa lot sa enn ki ou pe dir *minor capital outlays* la ofet sa in al plis pou bann dekorasyon Nwel pou lavil en?

Epi o nivo sekirite mon sipoze ou pe koz sekirite kot Biro Mer Lavil, *am I right or Paradis des Enfants* ou pe koze?

**MR SPEAKER**

Yes Onorab?

**HON SEBASTIEN PILLAY**

Mersi Mr Chairman. Ou annan ou en provizyon R302mil anba *security and enforcement* anba '*goods and services.*' Mon ti a kontan konnen kwa ki sa R302mil pe aste *in terms of* sekirite? Si i pa asir sekirite pou bann sit ki Biro Mer Lavil i *run, or* ki mannyer sa provizyon sekirite i vini.

Akoz mon ti a kontan ganny en apersi *as to* ki mannyer depans pe ganny fer anba sa Biro? Mersi.

**MR SPEAKER**

Tre byen. *Mayor?*

**MAYOR DAVID ANDRE**

Wi se ki sa sekirite ki ou pe koz lo la, la i annan en *firm* sekirite ki nou annan Kontra depi ler mon'n vini, sa zafer in ganny en Kontra e nou'n pey environ R24mil363 par mwan pou bann

servis sekirite. Mon krwar mon'n reponn ou kestyon, *right?* Mersi.

**MR SPEAKER**

Wi. Eski ou ti'n demande lo ki sit-?

**MAYOR DAVID ANDRE**

Wi lo -?

**MR SPEAKER**

Wi kote zot, kote zot plase sa bann sekirite?

**MAYOR DAVID ANDRE**

Wi i kot Biro Mer Lavil *yes,* mersi.

**MR SPEAKER**

*Thank you.* Mr Fontaine ou'n ganny demande pou adres size *Paradis des Enfants* 3milyon.

**CHAIRPERSON**

**DAN**

**FONTAINE**

*Thank you Mr Speaker.* Bonzour Mr Chair, Onorab. Ok on average *Paradis des Enfants* itself -sorry *Paradis des Enfants* an prensip avek tou son rental e bann aktivite *games* ki ganny lwe, i anmas li en pti pe par lao R1milyon *income* - so throughout the year.

*When we take -* ler nou get sa R3milyon ki Gouvernman pe subsidies pou kouver bann depans, *most of the expenses* i

pe al anver *maintenance landrwa*, bann *sub-contractors* ki nou annan ki fer netwayaz landrwa *the upkeep, salaries towards the staff.*

*We have 8 staff plus 1 property manager, security for the site.* Nou pe zis kapab kit nou latet par lao delo avek sa larzan ki *available* ki nou gannyen pou depanse. E nou *rely* enormeman lo donasyon.

Sa lannen nou'n ganny nou pres R1milyon donasyon. Ki nou'n pran tou nou'n *inject back* dan *playground*. En kantite lenfrastriktir, bann *games* in ganny sanze in ganny met nef.

Parey pli boner *Mr Mayor* in ganny dir - in dir ki nou pe ganny en novo lekipman ki'n ganny *sponsored by Chinese Embassy*. E an plis dan nou menm nou annan *right now* dan por en *battery operated car* ki pe al dan *games room* ki en Onorab pli boner in mansyonn *about the games room.*

Vi ki sa larzan ki nou gannyen pe depanse *is barely enough* pou nou fonksyonnen, so we do our best to *upkeep the place*. Be it's very difficult pou nou depans larzan to - you know *capital expenditure* pou amelyor serten keksoz but nou pe esey fer sa zefor. So the *games room* now has been given

*some injections last the year before we also put - nou'n met bann PS4, tousala pou ede avek zanfan.*

Onorab boner in dir atraver dimoun i servi *playground* konman en *shortcut* pou al ver *Cat Cocos*. I en landrwa piblik nou pa kapab anpes dimoun trafike *provided* zot pa pe trafike pou fer keksoz negativ.

Loportinite pou zot pase i annan bann *tenant* la i annan bann take away bann lezot soz, so i annan *and the whole purpose* i nou, nou la pe ankouraz bann dimoun *to drive the traffic* dan sa landrwa. E si sa bann dimoun pe pase pou al *Cat Cocos* zot depans en pti larzan, so all good for our tenants. Thank you.

### **MR SPEAKER**

Wi Onorab Pillay.

### **HON SEBASTIEN PILLAY**

Mersi Mr Chairman. Mr Chairman mon oule repran de pwen ki'n ganny pran. Premyerman premye pwen *Christmas decorations*, so last year osi nou ti met en Bidze for acquisition of *Christmas decorations*.

E sa lannen nou pe met ankor R1milyon pou acquisition of *Christmas decoration*. Mon ti

ava espekte ki *one year to the next* i nou servi en pe sa bann ki'n gannyen ki nou'n aste avan, apre nou aste nouvo. So eksplik nou en pti pe, eski nou annan problem pou *store*, oubyen *what is the lifespan* sa bann dekorasyon ki fer ki sa lannen ankor nou pe met ankor en R1milyon.

E *it seems* ki prezan dapre Minister Finans tou le-z-an nou pe met R1milyon pou aste *Christmas decoration*. So lo de lannen nou pe depans R2milyon pou *Christmas decoration* ki mon, mon konsernen avek dan lafason ki nou pe fer sa depans.

So klarifye pou mon *what is the issue* vreman, akoz nou bezwen pe kontinyen pe *acquire* sa *Christmas decorations* ki nou pe met plis landrwa eksetera, *please* klarifye pou mwan sa en?

Dezyenm keksoz ki mon bezwen klarifikasiyon lo la se size *Paradis des Enfants*. Mon'n ekout byen *Chairman Board* mon konpran son largiman ki i pe fer. Me la nou annan en problem la nou annan nou en *subset* Bidze dan en Bidze. *Basically Paradis des Enfants* i annan en *compliment of maintenance, staffing and everything* ki mon napa en *breakdown* ditou la.

Mon krwar *going forward* nou pou bezwen ganny en *breakdown* pou *Paradis des Enfants* osi, akoz pou nou kapab zisteman *regarding*; par egzanp size *staffing* nou'n annan menm problem dan bann sityasyon dan lepase kot, en *subset* dan en lorganizasyon ou annan *staffing* ki pe ganny peye atraver Gouvernman.

Be la ki mannyer mon konpran *Paradis des Enfants* osi pe akt parey en konpannyen la dan en sort. So sa bann *staff* esansyelman zot pa bann dimoun ki travay dan *public service*. Menm si se *public service* ki pe pey zot saler so zot pa pou benefisyek 10poursan.

Ou konpran mwan la ki mannyer i vin en problem pou nou la? So nou bezwen rezourd sa problem, so eski Minister Finans Mr Chairman atraver ou, eski Minister Finans in balanse ki mannyer zot pou regard dan sa sityasyon *Paradis des Enfants*, vizavi son *staffing* ek bann anplwaye laba, ki efektivman avek sa ki pe pase, eski zot pou benefisyek avek zot 13enm mwan e bann kondisyon travay ki pe ganny ofer pou bann lezot *staff* dan *public service*?

E ki mannyer nou kapab plis detay lo ki mannyer nou kapab ganny plis detay lo sa

*breakdown depans Paradis des Enfants?*

**MR SPEAKER**

Yes mon sipoze se Mer Lavil ki pli byen plase si li ki *manage* sa *subsidy*. Tou fason mon a pas li laparol premye. *Mayor?*

**MAYOR DAVID ANDRE**

Mersi bokou Onorab. Mon apresye ou konsern zis mon anvi fer konmsi fer ou rapel poudir *Paradis des Enfants* ofet in vin anba Biro Mer Lavil en pti pe par aksidan si mon kapab servi sa term akoz i ti anba *SSI*.

E nou konnen ki *SSI* in *dissolve*, so olye les li en pti pe an aladeriv, Minister Finans in propoze ki i vin anba Biro Mer Lavil. Me mon toutafe dakor avek ou i annan serten travay ki bezwen ganny fer pou fer sir ki son stati, lafason ki i fonksyonnen i enn ki transparan, ki byen avek tousala.

E Minister Finans i annan bann lenformasyon, bann detay lo bann sif ki ou pe ki ou pe demande. E nou sipoze dir Minister Finans i kapab fer ou ganny sa bann sif a mon avi.

E si i annan okenn propozisyon lo, lo ou kote ki ou anvi met devan, lo ki mannyer zot ti a kontan war *Paradis des Enfants* fonksyonnen, mon pa

krwar i annan problemm avek Biro Mer Lavil lo la. Akoz nou, nou anvi keksoz i mars byen pou bann zanfan e pou nou pei. Mersi bokou.

**MR SPEAKER**

Lot kestyon lo dekorasyon Mer Lavil?

**MAYOR DAVID ANDRE**

Lo kote dekorasyon ou konnen pandan en bon pe lannen nou'n servi bann dekorasyon ki ti la i annan en bon pe pa'n fonksyonnen.

E i annan bann moman kot nou'n ganny kritike poudir be napa dekorasyon dan lavil, eksetera. E finalman nou'n ganny larzan nou'n fer vin nouvo dekorasyon.

E sa lannen nou'n fer ankor nouvo dekorasyon ki mon espere i pou *last* bokou pli lontan e nou annan facilite nou pe *source out* facilite pou pli byen stok li sa bann keksoz.

Fodre pa nou blyie en lekipman pou li kapab fonksyonnen fodre son *storage* osi i dan bon leta. E depi ler mon'n vini nou'n annan de *container* kot *stadium* laba, ki annan en bann in vye in koule, e en bann keksoz in andomaze pou en pe letan.

So la nou annan facilite ki nou pe, nou pe gannyen pou

nou kapab *better store* sa bann zafer e ki mon espere i ava *last ankor* pli lontan e nou annan bokou plis bann dekorasyon ki pe vini. E osi i annan bann kou ki nou pa ti pe antisipe, akoz i annan bann kou *shipping* ki'n ogmant en kantite ki nou'n bezwen pran an konsiderasyon sa lannen osi. Mersi.

### **MR SPEAKER**

*Thank you.* Wi, wi, wi esper en kou pou mwan ou pe al dan ou trwazyenm *round* la. Zis eski i annan en dimoun lo *panel* ki kapab klarifye lekel ki kapab fer antre *breakdown* dan sa *subsidy 3million* fer li antre dan Bidze.

Lo *panel* eski Miss Tamatave i ava adrese. Mersi.

### **COMPTROLLER GENERAL** **ASTRID TAMATAVE**

Mersi Mr Chair. Mr Chair sa 3milyon ki nou donn *Paradis des Enfants* i en, i parey en sipor finansyel ki nou donn li pou ki al anver son total kou loperasyon. So *Paradis des Enfants* i soumet son Bidze an totalite ki enkorpor son saler, son *repairs and maintenance*, son *utilities* e osi son prozeksyon son reveni ki i pe espekte anmase.

E sa R3milyon i parey en sipor pou ed li parey Chair in

dir zis *make ends meet* pou li, pou li kapab *cater* pou son bann depans. Me mon pran konsern Onorab an konsiderasyon, an vi ki *Paradis des Enfants* parey zot pou war dan seksyon 4 of liv Bidze *part 1* i en *state-owned enterprise Paradis des Enfants*.

So petet pou Bidze 2024 si nou, nou kapab fer en legzersis pou nou gete ki mannyer nou kapab pli byen prezant *Paradis des Enfants, rather than* anba *Office of the Mayor* me konman en sibvansyon to a public enterprise.

Mersi Mr Chair. Me selman sa letan ti pran desizyon *a while back* i ti ganny desizyon ti ganny pran sa letan pou met *Paradis des Enfants* anba Biro Mer Lavil konman sa transfer, me selman *going forward*, nou ava pran sa bann konsiderasyon an menm tan an konsiderasyon. Mersi.

### **MR SPEAKER**

Ou pa satisfe avek sa Onorab Pillay ?

### **HON SEBASTIEN PILLAY**

Mersi Mr Chairman. Mr Chairman mon satisfe ek sa larepons *subvention to public enterprises* me selman i les nou avek en lenpas. I annan bann staff ki anploye kot sa *public enterprise* prezanz. sSa antite i

parey *PUC* parey nenport ki as we speak la.

E Gouvernman pa pe donn li en *subsidy* akoz i ganny konsidere konman en *SOE* i pa ganny konsidere konman en *off the book entity*. Prezan sa bann staff ki travay dan sa lorganizasyon ler nou regard sa sibvansyon i pa'n ogmante *for next year* li.

*Which means sa 10 percent increase in salary pa pe ganny catered for pou sa bann staff if ever i pou ganny catered for.* So mon kestyon i pa neseserman pou adres pou *Chairman Board Paradis des Enfants*, me selman *what will happen* pou sa bann staff from perspektiv Minister Finans ?

Eski nou pe *build* dan sa Bidze par egzanp en 13enm mwan saler pou sa bann staff? I napa nanryen pou fer avek *whether Gouvernman in fer oubyen non.* I annan pou fer avek si nou kapab adres *welfare* sa bann staff *Paradis des Enfants* la *then we can resolve the issue and then we can move on from it.* Mersi Mr Chairman.

### **MR SPEAKER**

Miss Tamatave zis adres Mr Fontaine osi silvouple si zot kapab fer li dan 2minit akoz

nou letan pe kite. Ms Tamatave premye wi.

### **COMPTROLLER GENERAL ASTRID TAMATAVE**

Mr Chair 13enm mwan saler i aplikab pou tou travayer dan pei *irespective* ki bor zot, zot anploye. E *Paradis des Enfants* konman en *public enterprise* i bezwen fer son provizyon nesesar anliny avek *Employment Act* pou li pey son bann travayer zot 13enm mwan saler.

*In terms of salary increase* 10pourasan Gouvernman in fer provizyon pou bann travayer ki dan *Central Government*; savedir ki dan bann Minister, Departman e Lazans.

Okenn *public enterprise* dan Bidze Gouvernman pa enkli sa 10pourasan. So sa i aplik osi pou *Paradis des Enfants*. Mersi Mr Chair.

### **MR SPEAKER**

Mersi. Mon krwar in ase reponn sa bann kestyon. Mr Fontaine si i annan pwen ki in manke ou ava adrese silvouple.

### **CHAIRPERSON PARADIS DES ENFANTS DAN FONTAINE**

*Thank you Mr Speaker.* Onorab Pillay pou mon asize la ozordi pou sey eksplik ou *the full concept* ki manyer *playground*

pe operate it's quite difficult, we have the figures.

The agenda ki mon ti gannyen letan mon'n join sa Board se ki wi nou pou sey nou mye pou kapab fer sa *property generate* ase fizaman *income*, pou nou aret depandan lo Gouvernman. I vreman en quite en *big konmsi hurdle* pou nou *overcome*. What you cannot see and I would like to explain, is over the years we have cut down our cost, we have put PV on the properties to reduce electricity.

We have renegotiated all the contracts with all our third party suppliers, security, people doing landscaping to try and you know save some money, for us to cater for future kind of development.

As of right now we have all our outlets being rented. We are collecting approximately a R100,035 purely on rent compared to this time last year where we had some tenants that have moved out 168,000.

Yes we have taken note the fact that the Government is making changes in salary - salaries that will take effect next year. We are making provision that we will also cater for this and make the adjustment for the staff that is presently under the employment there.

Also this will all consider the consideration for the 13th month salary as well.

### **MR SPEAKER**

Mersi Chairman. Bon mon annan zis kestyon Onorab Hoareau ki reste avan nou pran vot.

### **HON JOHN HOAREAU**

Mersi Mr Chair. Monsieur Le Maire mon oule refer avek latab 3 anba *mayoral services*. Kot ou'n prevwar poudir pou annan 12 aktivite Bazar Victoria lannen prosen anba sa Bidze.

Mon ti a kontan konnen vi ki landrwa kot zot abitye fer Bazar Victoria pe al ganny met anba devlopman, eski zot pe swazir nouvo landrwa pou fer sa aktivite oubyen sa programm, oubyen zot pou bezwen kennsel li an totalite?

Dezyenmman Monsieur Le Maire mon ti ava kontan konnen anba bann *twinning agreements* ki zot in fer, mon war ki i vreman enteresan zot in fer bokou bann *twinning agreements*, me selman ki arive se ki napa *follow up* apre e napa *monitoring* pou get en pti pe, en pti pe *oversight* lo sa bann programm dan sa bann distrik, pou gete si vreman i pe marse.

Si vreman sa zefor ki zot, zot fer inisyalman pou *link up*

sa bann distrik, si sa bann keksoz pe marse. So mon ti a kontan konnen si sa i tonm anba zot prerogativ oubyen si sisteman i tou depan lo sa bann distrik pou zot deboury zot mannyer zot kapab?

Trwazyenmman zis en pti, enn ptipti Mr Chair. Anba ou *current challenges* ou'n dekrir poudir zot pe pas anba en pe difikilte pou kontrol *rodents* e mon mazinen lisyen eran osi dan Victoria.

So mon ti ava kontan konnen ki bann zefor zot pe mete pou zot kapab arive akonplir sa? Mersi.

### **MR SPEAKER**

Mersi *Mayor*. Silvouple ou annan trwa pwen pou adrese.

### **MAYOR DAVID ANDRE**

Ok mersi bokou Onorab. Se ki konsern bazar nou pe koz bazar anvil. Ofet *Cabinet of Ministers* in aprouve resaman ki nou servi *Independence Avenue* enn fwa par mwan, e la nou pe konmans fer enn la le 3 Desanm pou, pou lans bann aktivite Nwel.

Kot nou pou blok semen *Independence Avenue* pou annan bazar ki ava permet bann dimoun vin anmenn zot bann keksoz pou vann, artizanal, fler eksetera. E i

annan bann animasyon e nou anvi kontiny sa tou le mwan.

Donk sa lespas in fini ganny aprouve par Gouvernman pou nou kapab servi sa so i pou annan, i pou anmenn en gran diferans dan Victoria. Apre o nivo zimlaz ek bann distrik byensir nou, nou kot Biro Mer Lavil nou inisyе bann zimlaz bann diferan lavil bann diferan landrwa.

E parey ou konnen nou, nou swazir ansanm avek bann MNAs parey la resaman mon'n dir La Digue in, in zimle avek en lavil *Petit Co* nou, nou fer sa, sa linisyativ pou konmanse.

Epi i enportan o nivo distrik bann MNAs, bann DAs bann dimoun dan kominote zot vin avek serten lide, serten propozisyon pou nou kapab kontinyen. Nou, nou ofer nou sa, nou sa - anfen nou sa pwen depar e nou osi sa *liaison office* pou fasilit bann zafer. Me selman mon krwar pa si bann distrik zot, zot asize zot ti pe espekte Biro Mer Lavil fer tou keksoz pou zot. I pa mars koumsa.

Donk i enportan ki zot angaz zot bann dimoun dan zot kominote dan zot bann distrik, pou fer sir ki sa bann programm ki nou met an plas i marse e nou, nou donn zot tou sa sipor tou sa facilite.

Pou bann *rodents* wi nou, nou i annan bann programm ki nou'n fer sa lannen avek Departman *Environmental Health* pou met pwazon met (ki mannyer i apele) ratyer bann latrap pou ganny bann *rodents*. Me selman sa i en louvraz ki bezwen kontinyen toultan akoz lera ou pa pou kapab zanmen fini li, so ou bezwen kontinyelman pe fer en travay lo la.

Me selman nou ganny bann sipor avek bann lazans epi Minister Lanvironnman. Mersi.

### **MR SPEAKER**

Mersi *Mayor*. Bon nou'n pare pou pran vot lo *Office of the Mayor of Victoria* pou en total R6milyon 923mil. Manm ki an faver lev lanmen silvouple? Mersi. Okenn ki kont?

*Thank you.* Vot lo Biro Mer Lavil 26 Manm in vot pour, 0 kont e 2 in *abstain*. Donk son Bidze R6milyon 923mil in aprouve.

Mersi delegasyon Mer Lavil. Mon espekte mon pou war Mr Andre ankor pou Bidze swivan *National Institute of Culture Heritage and the Arts*.

Mon a swet lezot bon depar e bon kontinyasyon. Lasanble a repran 2er apre midi. Nou pran poz.

**(BREAK)**

### **SEYCHELLES NATIONAL INSTITUTE OF CULTURE, HERITAGE AND THE ARTS**

#### **MR SPEAKER**

Bonn apre midi tou dimoun. Madanm reporter nou a ganny delegasyon *Seychelles Institute of Culture, Heritage and the Arts*. Bon, bonn apre midi ankor enn fwa Mr David Andre sa voyaz dan son kapasite konman Sekreter Zeneral pou sa lenstiti.

E avek li osi nou annan Madanm Cecille Kalebi son *Permanent Secretary*. Madanm Vania Hoareau *Senior Accountant* e byensir bann zofisyen Minister Finans ki nou ti rekonnet bomaten.

Bidze pou *Seychelles National Institute of the Arts of Culture, Heritage and the Arts* lo paz 45 ziska 58 pou R137milyon 678mil. Sekreter Zeneral nou ekout ou lentrodiksyon lo sa Bidze please.

### **SECRETARY GENERAL DAVID ANDRE**

Mersi Mr Chair. Bonn apre midi Mr Chair. Bonn apre midi

tou bann Manm Onorab e tou dimoun ki pe ekoute. Lenstiti Nasyonal pou Kiltir, Leritaz avek Lar i en lenstitisyon parey son logo i dir son wi son *moto rather* i gardyen nou leritaz. I enportan dan en pei sirtou parey Sesel kot nou annan diversite kiltirel, i enportan ki nou sofgard nou idantite kiltirel e nou annan bann programm ki nou met an mars pou fer sir ki non selman nou prezerve nou sofgard nou kiltir.

Me osi nou promouvwar nou kiltir dan tou son fason; ki swa dan bann le sant leritaz ki swa bann artis ki en mannyer ki nou pep non selman i ganny en ledikasyon akademik, me selman nou annan en pep ki osi kiltive e ki kapab kontribye anver devlopman nou sosyete.

Donk vwala an gro nou misyon e sa i anliny avek Lartik 39 dan nou Konstitisyen, ki dir i bezwen ganny rekonnnet drwa tou dimoun pou pran par dan lavi kiltirel son pei.

E pou gard nou bann valer parey nou Konstitisyen i dir. E Leta osi pran bann mezir rezonnab, pou asire ki nou prezerv nou leritaz kiltirel. Vwala Mr Chairman mersi bokou.

### **MR SPEAKER**

Mersi Mr Andre. Pou konmanse Onorab Esparon?

### **HON REGINA ESPARON**

Mersi Mr Chairman. Bon apre midi tou dimoun a lekout, panel ek delegasyon. Mr Chairman mon ti ava anvi konnen ki bann landrwa letan mon pe regard anba *current challenges* la, mon ti ava anvi konnen ki bann landrwa ki leritaz pe demarke?

Ki zot anvizaze demarke ou idantifye konman bann nouvo sit leritaz, e ki zot pe fer pou prezerv bann ki deza la? Apre mon pe regarde enn zot bann defi se kontrent ek *pace of development* avek *national* avek prezervasyon bann aki leritaz.

E dernyerman, mon ti ava anvi konnen mon'n war i annan en, en sonm 204mil pou *returning graduate allowance*. Konbyen *graduate* ki pe travay avek zot e ki zot pe fer pou ankouraz plis zenn pou al etidye dan domenn leritaz? Mersi.

### **MR SPEAKER**

Mersi Onorab. Mr Andre Sekreter Zeneral.

### **SECRETARY GENERAL DAVID ANDRE**

Mersi bokou Onorab pou ou kestyon. Mon ava avek ou permisyon Mr Chair mon ava

petet demann *PS* pou donn ou bann detay, akoz *PS* i annan tou bann detay sa bann kestyon ki ou'n demande. Mersi.

### **MR SPEAKER**

Nou a pas kestyon ek *PS*.

### **PERMANENT SECRETARY CECILLE KALEBI**

Mersi Mr Chair. Mersi Onorab pou ou kestyon. Lo kote bann nouvo sit an se moman seksyon proteksyon leritaz, nou pe travay pou en lalis ki nou pa ankor formalize. Enn de bann nouvo lokasyon ki nou'n war se i annan batiman kot *Foreign Affairs*, nou pe konsider li nou osi annan lakaz Mr Prempeh ki nou pe regarde, Rochon, osi pou konsidere.

Nou annan pa mal en lalis bann moniman nasyonal aktyel ki tonm anba nou responsabilite. So nou pe priyoritize pou travay lo zot met zot azour an menm tan ki nou pe travay lo sa lalis parey ou pe dir, pou bann nouvo sit.

An menm tan nou annan bann Manm piblik ki osi apros nou e zot met a nou laporte bann lokasyon ki zot, zot pe war konman ki enportan *either* dan zot distrik, oubyen pou zot kominate. E la i annan en travay resers e teren ki ganny fer par nou bann zofisyel avan

sa, sa travay i ganny fer pou *nominate* li konman en site nasyonal ki ganny *maintain* oubyen okipe par nou.

An menm tan i enportan poudir ki nou ganny pa mal sipor ek piblik lo kote ek prezervasyon e lasistans pou get en pe nou bann sit. Ki pe ganny fer pou kontinyelman kit nou bann *site* a en serten nivo nou annan en seksyon parey mon dir ki apel *site management*.

E sa seksyon i la pou fer sir bann sit i ganny netwaye i ganny met azour, e osi travay pou promot zot. Sa lannen nou'n met en, en provizyon dan Bidze pou nou osi konmans get devlopman en *app* ki pou *facilitate* bann viziter konman Seselwa ler zot pe fer bann *trail* bann parkour pou zot idantifye bann sit.

So sa i en travay ekstra ki nou pe mete. E nou annan nou bann *maintenance* regilye ki nou fer lo bann sit tou letan, pou asire ki zot ganny garde dan en leta ki ganny zot prezervasyon.

Nou annan enn nou bann *site* ki nou pe sey met en pe zefor lo la, se nou *site* Misyon ki nou ti a kontan avek travay ki nou kapab deklar li konman en sit leritaz mondal. So sa i en

travay entans ki nou pe fer lo, lo sa kote.

Lo kote *graduates* mon pou napa sa detay kantite *graduates* aktyelman mon dan lenstiti ki mon annan la avek mwan Onorab me selman mon kapab rod sa lenformasyon pou ou.

Lo kote kiltir nou ankouraze ki bann zenn i met en latansyon partikilye pou vin travay kot nou i pa vreman sa kantite zenn ki nou pe war ki pe al fer bann mon kapab dir bann *studies* aprofondi lo nivo spesyalize pou bann travay dan Kiltir.

E nou toulstan get avek avan ti seksyon ANHRD ki get bann *scholarship* ki donnen i pa toulstan ki sa bann *scholarship* i *available* pou sa travay teknik ki nou spesyalizasyon ki nou rode.

Me selman i parfwa nou ganny bann zenn ki montre lentere e pou sa nou, nou toulstan fer nou mye. Nou - resaman la nou'n ganny en zenn fiy ki'n vini avek en degre dan *fine arts* ek *mix media*.

E la nou pe travay ek li pou li kapab kekfwa vin avek *proper training* ek devlopman, vin enn nou bann *curators* Seselwa pou nou bann *biennale* lar ki nou fer Sesel.

So nou ankouraz bann zenn pou pa zis konsider bann topik parey ekonomi, or *IT* e osi pou get Kiltir ler zot mazin bann letid avanse. Mersi Onorab.

### **MR SPEAKER**

Mersi. Onorab Aglae.

### **HON REGINA ESPARON**

Mr Chair mon ti annan zis en klarifikasyon.

### **MR SPEAKER**

Ok vitman silvouple.

### **HON REGINA ESPARON**

Mersi. Mr Chair mon ti zis anvi demann *PS* parey mon ti'n dir avek ou, i annan sa bann *challenges* kot ou'n mete ki annan sa disparate avek *the pace of development* avek prezervasyon.

Eski zot annan sa kolaborasyon etrwat avek, avek *SIA* mon kapab dir pran, pran parey sa, sa vye *building Makarios* kot dezyenm ger mondyal Glacis, ou konpran mwan, i en landrwa ki tonm anba leritaz, i sipoze ganny prezerve, me selman an se moman mon konnen i annan serten keksoz ki pe ganny fer ki kapab ganny son devlopman.

Konmsi i annan sa, sa etrwat kolaborasyon ansanm avek *SIA* letan zot pe devlop

bann sit. Parey la i annan sa *building* dezyenm ger mondyal ki zot anvi devlope pou ki sa lapse kiltirel i ganny prezerve? Mersi.

### **MR SPEAKER**

Mersi. *PS* pou adrese.

### **PERMANENT SECRETARY**

#### **CECILLE KALEBI**

Wi Onorab. Eskize mon'n mank sa bout. Wi i annan en disparite parfwa par lafason ki devlopman i ganny fer vit, e parfwa bann sit osi toultan i war zot dan sa bann sityasyon ki devlopman i bezwen ganny fer. E sa bann sit annan de ler i ganny met akote pou ki devlopman i ganny fer.

Me selman nou annan etrwat kolaborasyon avek *SIA* avek osi pou *Planning Authority*. Ler i annan bann devlopman ki pe ganny fer laplipar letan, *Planning* i anvoy kot nou pou, pou lavi Lenstiti Kiltir, pou gete si sa i en devlopman ki nou kote Lenstiti Kiltir nou siporte.

Eski i donn valer sa bann sit *or* sa bann eleman istorik. Avan nou ti annan en Manm ki ti asiz permanan lo *Planning Board* e alors nou ti annan plis mon kapab dir sa gardyen - sa lisyen gardyen lo la.

Be la avek sa novo sanzman ki'n fer avek *Planning*

*Authority*, i annan en mekanizm ki'n etablir e la ki zot toultan konsider nou konman *referral* e zot anvoy bann lenformasyon kot nou pou nou regarde. Mersi.

### **MR SPEAKER**

Mersi *PS*. Onorab Aglae.

### **HON EGBERT AGLAE**

Mersi Mr Chair. Bonn apre midi *CEO, PS*. Premye kestyion i konsern programm 3 '*development of arts and culture*.' Mon ti anvi konnen petet ki zefor spesyal ek sa Bidze kot i konsern pou travay ansanm sirtou avek bann Lazans *Tourism* parey *STB* li menm. An vi ki i annan bann demann ki'n ganny met devan pou promouwar lar ouswa bann *craft*, ki annan pou fer a labaz Sesel li menm, sirtou dan bann landrwa ki bokou viziter i frekante pou annan en stil valer azoute avek.

Mon donn ou en sel legzanp parey dan mon distrik mon annan *Mission Lodge* bokou i vizite, me selman nou ti a swete i annan bann keksoz ki ganny mete an egzibit an ki annan partenans Kreol li menm li Seselwa, pou ki kapab osi donn en pti lantreprenner sa *value added* ki mon krwar *tourism* i demande.

Sa i enn ki zefor zot pe fer, parey bokou pei i fer ler ou al vizit en sit zot annan bann lezot keksoz ki fer ou depanse? Sa i enn.

Dezyenmman kot i konsern *Board allowance*, mon war i annan en logmantasyon dan *SP1* sa dan *Board allowance* ki sorti 145mil pou mont 446, si mon kapab ganny en pti lesplikasyon, kwa sa logmantasyon pe *mean?* Mersi.

### **MR SPEAKER**

Mersi. Sekreter Zeneral ou -?  
*Yes, go ahead.*

### **SECRETARY**

### **DAVID ANDRE**

Mersi Onorab pou ou kestyon. An se ki konsern programm 3 ‘*development of the arts and crafts.*’ Dan ansyen - anfen dan ansyen Minister Kiltir ti annan *National Arts Council*. Anba sa nouvo lenstitisyon nou’n azout zisteman *craft*, akoz nou ti santi poudir *craft* i pe ganny en pti pe neglize dan en sans, so in vin *National Arts and Craft Council*.

E lide deryer sa se pou zisteman pou regroup bann artizan en, e bann dimoun ki annan bann travay ki fer avek lartizana. Akoz i deza annan bann lasosyassyone ki egziste pou sa. Me selman i annan osi bann endividé ki fer osi bann travay

eksepsyonnelle. E an pasan mon kapab mansyonnen i annan en dimoun an partikilye i dan distrik Cascade, son manman mon krwar sa dimoun in fer zoli *craft work* ki ofet i dan salon Prezidan la aktyelman la.

Donk sa bann dimoun normalman nou pa tro konnen kote zot ete avan. Alor nou pe repertorye tou sa bann dimoun tou bann lasosyassyone, pou fer sir ki bann programm i ganny byen organize, i ganny byen kordinen, ki nou pa kit personn deryer e ki nou valoriz sa bann travay. E osi i annan en travay entansif ki pe al ganny fer lo pas konesans avek bann zenn.

Akoz bann dimoun ki fer sa bann travay artizanal kekfwa zot en pe pli aze, e i enportan ki i annan larelev. Donk anba sa bann programm i annan osi provizyon, pou fer sir ki bann zenn i ganny sans travay ek sa bann dimoun, dan en mannyer ki i ava annan kontinite. E nou devlop tou sa, sa lendistri dan en sans lar o nivo skoler, o nivo ekstraskoler o nivo kominate.

Pou en mannyer ki nou fer sir ki tou dimoun i angaze ki nou pa kit personn deryer. Lo sa lot pwen wi, an plis ofet *PS* pe *remind* mon la nou pe al *well* nou’n konmanse pou kontinyelman fer en bazar kot Domenn Artizanal Val De Pres

ki zisteman kot piblik - Seselwa konman etranze a ganny sans ganny akse ek sa bann travay artizanal, bann travay lar, ki i ava anmenn serten benefis ekonomik osi. Lo sa lot pwen mon ava petet demann *PS* pou reponn silvouple.

### **MR SPEAKER**

Mersi Mr Andre. *PS* kontinyen *please*.

### **PERMANENT SECRETARY** **CECILLE KALEBI**

Mersi Mr Chair. Onorab ou ti pe refer to *program 1* pou sa *Board fees or ...?* *SP1*. Sa i pou nouvo *Advisory Board Culture Institute* ki'n ganny met an plas. Mersi.

### **MR SPEAKER**

Wi Onorab.

### **HON EGBERT AGLAE**

Yes mersi *PS* e Sekreter Leta. Dan menm laliny ki larepons ki Sekreter Leta in donnen lo size mon ti a swete petet ki mon konnen Domaine De Val De Pres i dan *center* li menm, me la nou pe koz en pti gin lo *desantralizasyon* en pti gin, akoz pa tou ki ganny sans pou ariv laba.

So baze lo sa eski zot pe mazin dan lefitir avek sa bann groupman artizan, petet pou

donn en *expression of interest* pou tel sit mon annan tel lokasyon louvertir pou kapab vin avek ou prodwir pou ou met - Sa i bann keksoz ki nou swete war kot i konsern artizan dan desantralizasyon. Mersi.

### **MR SPEAKER**

Thank you. SG vitman silvouple.

### **SECRETARY** **GENERAL** **DAVID ANDRE**

Wi i en bon lide, i en bon sizesyon. Mon a fer zot rapel poudir toulstan mon'n dir kiltir i biznes tou dimoun. Fodre pa nou regard kiltir zis pou Lenstiti Kiltir oubyen zis kekfwa kot Domaine De Val De Pres kot i annan aktivite.

E nou, nou vizyon osi se pou fer sir ki dan tou kominote kiltir i vivan e bann kominote artistik kiltirel i vivan. E nou anvi ki dimoun i pran sa *ownership* osi. Donk definitivman letan sa i arive la nou pou santi en keksoz ki vibre o nivo artistik o nivo kiltirel dan nou pei.

Akoz nou, nou anvi ki dimoun i pran sa sans apartenans dan nou kiltir e fer keksoz pou ki evidan ki tanzib kot dan kominote antye nou ava war sa bann rezulta.

Definitivman mon dakor avek ou.

**MR SPEAKER**

*Thank you.* Onorab Samynadin.

**HON KELLY SAMYNADIN**

Mersi Mr Chair. Bonn apre midi SG, PS e zot delegasyon. E bonn apre midi tou dimoun a lekout. Kreol i en laspe gran dan nou kiltir e dan zot *current challenges*, mon war ki zot in site ki zot pe ganny bann kontrent lespas an sa ki konsern bann fasilite kiltirel, ki lye pou bann devlopman kiltir ek lar. Dan sa direksyon mon ti a kontan ganny en kontrandi petet lo travay renovasyon lo St Joseph kot ansyen Lenstiti Kreol ti sitye.

E petet ki bann rezon pou lakoz retar dan travay, ki pou byensir ede dan en serten fason an sa ki konsern sa *issue* lespas.

Dezyenmman, parmi zot bann priyорite stratezik, mon war ki zot pe anvizaze promot lekselans dan resers lengwistik e kiltirel lo nivo nasyonal e enternasyonal.

Mon ti a kontan dan ki fason oubyen ki bann stratezi ki zot pe mazin servi pou fer sa? Ki kalite sinerzi ki i annan ant Lakademi Kreol Sesel avek lezot

partner, ki zot osi zot in *mandate* pou travay anver devlopman, resers e promosyon lalang Kreol, tel ki lenstiti pou resers lo lalang Kreol ek Kiltir kot *Unisey?* Mersi.

**MR SPEAKER**

Mersi. *Panel*, sinal mon lekel ki reponn. Yes Mr Andre.

**SECRETARY GENERAL DAVID ANDRE**

Mon a konmans en bout. Mersi bokou Onorab pou ou kestyon. Pou *Maison St Joseph* i annan travay ki'n konmans ganny fer mon ava petet demann PS pou elabor lo la en pti moman i annan tou bann detay. Epi o nivo ekselans lengwistik Kreol, mon kontan ou'n fer sa pwen akoz i enportan ki nou gard nou idantite Kreol, nou lalang Kreol en?

E mon kontan par egzanp ki nou Lasable par egzanp nou, nou koz an Kreol e bokou aktivite i ganny fer an Kreol. E sa en fason pou nou fer sir ki nou lalang Kreol i reste vivan. E nou Lakademi Kreol Seselwa, Sesel i sa lenstitisyon ki fer sir ki sa, sa langaz i reste e i ki i kontinyen parmi tou nou, nou pep antye bann zenn Sesel nou tou annan lasans pou nou kapab koz trwa langaz byen Kreol, Angle e Franse.

I annan menm bokou i koz lezot langaz osi e pou mwan sa i en keksoz ki formidab en keksoz ki nou devret ankouraze. E i annan travay ki pe ganny fer avek Lakademi Kreol pou fer sir ki nou sofgard nou langaz. E i annan bann materyel pedagozi ki osi literer, pou fer sir ki sa i i ganny - i reste vivan. Mon pas avek PS petet pou elabor lo sa lot pwen silvouple.

### **MR SPEAKER**

PS silvouple.

### **PERMANENT SECRETARY** **CECILLE KALEBI**

Mersi Mr Chair. Mersi Onorab pou ou kestyon. Sa ki konsern Maison St Joseph travay pou konmanse desito sa semenn. En pe retar ki'n gannyen dan proze se enn nou ti bezwen retir en pe nou bann *furnitures* ki nou ti annan.

E osi fer en pe netwayaz akoz nou pe bouz lokasyon so sa in pran en pe letan pou fer. E an menm tan osi finaliz lagreman avek lakonpannyen IDC pou nou *PPP Project* pou son renovasyon.

So sa pe demare la e mon mazinen konmansman lannen prosen nou a konmans war bann travay en pe entans lo la, pou sofgard sa batiman. I

enportan pou note ki batiman pou ganny restore dan son ki mannyer ou kapab dir dan son totalite, e osi bann lezot servis ki pou ganny anmennen dan sa batiman mon krwar pou vreman lev, lev sa re anmenn sa, sa landrwa parey i ti ete avan.

Si mon kapab azout en pti bout Mr Andre, lo kote pou sa ekselans resers, la i deza annan en bon pe travay ki nou pe fer avek seksyon *Unisey* lo kote lekselans pou resers.

Zis dernyerman pou Festival Kreol nou'n lans nou *folklore database* ki ti en travay konzwent avek sa seksyon e nou seksyon Lakademi Kreol e Seksyon Resers. Pou anmenn nou bann zistwar *folklore* lo en platform ki dimoun i kapab akse. So, sa enn nou bann proze ki nou pe travay lo la.

E osi pou annan bann lezot nou'n osi siny *MOU* pou regarde ki mannyer nou kapab entansifye e formaliz nou Lagreman ek *Unisey*. Mersi.

### **MR SPEAKER**

Mersi. Onorab Gill.

### **HON CHURCHILL GILL**

Mersi Mr Chair. Bonn apre midi PS. Mon premye kestyon se ou de dernyen *bullet* anba '*major achievements*' i annan de

don pou an Dolar ki tonm environ R1.7milyon. Si ou kapab eksplik nou sa de don ti annan bann, bann serten travay spesifik ki ti'n rezon ki ti'n ganny donnent.

Si ou kapab donn nou en update kwa ki'n ganny fer anba sa donasyon ki ekivalan R1.7milyon?

Mon dezyenm pwen se i annan serten sipor ki pou le moman artis Praslin pe gannyen e dan sa Bidze mon pe gete si i annan provizyon pou en pti ogmantasyon dan sa ki zot gannyen ki zot pe gannyen an se moman? Mersi.

### **MR SPEAKER**

Mersi Onorab. *Panel?*

#### **SECRETARY DAVID ANDRE**

Mersi Onorab. Mon ava demann *PS* pou donn ou sa bann detay silvouple. Mersi.

### **MR SPEAKER**

*PS* ou annan laparol.

#### **PERMANENT SECRETARY CECILLE KALEBI**

Mersi Mr Chair. Mersi Onorab pou ou kestyon. Ok sa de proze i enn ki tonm anba en, en fon pou diversite kiltirel e sa fon li i pe koz lo regard ki mannyer Sesel i kapab re anmenn kiltir

pou vin o sant devlopman ekonomik e sosyal.

Alors sa proze i annan de faz - en premye faz ki pou vin en vin fer levanter lo bann lendistri kreativ ki egziste Sesel. E osi propoz ek Gouvernman okenn gap dan Lezislasyon ki annan e bann stratezi ki nou kapab fer pou fer sir ki nou kapab met lendistri kreativ a leker devlopman kiltirel Sesel.

An se moman travay in konmans fer avek sa, sa fon ki tonm anba *Unesco*. Nou'n deza fini selekte nou bann konsiltan ki nou espekte konmansman byen boner lannen prosen zot pou dan pei, pou konmans sa travay avek nou bann, nou bann eksper lokal.

Lot proze i en proze enteresan nou'n ganny *funding* anba en fon ki apel pou *Aschberg Funding* e sa proze li i pou regard stati bann artis Sesel. E regarde ki bann osi gap i annan dan bann Lezislasyon e ki bann proteksyon nou, nou kapab anmennen konman lenstiti ; pou ede ki bann artis ek bann ki nou dir *cultural practitioners*, zot kapab kontinyen ganny rezouir bann proteksyon e osi devlopman ki zot kontinyen reste dan sa metye.

E li osi proze in fini demare - nou'n - ti annan de faz

nou ti bezwen selekte bann konsiltan lokal e sa nou'n fini ganny fer e *Unesco* li in selekte son konsiltan enternasyonal ki pou vin isi, pou vin ed nou osi pou devlop kekfwa en Lezislasyon ki pou, pou regard bann artis Sesel. E nou espekte zot osi byen boner lannen prosen sa bann konsiltan ava dan pei pou konmans travay ek nou bann eksper lokal. Mersi.

### **MR SPEAKER**

Ti annan son pwen lo arsiv Praslin - mon pa konnen si...

### **PERMANENT SECRETARY** **CECILLE KALEBI**

Artis.

### **MR SPEAKER**

Wi.

### **PERMANENT SECRETARY** **CECILLE KALEBI**

Artis Praslin. Annefe anba programm 3 i annan bann don ki, ki nou donnen e sa i depan lo ki bann programm ki bann Lasosyasyon Artis i anmennen. E alors kekfwa mon ava ankouraz Lasosyasyon bann Artis Praslin pou zot get zot proze an totalite e vin fer en diskisyon avek *National Arts Council* lo ki mannyer zot kapab get zot proze ek zot *funding* ki sa lasosyasyon - *I mean* ki nou

donn lasosyasyon pou zot devlopman. Mersi.

### **MR SPEAKER**

Yes Mr Andre?

### **SECRETARY** **GENERAL** **DAVID ANDRE**

Mersi. Zis mon ti a kontan azoute lo sa proze *Aschberg* en stati artis, enn bann rezon prensipal ki mon ti a kontan tou dimoun i konpran byen, sirtou zot bann dimoun ki dan Lezislasyon ek bann artis osi, nou bann artis Sesel - par egzanp konman en mizisyen mon konn tre byen - bann dimoun pe fonksyon en pti pe lo zot menm, zot fer en - brikol en pti pe zafer zot menm.

Kan tousala i en metye. Letan ou en artis ou metye se pou fer ou lar, ou devlop ou lar, ou en mizisyen ou konpoze, ou fer ou sanson. I annan dimoun ki li son biznes i dan *studio recording - engineering*, epi i annan lot li ki dan prodiksyon ;- ki dan ou konnen i tou en levantay metye ki egziste e ki nou anvi war devlope Sesel.

Pa sa dimoun ki pou zwe son gitar li menm li i pou al dan *studio* li menm, li menm li i pou fer *marketing* li menm, eksatera. Donk i enportan ki nou konmans konpran sa

peizaz artistik ki mannyer i fonksyonnen.

E i annan en eleman tre enportan ki nou bezwen osi fer atansyon, se sa kote propriete entelektyel. E sa dan li menm i kapab kontribye en bon pe pou anmenn reveni pou bann artis. E fodre son striktir an plas i byen pou fer li devlope se *basically* sa ki nou pe koz lo la. Mersi.

### **MR SPEAKER**

Mersi. Wi Onorab si ou annan klarifikasyon?

### **HON CHURCHILL GILL**

Mersi PS pou ou bann larepons. Tre kler mon krwar bann dimoun konsernen in kapab swiv byen. Mersi osi. Lo en plan lonterm - akoz pou bokou aktivite artistik i ganny devlope i ganny konsantre lo Mahe - lo en plan lonterm mon konnen i pa dan sa Bidze selman mon pe propoze ki nou konmans reflesir pou desantraliz en pe sa.

An menm tan lo kote lenfrastriktir Mahe nou konnen nou annan landrwa ki artis i kapab ale fer zot bann *show me* Praslin nou napa. So pou lonterm petet konmans reflesir lo la, ki sa bann tel facilite i a kapab osi *available* lo dezyenm zil pli gran. Mersi.

### **MR SPEAKER**

Mersi. Ou annan rekomandasyon la? Mr Andre ou ti a kontan donn en parol?

### **SECRETARY**

### **DAVID ANDRE**

Wi mersi Mr Chair. Mon byen kontan ki Onorab in fer sorti sa pwen definitivman sa i nou konsern e parey mon'n eksplike letan nou pe koz stati artis, i annan dimoun bann *business people* ki kapab antre dan sa zwe, ki kapab kree bann lespas, bann landrwa kot zisteman zot kapab kontribye pou partisip ladan. Akoz i annan osi en kote ekonomik.

So mon ti a kontan ki bann biznes partou lo Mahe, Praslin, La Digue i donn en koudmen pou antre. Akoz i annan keksoz enportan ki nou kapab fer ladan. Mersi.

### **MR SPEAKER**

Mersi. Onorab Monthy.

### **HON PHILIP MONTHY**

Mersi Mr Chair. Bonn apre midi. Bonn apre midi Mr Andre ek ou delegasyon. Premye kestyon, dan son ladres Bidze Minis Finans ti mansyonn 50milyon pou konpansasyon *fungus*, pou bann dimoun ki'n

ganny afekte kot Minister Lasante ek Ledikasyon.

Me dan mon distrik mon annan de zabitant ki ti travay ek Lenstiti Kreol e zot konsernen akoz pa'n nonm sa - in nonm Ledikasyon ek Lasante.

So zot pe ekoute la ki garanti zot osi zot pou ganny enkli dan sa group, ki pou ganny konpansasyon akoz en pe letan zot pe espere? *Ok sa i premye kestyon?* Dezyenm kestyon ler mon get zot *bullet points 5 lo strategic priorities 2023-2025 "acquire repatriate and restore art works."*

Mon fek pe annan en konversasyon de semenn pase avek en artis prominan isi. Ler mon dir artis i en pent e skilptre. Son konsern sete ki bann meyer travay nou bann artis pe kit pei i pe ale, *ok?*

E plizyer zot pe ariv lo laz ki byento petet zot pou retrete zot pou aret fer sa bann aktivite. E i annan en nesesite pou kree en fon, pou ki nou aste serten travay sa bann artis pou mont en koleksyon nasyonal pou pei, ki pli tar nou a kapab eksposz sa bann *art works* pou bann zenerasyon ki vini i a war.

I a war, sa i en travay Mr Leon Radegonde, sa i en travay Mr Egbert Marday. So eski dan Bidze i annan provizyon, pou ki nou konmans aste serten sa

bann travay, pou ki pli tar i a nou a kapab mont en koleksyon nasyonal pou pei? Mersi.

### **MR SPEAKER**

Mersi. *Panel?*

### **SECRETARY**

### **DAVID ANDRE**

Mersi Onorab. Mon ava konmans avek ou dezyenm kestyon, epi mon ava koz en pti pe premye e *PS* i ava elabore. Wi definitivman i annan en bezwen, akoz i enportan ki nou annan en koleksyon nasyonal.

E sa ki nou a kapab dir ou se ki i annan serten larzan dan *Creative Seychelles Agency* ki met akote, pou nou kapab *acquire* serten travay pou nou mont sa *National Art Gallery*.

E osi dan, dan *institute*, i annan osi provizyon pou annan sa ki nou apel en *National Culture Fund*, kot nou kapab ganny serten finansman avek serten Lazans, swa Sesel swa aletranze, pou kapab permet nou fer sa bann travay parey pou nou prezerv nou, nou bann *art work* eksetera e bann artis.

Donk sa i dan nou Lalwa e nou bezwen fer an sort pou nou tap serten laport bann *donors*, akoz i annan bann lasosyasyon, bann lorganizasyon internasyonal konman lokal, ki pare pou donn en koudmen.

### **GENERAL**

Akoz i annan dimoun *out there* ki vreman enterese pou fer sa.

E sa i vreman enportan nou bezwen, nou bezwen, nou bezwen fer an sort ki nou, nou gard sa. Nou pa kapab les tou nou bann *art work* kit Sesel ale. E tou an dizan sa osi i annan parey nou pe koz lo sa *statue* artis i annan bann provizyon dan novo Lalwa ki pou ganny diskite ki nou pe met devan, kot letan en *art work* i ganny vann, i annan serten drwa osi ki ganny retenir avek bann pou bann artis. Tousala i annan bann prosedir ki kapab ganny fer ki nou pe pou travay lo la.

An se ki konsern konpansasyon *fungus* sa ki mon kapab dir ou se ki mon osi mon okouran ;- i annan bann dimoun in vin kot nou. E nou'n fer serten travay lo nou kote e sa ki lenformasyon ki mon kapab dir ou se ki Gouvernman i dakor - anfen i pare pou pey serten konpansasyon bann dimoun ki pa ankor ganny konpansasyon.

Me etandonnen ki annan serten kontrent finansye, sityasyon ekonomik i pa'n permet ki nou kapab pey sa bann dimoun. E me Gouvernman in fer en *commitment* ki *du moment* ki Minister Finans i ganny fon

neseser, sa bann dimoun pou ganny peye.

So mon kapab demann Madanm Tamatave kot Minister Finans pou zis elabor en pti pe lo la silvouple. Mersi.

### **MR SPEAKER**

Mersi. Ms Tamatave ou kapab azoute?

### **COMPTROLLER GENERAL ASTRID TAMATAVE**

Mr Chair mon kapab zis konfirm sa ki SG in fer i annan tou bann *case pending* konpansasyon, ki nou pe travay lo sa lalis ki enkli bann travayer Kiltir tou.

E parey SG in dir letan fon apropriye i ava *available*, peyman le neseser ava ganny fer. Mersi.

### **MR SPEAKER**

Mersi Madanm. Onorab Vidot.

### **HON AUDREY VIDOT**

Mersi Mr Chair. Mr Chair zisteman mon pou konmans lo sa *issue* konpansasyon. Nou santi poudir nou le konnen petet lo ki baz Gouvernman lo kote priyrite ki zot in baz pou donn konpansasyon.

Akoz nou konnen sa *issue* *fungus* ti *way back*, e ti annan omwen *at least* kanmenm par porsyon sa bann dimoun ti a

konmans omwen ganny en morso zot konpansasyon?

Dezyenmman mon le demann lo kote bann *new Scheme* pou bann travayer *Archive* - mon konnen ti deza annan travay ki ti'n ganny fer lo la, ki'n arive avek, si *PS* i kapab eklersi nou?

Lo sa pwen ki Onorab Esparon in fer sorti pli boner *PS*, an referans avek bann sit nasyonal ki nou war pe ganny avarye petet si i annan bann nouvo devlopman ki kapab ganny fer. Nou konnen i annan serten landrwa ki annan serten rezistans. Mon pou demande petet mon konnen zot annan en rikord petet an term portre, sa bann sit en pe lenformasyon lo la.

Mon demande petet pou kordin avek en pti pe avek Gouvernman Lokal, ti ava byen ki bann omwen i annan en landrwa parey dan bann Administrasyon Distrik, ki i annan en listwar bann portre, bann lankadreman kot dimoun i kapab war bann sit nasyonal petet ki annan dan sa distrik respektif.

E osi parey nou konnen, si i annan serten landrwa kot i annan difikilte, kot pou parey i annan pou fer devlopman, redevlopman si i enportan ganny tou dimoun *onboard* pa

zis sa ki pe al fer sa bann devlopman.

Me osi reprezantan kot Kiltir byensir, pou war ki mannyer nou kapab wi nou prezerv sa sit. Me si i annan en devlopman ki kapab ganny fer pou benefis sa kominote, akoz petet limit, limitasyon teren, me i annan sa bout laspe kot sa listwar pa perdi.

*At least*, en morso dan sa devlopman i montre listwar sa landrwa, pou ki sa distrik osi i war *value* son leritaz ki i pa'n perdi lo la. E finalman mon war i annan en sa lannen zot in met larzan pou bann fasilite levensman, eski zot annan bann *major event* ki zot pe konsidere fer 2023? Mon konnen akoz *Covid* zot pa'n kapab met sitan dan 2022.

Me kwa vreman ki zot pe mazin touse, ki mon war sa sonm R700ekek mil ki zot, ki zot in mete? Mersi.

### **MR SPEAKER**

Mersi. *Panel* i annan plizyer pwen la annou sey fer li vitman silvouple.

### **SECRETARY**

### **DAVID ANDRE**

Mersi bokou Onorab. Mon sa bann kestyon ki ou'n demande mon krwar *PS* i mye plase akoz i annan tou bann detay, i ava

### **GENERAL**

pou facilite, i ava reponn ou kestyon. Mersi.

### **MR SPEAKER**

PS.

### **PERMANENT SECRETARY** **CECILLE KALEBI**

Mersi Mr Chair. Mersi Onorab pou ou kestyon. Onorab premye kestyon lo kote *Scheme Archives* wi, ti annan travay ki ti'n deza konmanse pou revwar *Scheme Archives*.

Me parey ti anonse lannen pase dan Bidze pou sa lannen, napa okenn nouvo revizyon *Scheme* ki pe pran par. So nou *still* pe travay lo sa revizyon e nou a fer le neseser pou nou anvoy kot *PSB* pou - akoz zot ki *still* regard revizyon bann *Scheme* e nou a konmans en dyalog lo sa kote.

Mersi pou sa sizesyon lo kote sit nasyonal e Gouvernman Lokal, mon krwar i en sizesyon ki byen ki bon i ti ava osi lev en pe bann sant kominoter pou ler bann dimoun i antre i war bann sit ki annan dan zot distrik. Nou ava *link* nou de seksyon ki travay lo bann *site management* ek prezervasyon sit avek seksyon Gouvernman Lokal pou regarde ki mannyer nou kapab travay lo la.

Mon osi *aware* ki Gouvernman Lokal ti pe travay lo bann brosir lo sak bann distrik, so nou a regarde si deza sa travay in avanse ki *input* nou osi nou kapab fer ladan, ki nou ava elev sa kote kiltir ladan.

### **MR SPEAKER**

Mersi. I annan pwen ki pa'n ganny adrese Onorab?

### **HON AUDREY VIDOT**

Wi Mr Chair. Ti annan zis spesifikman lo kote petet Finans i kapab dir nou, kwa ki'n fer Gouvernman petet annan sa lapros petet bann dimoun ki lontan lo konpansasyon ki zot pa'n ni en morso en poursantaz ki'n ganny benefis ladan, apre ti ava fer li lot faz.

E dezyenmman konsernan *Scheme*, wi *PS* eski ou kapab asir nou ki petet plis presyon ki omwen *at least* revwar lot kar lannen, ki bann *Scheme* i kapab ganny konsidere. Mersi.

### **MR SPEAKER**

Mersi. *Panel* eski Madanm Tamatave i kapab adres kestyon priyorite premye?

### **COMPTROLLER GENERAL** **ASTRID TAMATAVE**

Mersi Mr Chair. Mr Chair premye legzersis ki ti ganny fer pou bann travayer Kiltir ganny konpansasyon, sa in fini ganny peye. So sa dezyenm legzersis kot i annan bann dimoun ki pa ti dan sa premye *claim*, zot tou zot pa ankor ganny sa *settlement*.

E sa sonm i ase signifikan ki i aepre i pros 75poursan *the provision of Contingency Appropriation Fund*. So i en sonm ase signifikan.

So avan ler nou fer okenn komitman kan ki sa larzan pou ganny peye avek sa bann travayer, nou bezwen regard lespas fiskal. Mersi Mr Chair.

### **MR SPEAKER**

*Thank you.* Nou a kapab *move on?* Mersi. Onorab Roucou.

### **HON MICHEL ROUCOU**

Mersi Mr Chair. Bonn apre midi ankor. DG si ou kapab dir avek ou, annefe anba *Creative Seychelles* parey ou'n dir nou annan bann pti artis ou kapab dir ki zot, zot kot lakour zot pe fer bann pti desen.

Be selman pou zot i vreman difisil. I vreman difisil pou zot ganny landrwa pou zot *display* zot louvraz. E petet zot menm zot anba bann promosyon ki zot pe fer, petet pou zot kapab revwar en pti pe,

ki zot osi zot kapab ganny sa loportinite pou zot vin devan zis parey mon kapab mazin Antonia Tirant avek Mr Claude Vidot dan mon distrik.

Ki zot vin sey vin devan pou zot kapab vin promot en pti pe zot bann lar ki zot pe fer. Mersi.

### **MR SPEAKER**

Mersi. *Panel* lekel ki kapab adres son pwen ? Mr Andre.

### **SECRETARY DAVID ANDRE**

Wi mersi Onorab. Pou reponn ou kestyon i annan ofet - i annan plizyer lespas en ki nou kapab ki bann dimoun si oule fer legzibisyon i annan sifi ki zot ganny kontak avek nou, nou kapab organize.

Me sa ki mon kapab dir ou se ki i annan en nouveau galeri osi ki pe al ouver byento an Desanm la kot Domaine De Val De Pres en? Kot restoran Pomme Cannelle nou'n amenaz en lespas anba, kot nou pe tourn li konman en galeri so i ava en lot lespas adisyonnel kot ,okenn artis ki le fer legzibisyon i kapab servi.

Me selman si i annan okenn lezot artis oubyen lezot landrwa ki *available* letan bann dimoun i fer zot legzibisyon nou, nou pare la pou facilite.

E nou, nou pou trouv en solisyon e trouv en landrwa pou fer sa. Akoz i enportan ki bann dimoun i ganny en sans pou egzibit zot travay. Mersi.

**MR SPEAKER**

*Thank you Mr Andre. Onorab Gabriel.*

**HON CONRAD GABRIEL**

Mersi Mr Chair. *Welcome SG ek ou delegasyon. Mon dir bonn apre midi tou dimoun a lekout. Premyerman zot ‘other uses of goods and services’ depi program 1 ziska program 6 i annan ‘facilities for events.’*

Mon remarke ki i annan signifikan larzan ki zot in met dan sa bann programm, si zot kapab donn Lasanble en pe detay petet ki zot anvizaze kisia bann aktivite? Premye bout?

Mon dezyenm pwen se ki *museum* mon’n remarke ki petet dan wikenn i *dull*, i frenmen si mon pa si ou a koriz mwan *DG* dan wikenn i *close*. Mon krwar zot pe prozekte pou anmas 380mil, 383mil pou lannen 2023.

Mon panse avek sa logmantasyon *tourism boom* ki pe annan dan pei, Sanmdi pase mon’n zwenn en group kliyan ki ti pe enterese pou *vizit museum* malerezman i ti fermen. Eski

ou al devan ki zot pe fer pou wikkenn *at least ouver museum* an menm tan i ava anmenn reveni pou pei an zeneral? Mersi.

**MR SPEAKER**

*Mersi Onorab. Panel.*

**SECRETARY GENERAL**

**DAVID ANDRE**

Wi mersi bokou pou ou kestyon. Mon ava demann *PS* pou reponn sa. I annan tou bann repons pou sa pou ou kestyon.

**MR SPEAKER**

*PS, yes mersi.*

**PERMANENT SECRETARY**

**CECILLE KALEBI**

Mersi Mr Chair. Mersi Onorab pou ou kestyon. Nou a pran lo kote *facilities for events*, sa lannen Sesel osi pe pran par dan *Jeu De La Francophonie* alors i annan en, en Bidze ki nou’n mete pou sa vole kiltir ki tonm anba nou lensiti. So sa i en bout sa larzan ki’n ganny mete dan *facilities for events*.

Apre avek retir restriksyon pou fer bann aktivite *gathering* nou pe retour en pe nou bann aktivite tradisyonnelle ;- parey zot in fek war nou’n fer lafet moutya, nou pou annan Festival Kreol, nou

osi annan bann novo aktivite ki nou pe anmennen ki viz ver lendistri kreativ. Parey en *film festival, arts festival.*

So pou annan pa mal aktivite ki pou pe ganny fer pa zis lo Mahe be Praslin ek La Digue osi.

Resaman nou'n fer Praslin  so sa pou kontinyen lannen ki pe vini. Apre osi nou annan bann aktivite ki nou komemor bann lazournen enternasyonal parey Lazournen Mize, Lazournen Sit e Moniman. So tou sa, sa fon i pou *cater* en pe pou sa bann, sa bann aktivite.

Lo kote repet ou lot kestyon a lo kote mize wi Onorab pou mize i ouver Sanmdi ziska 2er, apre nou fermen. Me selman parkont ler nou ganny bann group oubyen nou bann notifikasyon ki pou annan osi *cruise ship* dan pei, nou aranz en pe nou bann ler louvertir.

Enn nou bann kontrent pou ouver ziska Sanmdi, Dimans se nou kontrent *staff* akoz nou *staff* i travay, i pou travay Lendi ziska Dimans.

E ler ou pou fer ou pou rann zot en, en zour off i toulstan pou annan enn de balansman, so sanmenm sa ki nou kit Dimans konman en zour ki

*staff* osi i ganny letan pou zot repose e reste ek zot fanmir.

Me selman parey ou dir si i annan possibilite pou nou revwar nou bann ler louvertir, bann fason fonksyonnen, sa nou ava asiz ansanm e revwar. Mersi Onorab.

### **MR SPEAKER**

Yes Mr Andre.

### **SECRETARY**

### **DAVID ANDRE**

### **GENERAL**

Mon ti a kontan osi zis azoute akoz sa konsern *ki ou'n leve i en konsern* *ki mwan personnelman mon ganny bann kestyon.*

E i annan en osi en *requirement* pou bann mize, ki i annan en moman ki nou bezwen fermen pou netway sa bann *artifacts*, akoz pa nenport ki dimoun i kapab - *I mean* pa nenport ki *cleaner* ki kapab vini pou vini pou tous sa bann keksoz pou netwaye.

Donk i annan bann *staff mize* ki zot bezwen zot pran serten letan pou zot netway sa bann keksoz, pou zot reste an bon leta. Donk se pou kwa par egzant nou, nou ouver Sanmdi bomaten ziska 2er, epi Lendi i ouver selman zis bomaten ziska midi. E apre midi i ganny servi pou zisteman fer sir ki sa bann *artifacts*, sa bann keksoz i

ganny netwaye pou konformeman avek tou bann regilasyon mize.

So si dimoun i konnen kekfwa sa bann lenformasyon i kapab pa tro vizib pou piblik, nou ava fer li pli vizib pou dimoun i konnen beh vwala enn bann rezon akoz sa. Mersi.

### **MR SPEAKER**

Mersi. Onorab Woodcock.

### **HON WAVEL WOODCOCK**

Mersi Mr Chair. Bonn apre midi *Mayor* ek ou delegasyon tou Manm e tou dimoun a lekout. Minis mon kestyon i baze lo program 4, lenstiti i annan manda pou *preservation of heritage assets*.

E i annan en size ki a plizyer repriz dan lepase, mon'n diskit avek *Heritage Foundation*, me ziska prezan napa nanryen ki'n ganny fer. Sa i lo kote sa sel Moniman Lendepandans ki nou annan Sesel ki baze dan mon distrik Grand Anse Praslin, ki en pe letan mon pe demande, pou fer travay renovasyon lo la.

I annan serten travay kosmetik ki *Local Government* in fer lo la, me selman i merit i nesesit en travay pli konpreansiv lo sa moniman ki baze Grand Anse.

E dezyenmman, mon lot kestyon i baze lo zot *current challenges* kot zot in koz lo "inadequate space for cultural facilities for development and promotion of culture and the arts." E zot osi fer resorti ki i annan en problem "challenges of maintenance of cultural infrastructure and development of new ones to provide a variety of cultural services."

Now mon konsern se ki lo Praslin i napa sa lespas, landrwa kot bann artis i kapab display montre zot travay. Me an se moman i annan en negosyasyon ant plizyer Minister, sirtou ki enkli Minister pou Lantreprenarya ek Lendistri, kot i konsern sa sit vizavi *Erport Amitie* kot pou fer bann kyosk.

E i annan diskisyon osi pou enstal pou fer en galeri la. Mon kestyon eski zot in ganny *involve* dan diskisyon pou devlop sa site, akoz i ase gran i annan lespas kot nou fer bann show mizikal - eski zot in zot osi zot in ganny enkli dan bann diskisyon, pou gete ki manyer nou kapab vin ansanm?

Akoz nou osi antre dan partnership avek bann lezot dimoun dan antre dan *PPPs* avek bann biznes.

Eski zot osi zot in *involve* dan sa diskisyon, akoz i en site

ki vreman nou annan lespas pou nou fer en keksoz pou benefisy bann artis lo Praslin. Mersi.

**MR SPEAKER**

*Thank you Onorab. Panel lekel? Mr Andre?*

**SECRETARY****DAVID ANDRE**

Wi mersi bokou pou ou kestyon. Pou sa premye bout lo kestyon moniman Lendepandans, mon pa tro sir lekel moniman ki ou pe koz lo la letan ou pe dir moniman Lendepandans silvouple?

**HON WAVEL WOODCOCK**

Ok moniman nou Lendepandans le 29 Zen 1976 ki zis o bor bazar Grand Anse. I sel moniman ki nou annan PS mon krwar o bor i pou konn tre byen sa moniman. Me i en keksoz ki mon'n deza met devan Lasamble pou plizyer lannen. Avan zot pa ti enterese zot ti enterese avek Zomm Lib, me selman nou bezwen rekonnnet en moniman ki sinifye en dat enportan dan listwar nou pei. Mersi.

*(Interruption)*

**MR SPEAKER**

*Thank you, silvouple, silvouple montre respe zot tou montre respe, enkli ou Onorab Pillay. Panel ou'n pare pou reponn sa?*

**SECRETARY****DAVID ANDRE**

Mersi Mr Chair. *Well* sa ki mon kapab dir ou la se ki nou a kapab al Praslin, e ansanm avek ou, avek ou lekip, nou a war e nou a evalye e nou a regarde ki nou kapab fer. Parske definitivman si en keksoz ki bezwen ganny, ganny prezerve nou ava fer li nou, nou devwar pou fer sa.

Apre lo sa lot kestyon si nou ganny *involve* dan sa devlopman, ki ou pe dir proze mon pa okouran mon PS osi mon krwar pa si i okouran, so mon pa tro konnen. Petet si ou kapab donn en pe plis lenformasyon lo lekel ki pe *spearhead* sa proze, e ki mannyer nou kapab travay an kolaborasyon. Definitivman nou pare pou zwenn avek zot. Mersi.

**MR SPEAKER**

Bon - si Madanm Kalebi ou pou annan okenn keksoz pou azoute lo la oubyen nou a *move on* apre Onorab i a *follow up* si i bezwen? Tre byen kot nou ete la Onorab Uranie.

**HON ROCKY URANIE**

Mersi Mr Speaker. Bonn apre midi Mayor avek ou novo delegasyon. Mon ti anvi konnen lo ladans lekol La Digue, kot bann zenn i anvi konnen zot pe *perform* tre byen, mon al get zot en ler kot zot pe antrennen.

Mon war difikilte ki zot gannyen akoz zot pe fer sa dan laklas zot bezwen tir tou bann sez latab redi e lespas i vreman limite. E la mon ti anvi konnen ki sipor enn premye finansyel en keksoz ki zot pe donn lenstriker pou fer sir ki zot, zot toulstan prezan lo nou zil pou montre sa bann zanfan ladans. E osi ki sipor zot pe donn nou lekol ladans li menm, ki zot reste relevan pa zis lo La Digue me osi lo nivo nasyonal. Mersi.

**MR SPEAKER**

Mersi. *Panel?*

**SECRETARY****DAVID ANDRE**

Wi Onorab. Provizyon in ganny fer dan Bidze pou fer sir ki nou siport sa program lo La Digue i tre enportan e osi nou pe menm mazinen lo ki mannyer petet nou kapab form serten dimoun ki ti ava enterese lo La Digue, menm pou kapab ede osi, olye ki toulstan pe *rely* lo dimoun sorti Mahe pou mont La

**GENERAL**

Digue oubyen Praslin, *for that matter*; ki annan serten programm pou nou fer serten, serten formasyon kot dimoun i kapab fer serten aktivite. Me selman provizyon in ganny fer pou nou ed zot definitivman. Mersi.

**MR SPEAKER**

*Thank you SG. Onorab Zailor.*

**HON NADDY ZAILOR**

Mersi Mr Chair. Bonn apre midi. Bonn apre midi SG ek PS. PS mon'n tann ou koz lo bann diferan *grant* ek proze. Mon konnen sa lannen ti annan en proze ki zot departman ti anbark lo la pou fer site nasyonal vin aksesib. E sa ti konmans par *Mission Lodge* mon pe zis regarde si lannen prosen sa proze pou kontinyen e si zot in idantifye lezot sit? Mersi.

**MR SPEAKER**

*Thank you. Panel.*

**SECRETARY****DAVID ANDRE**

Mon ava demann PS pou reponn sa kestyon.

**GENERAL****MR SPEAKER**

*PS, mersi.*

**PERMANENT SECRETARY**  
**CECILLE KALEBI**

Mersi Mr Chair. Mersi Onorab pou ou kestyon. Wi i en keksoz ki annefe nou le fer sir ki tou nou sit i vin aksesib - pa zis osi nou bann site me bann lenfrastriktir kiltirel, bann novo lenfrastriktir kiltirel ki nou antre ladan.

E sa proze pou fer aksesibilite pou tou i form parti nou manda. I dan nou *Act e* sa i pou kontinyen.

Lo kote si nou'n idantifye okenn novo sit, sa mon pou napa lenformasyon an se moman. Me selman firanmezir ki bann proze i devlope, nou ava met sa lenformasyon a, a zot laporte. Me selman i enportan poudir ki even dan renovasyon Libreri Nasyonal, nou'n osi war ki fason nou pou fer sa batiman aksesib a tou nivo.

Akoz avan ti annan serten kontrent pou donn aksesibilite bann dimoun ki vizit libreri. Nou'n fer sa kot Mize Nasyonal ki dimoun i kapab akse tou lede nivo. E alors nou pe fer en zefor kontinyel pou asire ki nou bann sit e nou bann facilite kiltirel i accessible pou tou dimoun. Mersi Onorab.

**MR SPEAKER**

Mersi. Onorab Pillay.

**HON SEBASTIEN PILLAY**

Mersi Mr Chairman. Bonn apre midi Sekreter Zeneral. Mr Speaker nou annan trwa Sekreter Zeneral dan Lasanble ozordi. Bonn apre midi PS. Mr Chairman premye kestyon mon ti a kontan demande se Bidze sa lenstiti i en Bidze ase konpleks i en gro Bidze.

Mon ti a kontan konnen premyerman konbyen dimoun dan Departman Finans kot lenstiti ki ede pou *manage* sa Bidze par egzanp *accounting financial control?* Akoz ler mon regarde i annan plizyer laliny ki pe ganny depanse anba plizyer programm e mon pe prevwar pou annan serten difikilte, pou *keep track of* tou sa bann depans. So mon ti a kontan e ganny e reasirans lo ki mannyer sa bann depans pou ganny swiv.

Mon dezyenm kestyon Mr Chairman, ler mon regard Bidze, enn son bann konponan prensipal se atraver bann *non-financial assets* kot nou war 4.1milyon renovasyon Karnegi, nou war 3milyon pou Teat de Palm, nou war 9.3milyon pou renovasyon *Library* e 5milyon pou konstriksyon Larsiv Nasyonal.

An relasyon avek sa bann sif ki mon fek nonmen eski par egzanp an se ki konsern Larsiv

Nasyonal avek *National Library*, pou bann dimoun ki annan problemm tande, i annan bann sistem dan lezot pei ki mon'n war zot servi pou ki sa bann dimoun i ganny - pa zis akse, me bann dokiman oubyen avek bann tou bann facilite ki kapab ganny ofer dan sa bann lenstitisyon.

E mon prezimen pou annan dimoun ki annan lentere dan sa de landrwa. So eski zot in prevwar anba sa Bidze ki la pou fer sa? Akoz mon war 5milyon pou Larsiv Nasyonal sa lannen, apre mon war 14milyon lannen prosen.

So petet eksplik mon si sa 5milyon petet i pou travay preparasyon, oubyen *main konstriksyon* main travay pou ganny fer dan sa 14milyon?

Apre mon trwazyenm pwen Mr Chairman i annan sa bann konponan elektrisite ki mon note i ase sibstansyel, par egzanp mon'n note ki anba en programm mon war elektrisite i sorti R500mil pou al 2.5milyon - en logmantasyon R2milyon.

Mon war en lot logmantasyon dan elektrisite i sorti 3.8milyon, pou li al 4.6milyon - en logmantasyon R800mil. Eski mon kapab ganny en leksplikasyon akoz sa bann logmantasyon? E mon dernyen -

### **MR SPEAKER**

Onorab pa pran tro bokou pwen.

### **HON SEBASTIEN PILLAY**

Vit, vitman.

### **MR SPEAKER**

Pou mwan i fer kat pwen.

### **HON SEBASTIEN PILLAY**

Anba '*promotion and creative industry allowances including PSC*' mon war en logmantasyon 1.6milyon. Eski mon kapab ganny en leksplikasyon lo kwa sa bann *allowances* i sipoze entail? Mersi Mr Chairman

### **MR SPEAKER**

Mersi. *Panel* i annan kat pwen zot a sey adres li.

### **SECRETARY GENERAL**

#### **DAVID ANDRE**

Mersi Mr Chair. Mersi Onorab. Pou fer keksoz al pli vit mon ava demann *PS* pou reponn sa bann kestyon, akoz i annan tou bann detay avek li la.

### **MR SPEAKER**

*PS* wi, ou annan laparol.

### **PERMANENT SECRETARY CECILLE KALEBI**

Mersi Onorab. Mersi Mr Chair osi. *Ok lo kote kantite account*

*staff* nou annan dan Lenstiti Kiltir nou annan 4 dan nou *Account Section*, me osi dan sak sa bann diferan nou annan bann diferan *budget heads* e anba zot i annan bann *Budget and HR officers*; nou annan bann *admin officers* ki osi fer zot bann *processing*. E finalman i pas kot nou *Account Section* pou verifikasyon e peyman.

So an tou nou kapab dir nou annan en total 9 ki pe get tou bann keksoz bidzeter. Lo kote bann finansman pou *archives* - non *sorry* - lo kote bann provizyon pou bann lezot fasilite, akse, pou kekfwa bann ki pa war kler e i annan lezot dezabilite;- sa espesyalman dan sekson libreri ki nou pe redvelope sa nou'n definitivman fer en sekson ki nou pe devlope, pou ed parey pou annan *braille, sensory areas* espesyalman pou bann zanfan.

So nou'n vreman antre dan sa renovasyon *library* avek en novo lizye. Nou osi pe ofer en *ebook service* aktyelman la dan nou *library*, so nou ankouraz bann, bann Manm piblik pou servi sa servis ki la.

Lo kote kou elektrisite, nou'n fer provizyon ki nou pe bouz dan Libreri Nasyonal milye lannen prosen, e alors nou espekte ki pou annan en

kou en pe sibstansyel lo kote pou pey elektrisite pou sa batiman, akoz sa, sa batiman son elektrisite i *one group*.

Nou pou annan en sekson administrasyon ki pou osi baze ladan e osi pou annan fonksyonman *library*. E alors nou mazinen ki nou'n fer provizyon pou sa.

Lot provizyon ki nou war logmantasyon 4.6, sa i akoz mentenan *ICCS* avek *music stadium* avek bann restriksyon ki'n sorti, nou pe *operate full* kapasite spesyalman avek *ICCS*, alors nou espekte ki nou pou annan logmantasyon dan kou elektrisite.

Lo kote *allowances excluding PSC* sa lannen - ok *other allowances excluding PSC* nou annan *transport, allowances, nou annan marketing, allowances, inducement allowance* ki tonm ladan.

### **MR SPEAKER**

Wi mon sipoze i annan pwen ki pa'n reponn Onorab.

### **HON SEBASTIEN PILLAY**

Mersi Mr Chairman. Mr Chairman klarifikasiyon en? Mon apresye bann larepons ki mon'n gannyen vizavi bann lezot porsyon. Mon'n still pa'n ganny en klarifikasiyon

*regarding* sa 14milyon ki pe vin 2024 me par dan Bidze 2023 lo konstriksyon Larsiv Nasyonal. An relasyon ek sa bann *allowances* ou dir mwan i annan *sport allowances* apre *inducement allowances*.

Petet eksplik mwan ki mannyer - akoz ki zot pe fer li dan sa fason *in terms of inducement allowance*. Mon war en logmantasyon i sorti pre R30ekek mil and *then* i al direk lo 1.6milyon. Sa i anba programm, programm 5?

*Allowances excluding PSC* sorti R37mil pou al 1.6milyon *ok*, se sa ki mon ti le ganny en klarifikasiyon lo la. E mon dernyen pwen se fotespere zot, zot kapab *maintain e manage* en sistem *approval* pou sa bann depans, akoz nou konnen par lepase i annan *issues* avek Oditer Zeneral vizavi bann depans kot Departman Kiltir.

So mon konsern i zistifye dan sa sans ki ou annan ase dimoun, pou fer sir ki sa bann depans i ganny konte byen e ganny *accounted for*. Mersi Mr Chairman.

### **MR SPEAKER**

*Thank you Onorab. PS wi.*

### **PERMANENT SECRETARY** **CECILLE KALEBI**

Yes mersi Mr Chair. Mersi Onorab. *Ok* sa lannen nou'n ganny 5milyon pou *archives*, sa i zis pou bann *preliminaries* pou konmansman sa proze. Nou espekte 2024 pou sa 14milyon ler proze i konmans demare.

Onorab *in regards to* sa bann logmantasyon ki ou pe war avek restriktirasyon nou lenstiti, nou annan serten mouvman bann *staff* ki'n sorti kot seksyon ladministrasyon in bouz kot bann lezot seksyon.

*Hence* akoz ou war sa bann *fluctuations* dan nou Bidze. E osi lo kote finans - wi nou, nou war - ki nou konstate ki wi nou pou bezwen *increase* nou *staffing in regards to* nou bann *accounts staff*. E nou pe regard dan nou Bidze lannen prosen, si nou kapab war serten *savings* ki nou ava kekfwa kanmenm rod ankor enn ou de *staff accounts to beef up* nou seksyon, pou asire ki nou *meet* nou bann *procurement regulations*. Mersi.

### **MR SPEAKER**

Mersi PS. Onorab Labonte *sorry* mon pa'n bliy zot kanmenm zot lwen laba.

### **HON ANDY LABONTE**

Mersi Mr Chair. Mr Chair mon annan zis trwa leklersisman, premyerman mon anvi dir mon

vreman apresye ki Gouvernman in deside met 27.8milyon pou vreman sofgard nou kiltir, nou tradisyon.

Me petet pou donn nou en pe plis lesplikasyon sirtou lo kote *La Bastille*, mon konnen poudir ti annan en lenvestiser aletranz ki ti sipoze envestir ladan. Me *until now* pou nou war li pou plizyer lannen i la zis i en *eyesore* koumsa menm, si petet nou ti kapab ganny en pe lesplikasyon ki pe arive vreman lo la?

Apre mon dezyenm kestyon i al plizoumwen lo en pwen stratezi 2023-2025 pwen limero 3 “*provide renovation, restore, refurbish and maintain cultural infrastructure through partnership with eleven stakeholders.*”

So la ki mon pe dir eski i annan serten finansman ki’n ganny mete, petet pou serten letablisman prive ki i kapab ed zot pou *Maintain* sa bann lenfrastriktir. La mon pe mazin kot *building* Mr Pillay ki i annan en valer eleman vreman, vreman enportan e kiltirel. Petet i kapab ed zot pou zot *Maintain* nou kiltir si oule.

Apre an pasan kot ‘*facilities for event*’ parey in ganny dir laplipar in ganny ogmante. Me ler mon pe get *program 5* in sorti 5.8milyon

pou desann 3.4milyon, mon ti pe gete si nou kapab ganny en pti lesplikasyon lo la? Mersi.

### **MR SPEAKER**

Mersi. *Panel? SG.*

### **SECRETARY GENERAL**

#### **DAVID ANDRE**

Mersi bokou. Sa bann lenformasyon ki ou’n demande pou kapab donn ou serten detay lo la. Ankor pou rezon letan mon kapab demann *PS* pou fer komanter - anfen pou donn ou larepons.

### **MR SPEAKER**

*PS?*

### **PERMANENT SECRETARY**

#### **CECILLE KALEBI**

Mersi Mr Chair. Mersi Onorab pou ou kestyon. Lo kote *La Bastille* wi nou war ki sa bann lenvestiser pe ganny en pe difikilte pou, pou enplimant zot proze. E alors nou pe konmans regard ek zot ki *best way forward* pou *La Bastille*.

Nou osi konsernan avek sa batiman i annan vreman en valer istorik e nou espekte ki dela nou ava fer serten lanonsman apre ki nou’n ganny serten konversasyon avek, avek zot.

Lot kote pou bann prive kapab osi regard zot batiman ki

annan en valer istorik dan nou Bidze parey ou pou war nou annan en konponan ki apel *Seychelles Heritage Scheme* e la sa Bidze i ganny mete pou vreman ed bann prive ki annan parey ou pe dir bann batiman ki annan valer istorik, alor zot kapab fer aplikasyon anba sa *Heritage Scheme* pou ganny serten sipor.

E lo kote '*facilities for events*' sa rediksyon se akoz lannen pase tou bann finansman pou bann aktivite ti ganny mete anba sa programm

5. E la nou'n zis repatri son Bidze kot son *budget head* apropiye. So si i annan serten aktivite ki kekfwa programm 3 ti pe fer la nou'n pran son Bidze nou'n *allocate* dan son landrwa apropiye.

E osi nou ti ganny provizyon pou *EXPO* sa lannen e lannen prosen nou pou napa, alors i osi annan en rediksyon osi ladan. Mersi.

### **MR SPEAKER**

Mersi. Onorab Romain.

### **HON GEORGES ROMAIN**

Mersi Mr Chair. Bonn apre midi SS avek delegasyon. An vi ki nou'n tande plizyer Minister ki'n vin devan nou pe koz lo *digitalization* e mon'n war dan enn de zot *current challenges*

zot pe koz "*lack of digital of cultural programs and services.*"

Alors mon ti a kontan demann SS ki zot pe mazin fer pou kapab rezourd sa problem? Apre mon dezyenm kestyon Mr Chair, dernyen nou'n war dan zot *non-financial assets* ki i annan en konstriksyon pou *admin block* si SS i ti kapab donn en pe plis lesplikasyon en pti pe lo la ki bor sa landrwa sa admin sa batiman pou ganny fer? Mersi Mr Chair.

### **MR SPEAKER**

*Thank you Onorab. Panel SG oubyen PS.*

### **SECRETARY GENERAL DAVID ANDRE**

Mersi. Enn bann *challenges* se sa zis *lack of digital cultural program*. Ou konnen keksoz pe bouze teknolozi pe antre partou kote donk i enportan ki nou osi nou kit nou *abreast* avek sa.

Donk sa i bann keksoz e bann keksoz i koute pou met an plas donk sa i enn keksoz ki nou bezwen fer fas avek. Lemonn pe evolye, menm si nou pe koz lo prezerv nou leritaz, me selman i annan bann eleman teknolozi ki pou arrive ki pou fasilit serten travay, oubyen fasilit serten keksoz ki nou pou

fer e sa i enn bann keksoz ki evantyelman ki nou pou bezwen envestir. Mon pa konnen si *PS* petet i le elabor lo la en pti pe apre.

Apre sa lot lo *admin block* sa i en *admin block* ki nou pe konsidere pou fer kot Domaine De Val De Pres;- Domaine De Val De Pres. Akoz la pou lenstan bann dimoun pe servi sa Gran Kaz konman en lofis pou zot fonksyonnen bann dimoun ki travay laba. Donk i enportan ki zot annan zot lespas administratif prop pou zot fonksyonnen. Mersi.

### **MR SPEAKER**

*Thank you. PS ou ti annan keksoz pou azoute?*

### **PERMANENT SECRETARY CECILLE KALEBI**

Wi Mr Chair. Lo kote sa *lack of* enn nou *challenge* definitivman, se pou anmenn servi teknozi dan prezervasyon, konservasyon *even* donn lenformasyon lo nou leritaz.

So en keksoz ki nou war en stratezi ki pe marse - parey ou konnen nou annan nou *National Arts and Culture Fund*, nou pe war plis an plis bann zenn - en pe plis pe vin devan avek bann proze kot zot le servi - nou a dir bann *apps* avek

bann lezot *platform* pou kapab *market* nou kiltir.

E alors lo nou kote nou konnen nou pa pou kapab fer tou e alors nou kolabor ek zot, pou regarde ki mannyer sa bann keksoz i kapab ganny fer. E an menm tan ki osi ed nou dan nou travay pou prezerv nou leritaz.

An menm tan, lo nou kote osi nou pe vreman antre dan sa kote *digitalization*. Parey nou pe fer avek nou *archives* nou kontan pou raporte ek sa lannen osi nou pe ganny sipor Bidze, pou kontiny sa travay *digitalise* nou bann *archive materials* e *collaboratory materials*, so sa pou nou osi i en pa devan. Mersi.

### **MR SPEAKER**

Mersi. Onorab William.

### **HON WAVEN WILLIAM**

Mersi Mr Chairman. Bonn apre midi SS avek ou lekip. Mr Chairman mon ti a kontan premyerman enn;- felisit SS avek son lekip pou sa lorganizasyon 37enm Creole Festival mon krwar Seselwa ti annan rezon pou selebre.

Mr Chairman mon ti a kontan demann avek SS, letan mon get zot latab reveni, mon war li konmsi pa, pa tro anbisye konmsi lafason zot in mete mon

war poudir 2022 ti annan 5milyon keksoz e la pou 2023 zot in met ankor zis 5milyon.

So mon anvi demann avek zot eski vreman zot pe eksplwat *to the maksimonm bann asset* ki nou annan? Akoz letan mon ekout Minis *Tourism* pe fer bann pledwari, an menm tan touris i ganny *interview* pou dir konmsi zot, zot pa pe war dan kwa ki zot kapab depans zot larzan.

E ler ou regard lakantite touris ki vin Sesel, ou war poudir *there's something wrong*. Eski zot dan zot *marketing* zot pe travay pre avek bann *DMCs*, bann Lanbasad aletranze, bann lotel isi ki letan bann touris i vini, zot annan sa nesesite pou al war sa bann sit e partisip dan bann aktivite?

E dezyenmman, eski zot annan mon'n trouve poudir zot in met en plan 2023-2025. Me letan ou regard demars Gouvernman e sirtou ler ou regard *achieve target 8* 'devlopman soutenab' mon santi poudir ou a krwar poudir i annan serten keksoz ki pa maryonnen.

So mon anvi konnen si zot pe vreman eksplwat *to the maksimonm sa sinerzi* pou fer sir ki enn;- reveni i monte.

Akoz letan ou regard 5milyon konmsi pou mwan i pa

tro konmdir akseptab mon war. Akoz mon krwar poudir nou kapab fer plis ki sa si nou vreman eksplwat sa sinerzi. Mersi.

### **MR SPEAKER**

*Thank you Onorab. Panel.*

### **SECRETARY**

### **DAVID ANDRE**

### **GENERAL**

Wi mersi Onorab. Mon toutafe dakor avek ou. Ou konnen kot Lenstiti Kiltir nou ofet nou priyrite se pou nou fer sir ki annan en prodwi kiltirel artistik. E nou lenstitisyon vreman i son manda prensipal pa pou vann aktivite, pou vann levensnman eksetera. Byensir nou fer sa bann keksoz.

Me selman sa ki enportan pou priyrite se pou fer sir ki nou annan bann prodwir ki otantik ki annan valer, prezan nou travay an kolaborasyon avek bann lezot partner. E Minister Tourizm zisteman i enn bann partner ki nou pe travay an kolaborasyon avek zot. .

La avek louvertir serten bann lespas la, nou annan bann programm nou pe, nou pe travay ansam avek bann *DMCs through Minister Tourizm*. E nou annan en dimoun osi dan nou lenstitisyon ki nou'n anploye,

zisteman ki li i regard spesifikman sa bann keksoz koumsa, ki mannyer nou kapab donn plis koudmen avek bann lezot lenstitisyon, lezot antite, lezot Lazans, pou fer sir ki i annan bann, bann valer ekonomik atraver nou kiltir.

Me definitivman mon toutafe dakor avek ou e mon garanti ou ki nou pe travay nou pe met bokou zefor lo sa prodwi, ki dimoun i vini bann prodwi otantik ki annan valer e ki vo lapenn. Mersi.

### **MR SPEAKER**

Mersi. Onorab Georges.

### **HON BERNARD GEORGES**

Mersi Mr Chairman. Bonn apre midi Sekreter Zeneral e Madanm Kalebi e ou tim *DG*. Mr Chair mon ti a kontan premyerman felisit Sekreter Zeneral avek son tim, pou travay son lenstitisyon depi ki i nou'n donn li koudanwa dan sa Lasamble.

E nou'n war plizyer keksoz ki'n arive. E mon krwar i annan en mouvman pozitiv e nou bezwen rekonnexion sa e felisit bann dimoun ki pe fer sa arive.

Mize Nasional par egzanp i en lenstitisyon ki'n vreman pran son plas dan milye lavil. Ou a permet mon Mr Chair dir - ki oubyen prezant mon leskiz

premyerman pou Mr Andre, akoz sete mon ki ti sizere ki Mize Nasional i vin la kot i ete e non pa Biro Mer Lavil parey ti'n ganny propoze e *vice versa*.

E donk si konman Mer Lavil in bezwen travay dan en pli pti landrwa, ki enn ki i ti ava kontan mon krwar ki *overall* desizyon ki Prezidan Michel Annefe i ti *call* mwan poudir mon ki i ti'n lir mon let dan Nasyon i ti dakor avek mwan e i swete ki sa ti arive in arive.

Donk lo sa kote mon krwar, nou'n reisi fer en bon keksoz e mize i en landrwa ki atraktif avek son kafe otour, se sa kalite keksoz ki mon krwar nou bezwen promouvwar e nou bezwen annan plis. E mon kontan tande apre midi ki pou annan plizyer keksoz ki pou ganny fer dan sa direksyon, enkli en koleksyon lar nasyonal, enkli renovasyon *La Bastille*, enkli en keksoz ki pa'n ganny mansyonnen - me mon konnen i lo plan - e sa se Mize Lamarin, eksetera.

Pou donn nou bann touris egzakteman parey Onorab William fek demande, en lespas pou zot depans larzan. E sorti isi konesans konnen ki zot in meble zot letan avek en bann lo en bann sit kiltirel donk felisitasyon - felisitasyon pou tousala.

Lo lot kote mon ti a kontan eksprim en pti pe regre ki'n pran osi lontan pou nou kapab met en pe larzan pou Larsiv Nasyonal.

Me kantmenm remersye Gouvernman ki apre tou sa letan, i annan larzan ki'n ganny mete e ki nou pou annan e ki nou pou annan donk en Larsiv Nasyonal. Mon pe mazin bann travayer ki pe travay dan bann kondisyon tre, tre difisil parey, parey zot konnen anfet pa tro lontan pase mon ti demann en kestyon dan sa Lasanble dan sa direksyon.

Apre tou sa gran lentrodiksyon, mon annan en pti kestyon kote sa Larsiv Nasyonal pou baze? Kote - eski i pou ganny fer? Esaki pou en landrwa ase santral ase aksesib oubyen, oubyen non? Mersi Mr Chair.

### **MR SPEAKER**

Mersi Onorab. SG ?

### **SECRETARY GENERAL DAVID ANDRE**

Mersi bokou Onorab. E mersi pou ou bann mo remersiman, ensi ki Onorab William osi in felisit nou mersi bokou i ankouraz nou sa bann keksoz koumsa.

E nou promet ou ki nou pou kontinyen fer bann travay

dan sa bon direksyon pozitiv. Pou reponn ou kestyon a ler aktyel la, sa ki nou pe ganny dir se ki Larsiv Nasyonal i pou o bor Maison Radyo Union Vale. I annan en lespas ki'n ganny earmark par Minister Lenfrastriktir, Later e i sipoze ganny fer la normalman. Mersi.

### **MR SPEAKER**

Bon avek sa nou a pran vot lo Bidze *pou Seychelles National Institute for Culture, Heritage and the Arts*, pou R137milyon 678mil. Manm ki an faver lev lanmen silvouple? Mersi. Mon krwar tou Manm in vote. Okenn Manm ki vot kont? Mersi.

Bon lo sa Bidze *pou Seychelles National Institute for Culture, Heritage and the Arts*, 27 Manm in vot pour, 0 kont e 1 in *abstain*. Donk sa Bidze in aprouve par Lasanble.

Mersi bokou. E mon felisit SG avek son tim pou zot prezantasyon e mersi zot pou zot partisipasyon. Nou a pran poz la nou annan ankor travay pou fer. Esaki mon kapab limit zot poz pou 25minit aepre e nou a repran travay 3er45. Mersi nou a pran poz.

**(BREAK)**

**SEYCHELLES  
BROADCASTING  
CORPORATION (SBC)**

**MR SPEAKER**

Bonn apre midi. Bon nou delegasyon in fini antre donk mon a swet labyenveni Mr Bérard Dupres *CEO Seychelles Broadcasting Corporation* e Mrs Denise Horace son *Head of Finance*.

Bidze *Seychelles Broadcasting Corporation* i lo paz 75 ziska 81 pou en total R120milyon 801mil. *CEO* parey labitud nou konmans avek en pti lentrodiksyon lo ou Bidze. Mersi.

**CEO BÉRAD DUPRÈS**

Mersi Mr Chairman. Bonn apre midi Mr Chairman. Bonn apre midi tou bann Manm Onorab. E bonn apre midi tou Manm piblik ki a lekout lo radyo e televizyon SBC. Mr Chairman sonm total ki pe ganny propoze pou SBC pou 2023 parey ou'n mansyonnen i R120.8milyon.

I bon pou note ki sa sif total 24milyon i reprezent konponan *grant* pou konstriksyon *SBC House*, ki nou espekte pou konplete an 2023. Bidze operasyonnel pou SBC i alor en total 95milyon. Sa

i 7milyon an mwens ki pou 2022.

Ladan 61milyon i pou *wages and salaries*. Sa logmantasyon konpare ek 2022 i fer provizyon pou logmantasyon lapey ki Gouvernman in anonse, e osi pou 13enm mwan saler, pou saler 13enm mwan.

Pou '*goods and services*' sa sif i 32.84milyon. I enportan pou konpar sa avek alokasyon pou sa lannen 2022 kot '*goods and services*' ti 45milyon. Avek sa logmantasyon ki nou ti'n gannyen an 2022 spesifikman anba alokasyon '*minor capital outlay*', nou'n kapab fer progre lo enn de bann proze stratezik.

Bann proze ki nou fer progrese e serten konplete *or* pou konplete avan lannen fini, i enkli ranplas nou bann emeter *FM* e bouz Radyo Sesel lo frekans *FM*. En *feasibility study* pou Radyo Sesel reste lo frekans *AM*; - *upgrade* en parti nou sistem *DTT* ki'n arriv 5an ou plis. Transform nou arsiv pou vin *digital* e propoze pou lans en servis *OTT* '*Video on demand*'.

Malerezman pou 2023 Bidze, '*goods and services*' in retourn preski lo menm nivo ki i ti ete an 2016. Mr Chairman ler ou met sa dan konteks ki SBC i espekte pe bouz dan son

nouvo batiman an 2023, i en sityasyon tre enkyetan ;- apard provizyon adisyonnel 1milyon pou elektrisite ki pa ase, e 2milyon pou en *car park*, napa ankor provizyon dan Bidze 2023 pou bann depans ki pou permet SBC bouz dan sa novo batiman, dan en fason ki son loperasyon e pli enportan nou bann servis ki nou donn nou bann lodyans pa ganny afekte.

Dan nou finisyon Bidze 2023, nou'n estimen ki pou annan en logmantasyon signifikan dan konsonmasyon elektrisite e ki pou osi annan logmantasyon dan kou pou netway e mentenir sa bann novo batiman, ensi ki pou son sekirite.

Menm si SBC pe sey fer tou sa ki i kapab pou ogmant reveni ki i gannyen, sa reveni i devret ganny servi pou son lobzektif, lobzektif primer e sa se pou finans programm pou son lodyans, ki enkli investir davantaz dan prodksyon konteni lokal. Nou pa kapab espekte SBC pou anmenn sa fardo li tousel lo li menm, en an se ki konsern sa gran lekar ki annan egziste an son finansman ki i resevwar, fas a ki i bezwen pou depanse pou son loperasyon dan sa novo *building*.

Zesyon e gouvernans SBC i tre konsernan avek sa sityasyon. I pa pou en bon desizyon pou SBC demenaze kan i pa kapab finans son bann loperasyon e *output* ki i fer toulezour, e an plis san langazman Leta ki i pou revwar sa sityasyon.

Avek sa detrwa mo lo sityasyon bidzeter enkyetan pou SBC Mr Chairman, mon ava termin mon lentrodiksyon e mon ava remersye tou bann Manm pou zot lekout. Mersi.

#### **MR SPEAKER**

Mersi. Nou a konmans avek kestyon bann Manm. Onorab Woodcock. Atann en pti kou Onorab plizyer Manm in lev lanmen, les mwan a pran sa avan pou mon pa sey mank personn.

Bon nou a konmanse, Onorab Woodcock.

#### **HON WAVEL WOODCOCK**

Mersi Mr Speaker. Bonn apre midi CEO, ou lekip. Mon kestyon i baze lo sa SBC *House* ;- si CEO i kapab dir sa Lasanble kan ki zot pe espekte sa proze pou konplete sa SBC *House*? E mannyer mon pe konpran lenformasyon ki mon'n gannyen atraver *meeting* ki nou Komite anba MYCC, nou'n

gannyen avek ou, i annan en pe konsern lo sa *building* li menm.

Eski i en *building* son *planning*, son *inception* sa groser *building* i sa ki zot, zot ti anvi? Mon konnen ou'n erit sa konman *CEO* enkli nouvo *Board SBC* ou ti erit sa *building*.

Eski sa *building* i pou fer provizyon tou sa fase ki zot bezwen ouswa akoz mon pe prezimen sa groser *building* i pou fer ki kou loperasyon pou monte, elektrisite, delo e menm *maintenance* lo sa *building*.

Eski zot santi lo zot menm zot pou kapab kouver kou loperasyon, ouswa petet zot kapab konsider pou *repurpose* sa *building*, kot zot kapab *outsource* ouswa lwe en parti sa *building* avek en lot antite Gouvernman?

E, e dezyenmman, eski ou kapab donn en pti pe plis detay lo kou sa tranzisyon ki zot anvizaze fer pou sorti kot *SBC* i *located* aktyel, pou al laba.

E konbyen zot pe espekte sa pou koute si ou ti kapab donn en pti pe detay lo sa tranzisyon? Mersi bokou.

## **MR SPEAKER**

Mersi Onorab. *CEO*.

## **CEO BÉRAD DUPRÈS**

Mersi Mr Chairman. Mersi Onorab pou ou kestyion. Nou

espekte ki konplet dapre plan ki nou'n gannyen avek kontrakter, nou sipoze i sipoze *hand* nou sa *building* lafen Fevriye 2023.

Nou, nou estimasyon se ki petet Mars, Avril ki nou kapab ganny li, baze lo sa ki nou pe *revalidate*. Nou ankor an revalidasyon avek bann kontrakter Sinwan parey ou konnen nou'n arriv lo pros 4an, 5an depi ler sa *building* pe fer.

So me selman sa ki definitivman 2023 pou annan, pou annan en hand over of the *building*. E se la kot nou konsern parey ou pe leve ki i vini. Parey nou'n mete nou, nou ler nou'n soumet nou Bidze pou 2023, nou'n estim tou kou ki *SBC House* i kapab anmennen.

Si ou pou demann detay i annan de kou i annan son *ongoing recurring cost* ki tou le lannen nou bezwen sa i enkli elektrisite, sekirite, *maintenance services*, *cleaning services*, *security services* ki pou en *building* ki pou kontinyen.

Apre sa ki nou apel bann *one-off cost* kou pou *relocate* sorti Hermitage pou vin Union Vale sa li i *what you call capital expenditures*, e ladan i annan kou pou *repurpose* bann lofis pou fer li *fit for purpose*.

E pou reponn ou kestyon wi sa building pa ti *fit for purpose* parey nou ti ava anvi se sa ki nou ti met en propozisyon, pou nou fer ki bann lofis i pli apropriye, e ki pli enportan i *accommodate* tou nou bann staff.

E i annan landrwa ki nou'n apropriye ki nou'n dir ki nou bezwen servi - nou bezwen *convert* pou kapab *cater* tou nou bann staff. Nou pa kapab ganny en *building* koumsa e nou war nou ankor pe petet demann plas par egzanp Hermitage i pa pou apropriye.

So sa nou ti ganny en alokasyon 4.8milyon pou sa lannen, avek lekspektasyon ki i ti pou'n kapab pe al arive sa lannen, ankor retar pa'n fer li. Me ki napa se sa lokasyon pa'n ganny *forward* pou lannen prosen. Sa i enn bann konponan en pe enportan, pou nou kapab bouz pli byen.

I annan en lot konponan ki ase signifikan se nou konnen nou annan nou *note Head DTT* tou bann lekipman *DTT* ki la *Hermitage* ki zot in ariv 5an parey in ariv 5an depi ler nou'n *commission* e petet sa bann lekipman i plis ki 5an, in ariv ler pou *revamp* zot. E ki mannyer nou'n war i pli *cost effective* pou met nouvo lekipman dan *SBC House*, ki pou al tir sa bann lekipman ki deza *obsolete* ek

tou son bann *challenge* ki i annan pou nou kapab fer ki i fer li.

E sa i en konponan dan sa *capital outlay*. Apre i annan lezot kou parey nou'n dir *car park* nou'n gannyen, apre i annan kou pou *transform house* avek kou pou *payment*. Sa i bann pti kou en pe miner e sa osi i neseser pou *fund*, pou nou kapab fer ki nou annan en *building* ki ase fonksyonnel.

So i annan de parti - *capital expenditure* ki li i apepre 8milyon ladan nou'n ganny zis 2milyon. E kou adisyonnel loperasyon ki li nou'n dir apepre 10milyon.

Sepandan nou konnen poudir sa bann kou ki nou pe dir bann gro, gro sif e nou ki nou pe war se poudir ki annan *bare minimum* ki nou kapab sivre, nou pou bezwen *relocate* ki pou fer ki nou fer li dan en fason ki pa pe afekte nou loperasyon nou output e osi nou bann staff.

Sa i annan en travay *ongoing*, me larealite i reste ki nou'n ganny 3milyon dan sa total *cost* enorm ki 32milyon ki nou'n demande adisyonnel. Mersi Onorab.

Eskiz mwan, mon pa'n reponn ou kestyon lo kote ki nou kapab fer pou *outsource* sa avek Gouvernman. I annan en

pe i annan en bon pe travay ki pe fer pou gete ki mannyer nou kapab *increase* reveni *SBC* an zeneral, me osi ki mannyer sa *building*, ki en *building* ki annan enta fasilite ladan, i kapab ganny servi pou rann en pe larzan *SBC* ou Leta dan son konpleksite.

Ladan nou annan nou par egzamp nou en gran kantin, nou annan nou en *training room*, nou annan nou en *learning center*, nou annan nou bann *gran studio*, nou annan nou fasilite *editing*.

Tousala nou pou konsidere byensir pou *either rent out or servi avek lezot antite dan en fason byen*, pou redwir en pe *or give back some money* lo sa gran lenvestisman ki in ganny fer lo sa *building*.

### **MR SPEAKER**

Mersi CEO pou sa adisyon.  
Onorab Lemiel.

### **HON SYLVANNE LEMIEL**

Mersi Mr Chair. Bonn apre midi CEO avek ou pti delegasyon ki'n arive. Mr Chair mon an konsern kot i konsern *SBC*, mon war ki zot annan en kantite *challenges* ki zot in mete. E mon konsern osi ki mon'n toultan met devan ki pa ankor rezourd, lo kote mon distrik bor bann distrik dan sid,

i konsern sa poor *coverage and reception* lo kote *AM Radio* ki bann dimoun pa gannyen ;- menm si *CEO* dan lepase petet ou'n dir bann dimoun i kapab transfer lo *FM* pou zot ekoute, or ganny bann *device* lo nou telefonn.

Me nou bann vye dimoun i konn son pti *Radyo AM* li, me *still* mon war i ankor en kontrent pou ou e mon pe regarde dan Bidze pou lannen prosen, eski i annan en pti posibilite ki sa problem i kapab ganny rezourd or ganny amelyore? Sa i enn.

Apre mon war nou toultan dir *staff welfare* i vreman enportan, akoz se nou *staff* ki fer nou al pli devan. Se nou *staff* ki anmenn sa bann programm sa bann keksoz pou *SBC*.

E mon war ki petet zot pe travay dan en fason kot zot lavi parfwa petet i kapab a risk, letan ou get ou *challenge* ki ou'n mete ki annan bann vye transpor, e zot kondisyon sa bann transpor i ganny deteryore.

E mon pe regarde si i annan posibilite, or si *SBC* pe sey fer serten laranzman ki zot kapab ranplas serten sa bann transpor dan Bidze lannen prosen, ouswa kwa ki zot pe mazin fer pou zot petet kapab

rezourd sa problemm transpor ki met *safety* e lavi zot staff a risk? Mersi.

### **MR SPEAKER**

Mersi Onorab. *CEO.*

### **CEO BÉRAD DUPRÈS**

Mersi Onorab pou ou kestyon. Lo kote Radyo Sesel son *coverage*, sa vre in *ongoing* pou sa dernyen 5an ou plis. Parey mon'n mansyonnen nou'n annan en proze pou bouz Radyo Sesel lo *FM*.

E sa i pou pe konplete byento si bann oditer i *tune* lo *94.0 or - sorry 90.4* zot pou tann Radyo Sesel sorti St Louis i lo *FM* deza. Nou pe *rollout* sa finisyon sa proze bann lezot landrwa. *Fairyland* par egzanp i *next* kot nou pe met Radyo Sesel lo *FM* avek sa proze ki'n ganny *fund* sa lannen.

I annan en pe retar. Me nou konvenki ki *by* lafen lannen tou landrwa kot i annan *Paradise FM* pou annan *coverage* Radyo Sesel lo *FM*. Mon demande osi ki mon'n mansyon sa bann frekans ki nou ankor pe teste;- i annan en pe lazistaz avek nou sinal, me i a pe vini.

Lo size Radyo *AM* li menm, mon'n mansyonnen dan konmansman ki nou'n fer en *feasibility study* dan sa lannen

ki'n pase par en konsiltan etranze, e nou'n soumet rekomandasyon sa *study* avek rekomandasyon *Board* avek Gouvernman lo lavenir Radyo *AM* dan Sesel. E sa i pou Gouvernman pou konsidere.

Si nou pou *relocate* ofer *improvement* lo *AM* i pou kout nou dan kou minimonm 10milyon, e sa i en kou konsiderab pou nou kapab *revamp* en transmiter ki'n la en bon pe lannen ek son *antenna* sistenm ki vreman deteryore.

So alor sa i en kou stratezik en desizyon stratezik ki Gouvernman i bezwen fer. Ler nou pe get dan *challenge* ki *SBC* i deza annan pou *fund* son *relocation* e tou lezot, mon krwar petet mon krwar larepons i evidan, me sa mon ava les Gouvernman pronons zot lo la akoz zot ki *fund* nou.

Me parey ou'n dir Onorab apard ki vin lo *FM* ki en bon keksoz kalite nou *FM* nou nouvo *FM* transmiter pou *better*; i pou kouver ou kapab dir plis 90poursan nou bann oditer Radyo Sesel.

Mon pe *hope* ki nou bann dimoun aze i kapab *tune* en pti gin sa *FM* e nou osi nou ava ed zot osi pou fer sa. E parey ou'n dir i annan lezot platform - i annan *radio app* i lo *SBC* televizyon osi, nou pe seye pou

nou kapab donn li sa *wide coverage*. Onorab ou pwen ki ou'n leve konsernan *staff welfare* pou transpor i pertinan.

Mwan mon anbarase ler mon *travel* dan transpor SBC - serten sa bann transpor e pou mwan, mon pa war li apropriye pou nou *staff* kontinyen servi. Me pa nou ki *fund* nou lekor. Nou kapab demande nou annan en plan ki nou *submit* poudir la, la *replacement* pou en transpor.

Nou'n *submit* 1.8milyon sa lannen, e si ou pou war dan nou sa i pa'n *funded*, alors nou pa kapab fer tro gran lo la. Me si an ka nou reveni i *allow* nou, nou ale nou rod enn pou tir en pe presyon. Parey sa lannen la nou pe ganny nou enn ki nou pe pey dan nou reveni.

E i annan en limit ki nou kapab fer sa, akoz i annan lezot landrwa ki pou ganny afekte. Mersi.

### **MR SPEAKER**

Mersi CEO. Onorab Adelaide?

### **HON FRANCOIS ADELAIDE**

Mersi Mr Chair. Bonn apre midi CEO avek ou lekip. Dabor mon le dir ou ki mwan, mon en *fan SBC* mon kontan get sa programm Bonzour Sesel avek *Retro*. Mon trouve ki SBC i annan bokou keksoz ki i fer, me

i vin en pti kontansyon sirtou lo kote *output* lo petet lo nouvel, me selman mon admet poudir zot fer bokou keksoz e sa mon felisit zot.

Be zabitan Baie Lazare atraver sa Bidze ki i pe donn zot, i pe demann - pa demann bokou nou - zis ki nou pep i ganny nouri avek keksoz ki laverite ki pou fer nou *think positive*. So atraver sa larzan ki nou pe donn zot, sirtou pou lo kote saler apre nou pe koz *result-based management* petet ou konman CEO ki ou pe fer pou ki Seselwa i vreman ganny sa bon nouvel ki nou espekte gannyen, san get okenn politik, larelizyon ouswa nenport ki me nou le keksoz ki zis e laverite. Mersi.

### **MR SPEAKER**

Mersi Onorab. CEO.

### **CEO BÉRAD DUPRÈS**

Ok mersi pou ou kestyon Onorab. Mon pa konnen si i en *statement* oubyen en kestyon, selman mon a sey fer en *similar statement*. Sa nou manda zournalistik editorial e konstitisyonnel i espekte, i demande ki SBC i fer son travay drwat obzektivman avek *accuracy* ek laverite.

Si i annan *departure from that* ki nou pa pe *deny* kekfwa i

annan, i pa avek en lentansyon ensizesyonné *otherwise* pou fer li. Nou ki nou ti ava kontan avek nou bann parti prenan, se ler i annan legzanp nou pa zeneralize poudir *SBC* parey pe ganny dir pou koz laverite.

*SBC* i koz enta laverite, me selman nou pa pe rekonnèt sa, nou pe rekonnèt petet ler nou krwar i pa'n koz laverite. Mon pe demann mon lekor kantite poursantaz sa enn *versus* sa lot i annan pou zistifye bann *statement* koumsa.

E mon pa pe dir poudir nou pa pe *deviate* dan nou milye, kot nou sipoze ete dan tou keksoz obzektivman, me ler nou fer li nou espekte ganny *feedback*; - *feedback* spesifik, *feedback* ki *accurate* e ki osi obzektif sa *feedback*.

Akoz si i annan demann pou nou et obzektif, nou espekte *feedback* osi i parey. E nou *welcome*, nou *engage* avek tou nou parti prenan ki fer konplent avek nou lo nenport size spesifik kot nou'n *deviate from an editorial expectation* e nou manda konstitisyonné. Mersi Onorab.

### **MR SPEAKER**

Mersi CEO. Onorab

### **HON PAUL ERNESTA**

Mersi Mr Chair. Mr Chair CEO, tou mon bann koleg Onorab e tou dimoun a lekout bonn apre midi. Mr Chair en keksoz ki mon remarke kot *SBC* - *in fact recently* nou'n al vizit, e nou'n vwar osi ki i annan bokou bann *poaching* ki pe ganny fer par bann lezot *media houses* avek bann *staff* - si ou le bann ki eksperyanse ki la.

Mon kestyon se ki zot pe fer *in regards to Scheme of Service* pou bann dan seksyon radyo, televizyon? Pou asire ki nou gard nou bann staf lanmenm? Enn.

Apre dezyenmman lo kote sa *reviewing editor*. Ki zot rol? E apre si i annan okenn provizyon ki'n ganny fer dan Bidze pou zot e konbyen ki zot pe ganny peye si zanmen i annan? Mersi Mr Chair.

### **MR SPEAKER**

Mersi Onorab. CEO.

### **CEO BÉRAD DUPRÈS**

Mersi Onorab pou ou kestyon. Onorab nou'n anbark depi 2020 en revizyon ase konsiderab dan nou *staffing*. Enkli bann *Scheme of Service*. Nou'n nobou konplet finalize pou zournalist, pou TV *production* pou radyo. E nou pe bouz lo lezot seksyon.

Sa bann trwa *output* bann *output* kot ou pe rod dan kad kestyon ki ou pe demande nou bann zournalist. Nou pa'n kapab enplimant tou. E i ti byen ki nou met en poz an vi ki Leta ti pe vin avek en revizyon dan saler. Apre sa in al re *benchmark*, nou a gete ki mannyer i ete an relasyon avek lezot staff, avek *public service*. E byensir pli enportan si SBC i kapab *afford*.

So nou, nou'n fer sa travay *revision of Scheme of Service* me nou pa'n enplimant li. Prensipalman nou si nou ti pou fer enplimantasyon *Scheme of Service*, nou ti pou fer li dan en fason kot nou pa pe demann Leta ekstra larzan. Nou ti pou fer li *within savings or lespas fiskal* ki nou'n kree pou bann *staff*.

So pou nou kapab al en pe pli lwen pou lezot *Scheme*, nou pou bezwen sa *engagement of Ministry of Finance*, pou gete si zot pou kapab *fund* sa. E pou nou pa *manage* lekspektasyon. So mon pe *hope* ki ler nou'n fini ek sa bann logmantasyon ki pou annan lannen prosen, nou a re ankor re pran li re met lo latab, revwar e kontinyen – avek bi pou kontinyen *incentivize* nou bann zournalist ek nou bann travayer medya.

Lo kote *reviewing editor* mon krwar i enportan pou eksplike akoz, nou bezwen fer li. I annan de fason ki ou kapab adres bann *issue* konplent or bann lensidan, bann *quality, errors* ki arive lo ou stasyon.

En nou les li arive apre ou fer *investigation*. So we are active. And we proactively try to stop that. Dan loptik kestyon ki Onorab Adelaide in leve. E se sa ki nou pe sey fer. Se sa akoz sa lannen nou'n entrodwir bann *reviewing editors*, pou anpese ki nou pa *unduly impact* lo kalite lobzektivite nou bann *news item*.

E nou pe vvar deza i annan en amelyorasyon. E sa li menm li i sinifye lanvi, commitment SBC, pou fer ki son *news* i accurate, i byen. E i largely free of errors. Nou lwen de la. Me i en keksoz konmanse. E sa i sorti lo *feedback* ki nou'n gannyen menm isi e ek lezot *stakeholder*, pou nou amelyor nou *news*. E sa i en legzanz kot nou pe sey fer li.

Mon'n mansyonnen poudir nou'n fer en revi nou bann *staffing*. E de la nou'n gannyen en pe lespas fiskal, pou nou kapab *fund* sa *reviewing editors* ki vini *part time*. Zot fer zot *shift* zot ale. Zot ganny peye en larzan *fixed*

pou zot kapab fer sa. E nou kapab *sustain* sa.

Nou pe fer li pou trwa mwan ziska lafen lannen. Apre nou a revwar si vre i annan en lenpak pozitiv lo anpes bann-redwir bann konplent ki nou gannyen. Swa lo bann *quality errors* ou bann konplent en pe pli editorial lo kote balans e lobzekтивite. So it is an ongoing undertaking ki nou pou bezwen revwar li lafen lannen. Mersi Onorab.

### **MR SPEAKER**

Mersi. Wi Onorab ou kapab met en klarifikasyon.

### **HON PAUL ERNESTA**

Yes Mr Chair. Zis petet lo sa sif ki in dir i konfirmen ki i annan serten reminerasyon ki zot pe gannyen. Zis pou klarifikasyon konbyen sa sif *please?* Mon ti'n demande pli boner.

### **MR SPEAKER**

Mersi. Ou le fer en remark lo la CEO?

### **CEO BÉRAD DUPRÈS**

Mon pa tro konnen si i pe demann en sif finansyer oubyen en sif konplent, Onorab.

### **HON PAUL ERNESTA**

Lo sif finansyel.

### **MR SPEAKER**

CEO?

### **CEO BÉRAD DUPRÈS**

Dan lespas bidzeter finansyel SBC 1a, sa lannen nou pa'n enn bann lannen kot nou pa'n ale pou demann *additional fund*. Konmsi – *supplementary budget*. Savedir nou'n zer nou Bidze byen. Menm si avek tou sa defi.

So nou annan en lespas fiskal apepre R2milyon la. Ki kapab ed nou *fund* en pe sa bann *trial of the reviewing editors*. Mon pa konnen si mon'n reponn ou kestyon Onorab.

### **MR SPEAKER**

Mersi CEO. Onorab Naidoo?

### **HON SATHYA NAIDU**

Mersi Mr Chair. Bonn apre midi CEO ek tou koleg Onorab. Lo size *challenges* zot in site pou dir zot annan *insufficient local content*.

Parfwa mon note ki ler i annan aktivite, ouswa en levennman, i annan en zournalis ek son *cameraman* ki rikorde. E apre byensir i pou swiv lo nouvel 8 er, kot piblisite ki ganny donnен i apepre 2 minit.

Mon kestyon se akoz zot pa itiliz SBC 3 par egzanp, pou fer pase sa aktivite ouswa sa

levennman an antye. Akoz i annan en bon pe fwa kot en dimoun i kapab asiste en rankont ouswa en *meeting*. Apre li i santi sa ki vwar dan nouvel, pa pe neseserman ase.

E parfwa par egzanp tou resaman ti annan en *meeting Planning Authority* ki ase enportan lo nivo nasyonal. Wi in annan en rapportaz. Me selman dan bann lenstans parey mon santi ki si *SBC 3* i kapab ganny itilize, i kapab adres enn bann defi ki zot in site.

Lo kote *improvement of quality of local content*. Mon pe swiv dan laliny Onorab Ernesta, kot in fer referans avek *the procedures in place*. Parfwa si en dimoun i santi ki sa ki'n ganny rapporte pa an konformite avek son lopinyon, *what is the way forward*, pou zot kapab met zot konplent devan? E ki prosedir?

I ti a bon kalifye akoz i pa ok pou en dimoun mont lo rezo sosyal pou ensilte en zournalist. Sa mon krwar pa i ok ditou. Zot devret kapab swiv en prosedir ki formel. E an relasyon avek bann konplent dan en lannen konbyen konplent ki'n ganny anrezistre? E konbyen eski zot in *deal* avek? Mersi.

## **MR SPEAKER**

Mersi Onorab. CEO.

### **CEO BÉRAD DUPRÈS**

Ou sizesyon ... *extend* sa bann *extended coverage* lo *SBC 3* i tre valid. I enn ki nou pe bouz *towards*. In annan e sirtou avek nou *engagement* avek enn nou *stakeholder* prensipal Gouvernman, ki zot osi zot santi poudir nou pa pe donn ase sa *coverage* ki neseser. E sa nou'n eksplike *why*.

E mon krwar *earlier* – mon ti eksplike akoz dan standar nou bezwen kit en nouvel pa plis ki 3 minit eksetera. Ekspekte si i zistifye pou sa. Me prezan ki nou nou'n propoze, nou propoze be si sa prezan nou pa kapab fer li dan son totalite nou bezwen fer li konman *extra news*. Pa *NEWS EXTRA - extra news* kot nou kapab met lo *SBC 3*.

E fer lodyans konnen poudir i lo *SBC 3*. Nou pe vini avek sa e mon ti ava profite Onorab pou fer nou lodyans konpran poudir *SBC* i annan 3 *channel*. Pa tou keksoz ki kapab pas dan nouvel. Pa tou keksoz ki kapab pas lo *SBC 2* oubyen lo *SBC 1*. E konpran nou dan sa loptik ki nou donn swa piblik pou li kapab swazir avek zis en *click* lo son *remote* si i anvi vwar *SBC 1*, *SBC 2*, *SBC 3*.

E nou lentansyon se ki pou servi bokou SBC 3 dan sa loptik. Mersi pou sizesyon ki *validate* sa ki nou pe fer. E fotespere nou bann parti prenan i konpran sa.

Lo kote *complaints procedure* mon krwar lo nou *website* i annan en prosedir, me selman ou kapab ale fer en konplent. E i vin kot *CEO* apre *CEO* i pas sa a *Deputy CEO*. Apre i pas sa avek nou pti tim ki fer *the investigation*.

Mon le profite pou fer kler poudir parey mon'n mansyonnen SBC i *very receptive for complaints*. Nou ganny en bon pe ki ekrir kot mwan direkteman formel. Sorti kot bann diferan antite. E ki nou fer konman nou resevwar sa nou *log it as a complaint*.

E apre nou donn avek nou tim pou fer zot *initial investigation*. Met zot bann rekomandasyon, met zot bann *findings*. Apre nou annan en diskisyon ant *Deputy CEO*, mwan lo sa bann konplent e *then we act accordingly*. Si enternman nou bezwen fer serten redres, nou fer li.

Si fodre anvoy en *apology* pou sa parti prenan or *commit to do better*, nou fer li. Sa nou fer li direkteman. E i pa ganny pibliye pou detrwa rezon. *But* nou ankouraze si i annan

konplent lo lafason ki mannyer nou pe fer nou bann programm spesifik. Nou *welcome feedback* lo sa. Mersi Onorab.

### **MR SPEAKER**

Mersi CEO. Onorab Cosgrow.

### **HON WALLACE COSGROW**

Mersi Mr Chair. Bonn apre midi *CEO*. Bonn apre midi tou dimoun. Mr Chair mwan ozordi mon le koz en pti pe lo laliberte lekspresyon. *Now nou'n ganny dir souvandfwa ki medya is the fourth estate of democracy*. Katriyenm pillar.

E dan kad sa Bidze SBC i kler ladan *konman the state funded media SBC* i kler ladan. Konman *the main broadcaster* Sesel ki was televizyon radyo. E Lartik 168 nou Konstitisyon i garanti lendepandans SBC konman en *state owned broadcaster and state funded broadcaster*.

*Now mon konsernen letan nou pe diskit sa Bidze tax payers* pe donn larzan sa kantite larzan en *state funded broadcaster*, fer sir ki son lendepandans i ganny mentenir. Mon konsernen avek detrwa keksoz. Enn;- se laliberte lekspresyon pou ki SBC i kapab fer sa ki i annan pou li fer san lenterferans politik, lenterferans Leta dan

son travay. Now eski ou kapab dir nou ki zot pe fer?

Eski i annan *finding* pou zot kapab fer serten *awareness*? Ouswa menm fer serten diskisyon avek Gouvernman e osi avek Egzekitiv e osi avek *the Media Commission*, ki regilariz zot pou ki pep Seselwa i kapab ganny premyerman sa *diversion views* ki pe demande. Ganny li pli byen. Mon pa pe dir zot pa pe fer, me ganny li pli byen.

E ki *Media Commission* osi zwe en pli gran rol. So eski dan sa Bidze zot annan *something* ki zot pe fer?

Apre i annan sa *issue* programm *CEO*. Mon'n tann ou dir taler zot pe met larzan dan programm. Me *United Seychelles* nou'n ofer ou en programm *free*. E sa i apel nou *Live Press Conference*. Eski dan sa Bidze zot annan provizyon pou ki nou kapab re etabli *The Live Press Conference*, pou zisteman kapab ganny *diversion views* lo televizyon *SBC*?

Pou ki serten dimoun, dimoun ki anvi vwar lezot lopinyon politik., lezot *angle* politik i kapab vwar Sesel? Akoz i devwar *SBC* konman *the state-funded media broadcaster* pou kapab anvoy *diversion*

*views* pou dimoun kapab zize zot menm.

E dezyenm e dernyen Mr Speaker i *about* Lartik 23 nou Konstitisyon konsern nou *Charter of fundamental human rights*. Now lo la i koz lo *the right to assemble, to belong to association;-* pou en dimoun kapab asosye li avek en lasosyasyon ki *be it* politik. *Be it* larelizyon and everything. I annan en konsern dan *SBC* - annefe detrwa dimoun in koz ek mwan ki mon pa konnen ki mannyer zot *view* sa.

Me vi ki nou pe donn larzan *SBC* ozordi, mon ti a kontan en pozisyon kler. Detrwa konsern dan *SBC* kot dimoun i dir ou - par egzanp mon pe koz ek serten dimoun poudir nou annan en lamars le 26, zwenn nou. I dir mwan non.

*(Interruption)*

### **HON WALLACE COSGROW**

Non mon pe koze mon pe donn li en legzanp.

### **MR SPEAKER**

*Order silvouple.*

### **HON WALLACE COSGROW**

I dir mwan non. Akoz kot i travay kot *SBC* i annan en Polisi ki pa *allow* li pou li partisipe.

Now si Konstitisyon i donn nou en drwa, me Lorganizasyon i fer en lot eski ou pa an kontravansyon avek Konstitisyon. Ki zot pozisyon lo la? E ki zot anvizaze fer *going forward*? Mersi Mr Speaker.

### **MR SPEAKER**

Mersi. CEO ou annan 3 pwen la.

### **CEO BÉRAD DUPRÈS**

Mersi pou ou kestyon Onorab. Premye ou ti pe dir lo ki diskisyon ki nou annan avek Leta ek lezot parti prenan konsernan laliberte lekspresyon SBC e eski nou annan Bidze pou sa?

Mon krwar pa si nou bezwen en Bidze pou nou kapab montre en willingness pou sa. Mon krwar tou bann parti prenan i bezwen pran zot responsabilite o serye. Enkli SBC pou nou avans nou bann ideal demokratik devan.

SBC i diskrit avek tou bann parti prenan, *stakeholder*. E Gouvernman i enn ki tre enportan. E menm parey pou vin lo sa size *press conference*, e parey ou konnen nou angaze avek parti *United Seychelles* lo sa size. Zisteman akoz nou, nou *believe* dan komunikasyon, dan en bon lentansyon pou avans bann size ki petet nou an konfli.

Se sa dan loptik ki nou SBC nou pare pou koz avek tou dan sa.

So nou pa bezwen Bidze. Nou bezwen kontinyelman dyaloge pou nou konpran, pou nou kapab aksepte ki sakenn lenstitisyon oubyen antite, i annan en rol pou li zwe. E nou bezwen respekte sertern *boundary* kot bann rol i petet kapab pe *overlap*.

E mwan lo sa bout *about awareness* mon krwar nou *very well aware*. E si ou pe get bann levensman pandan sa bann dernyen zour, nou pep, nou piblik, nou tou nou *aware*. E nou konnen bann drwa. E i byen. Par ler ki i annan bann tirayman bann tirbilans koumsa pou nou re valoriz sa bann laliberte ki petet nou pe *take for granted*.

I enportan pou petet fer detrwa konteks. Nou'n fer en ta lavans konman en pei dan *freedom of the press*. Nou'n arriv lo en nivo ki'n ganny kalifye o. Nou bezwen fer sir ki nou pa rekile. E tou *stakeholder* i bezwen annan *double commitment* mon krwar pou nou fer ki nou kontinyen avanse.

E se sa ki SBC osi i bezwen ler i ganny *feedback* gete kote i kapab fer pli byen. Pou li amelyore pou kontinyen kit nou dan sa standar. E nou get nou

avan ki nou, nou kapab fer. E mon ekspekte lezot parti prenan i gete ki zot, zot kapab fer.

E zisteman lo sa *issue of press conference* mon pou demande ki *United Seychelles* i osi gete ki i kapab fer. E wi drwa pou lasosyasyon, drwa pou pas lo - pou sa, *SBC* in montre son *commitment* pou ouver son platform pou *diversion views*. Whether i parti politik, whether it is *press conferences*.

Mon krwar si nou demann lobzektivite e *fairness* dan tou, annou gete akoz ki *SBC* pa pe fer li *live*. E *SBC* in kit li *open for you to come and do it ...live* ki still kapab pas sa mesaz ki neseser dan en konteks ki editorial ki kontrole. So nou pare pou nou diskite. Nou pa'n ferm laport parey nou pa'n ferm laport ek personn. Nou la konman *public broadcaster*. Alors annou dyaloge pou nou kapab fer ki i annan en *output* ki *come*, ki akseptab.

Premyerman pou nou ...ki tonm dan nou responsabilite legal. Ki demann nou pou nou kapab fer ki, nou annan en serten responsabilite pou fer ki nou pa pe al an deor bann norm demokratik ek respe pou lezot.

*Right of association* pou bann staff *SBC*. *SBC* ti fer sorti

son Polisi lo sa size avek bon lentansyon e bon rezon. I konmans depi mwan oubyen *Board*. Kot nou bezwen dan sa konteks kot nou ete, *careful* ki nou annan en separasyon tre kler ant nou pozisyon personnel politik si nou menm nou annan, *versus* nou travay ki nou pe fer.

E dan sa devlopman demokratik ki nou ladan i ti tre enportan ki nou ankadre sa avek nou bann staf zisteman pou evit bann kritik *SBC bias* son bann dimoun, son bann zournalist, eksetera. Depi son *CEO* oubyen lezot. Pou anpese ki ler nou pe fer bann kritik koumsa, baze lo serten aktivite politik partisipasyon nou bann *staff*, ki i pa anmenn nou Korporasyon *into disrepute*.

E zisteman i annan ki pou rode menm, si sa dimoun i fer sa ek son bann lentansyon. Pou servi sa pou akiz *SBC* konmkwa i *bias*. Or emparsyel. Sirtou pou servi sa staff pou dir sa. E ki an rezulta *unfairly undermine* kredibilite nou Korporasyon.

So wi i annan *the right of association* me i annan responsabilite osi ki vini avek sa *right for association*. E sa Polisi i ankadre sa byen. Mersi Onorab.

**MR SPEAKER**

Onorab pa monopoliz letan silvouple. E si ou annan klarifikasyon annou pa antre dan en deba lo bann size ki ou'n leve. Onorab.

### **HON WALLACE COSGROW**

Non Mr Speaker ditou nou pa pou antre dan en deba. Zis en keksoz ki *CEO* in dir mwan an se ki konsern *press conference*. Mr *CEO* nou angaze pou nou diskit avek *SBC* pou nou kontiny nou *press conference* lo *SBC* dan en sitasyon *live*. Kot napa edit okenn *editing*. E nou pare pou pran okenn *liability* si i arive demen bomaten, ki annan keksoz ki ganny dir akoz nou konfirmen, nou konnen. Konmsi nou asir le kou ki sa ki napa personn ki pou *challenge* nou. Ni ankour e ni *SBC* pa pou ganny *challenge*. So nou, nou pare nou.

Nou ava kontinyen sa konversasyon e nou ava kapab *re install* nou *live press conference* lo *SBC* tre byento, si *SBC* i *ok*. Mersi bokou Mr Speaker.

**(APPLAUSE)**

### **MR SPEAKER**

*CEO* in not son langazman mon asire. Mon a kontinyen. Onorab Georges.

### **HON BERNARD GEORGES**

Mersi Mr Chair. Bonn apre midi *CEO* e ou *panel*. Mr Chair permet mwan pou dir avek *CEO* ki mon plenny son sor dan plizyer fason. Premye fason se *SBC House* ki i paret in ganny konsevwar, san annan en lespri lo lafason ki i pou ganny servi.

Akoz si mon konpran byen i pa en *optimum us of space*. E donk pou annan plis kou pou transform sa batiman ki nef, pou fer li vin enn ki apropriye pou travay *SBC*. E sa i montre definitivman en defayans *at some point* dan konsepsyon sa batiman. Pa kapab met sa anba laport *LDS*, akoz pa nou ki ti la ler sa *building* ti ganny konsevwar.

Alor nou bezwen met responsabilite la kot i ete.

Me mon annan en sizesyon Mr Speaker. E i paret ki lo R32milyon ki *SBC* in demande zot pe ganny 3 pou fer sanzman pou sorti Hermitage pou vin Union Vale.

E donk pou sa bout larzan ki manke, mon pe propoze ki le 26 Novanm ler zot desann anvil, anmenn en pti bwat larzan, e pas en laket. Pas en laket partou kot zot pase dir dimoun kontribye en larzan. Apre zot ava donn sa avek *SBC* pou *SBC*

kapab fer sa mouvman ki i bezwen.

La dan sa ka nou a kapab dir zot lamars ava avek en bi nasyonal.

**(APPLAUSE)**

### **HON BERNARD GEORGES**

Mr Speaker lo lapar nou *caucus* mon anvi dir avek *CEO SBC*, ki nou konpran tre byen difikilte ki *SBC* i annan. E si nou kritik *SBC* se pa akoz nou pa kontan *SBC*, set o kontrer akoz nou kontan *SBC* e nou anvi ki *SBC* i amelyor son fason fer.

Mwan menm mwan mon en zanmi *SBC* parey ou konnen. E otan ki mon kapab mon partisip dan sa ki *SBC* i ete. E i vre ki pou la pli gran parti travay *SBC*, se en travay ki apropriye e ki byen.

Zot bann programm ki zot pase i byen e dimoun i aksepte. E ou menm ou ou'n aksepte ki *SBC* pa parfe. E i annan serten defayans. E mwan mon pe apel nou piblik, pou pa *focus* telman lo sa bann defayans *although lanatir imen se pa vvar sa ki bon. Me focus lo sa ki mal. E sa se la fason ki nou ete.*

E mwan menm mwan ler mon get nouvel. E i annan en problemm dan nouvel swa i an retar pou komanse oubyen i

kase dan en bout. Oubyen sa *video feed* pa antre. Mwan menm mwan mon konplent parey mon konnen nou tou nou konplent. Me kekfwa nou devret aksepte ki bann defayans pou la. Me bann defayans pou la selman si zot *improve*.

E nou demann *SBC* pa kay lo lefe ki personn pa parfe. Me *improve* mon konnen perfeksyon nou pa pou arive gannyen. E malgre ki nou annan en *Chairman*, en *Board*, en *Management* ki anvi fer keksoz byen, i pa toulstan posib dan bann kontrent finansye. Bann kontrent leksperyans, bann kontrent zournalist eksperyanse eksetera. E sa nou konpran tre byen.

Me nou pa kapab Mr Speaker si nou aksepte sa, aksepte osi ki i annan problemm avek laliberte lekspresyon. E mon krwar nou devret isi dan sa Lasamble fer sa tre, tre kler. I pa akoz en dimoun i kritik *SB* pou en keksoz ki in fer. Ki nou pe dir nou pe annan en latent a laliberte lekspresyon. Pa sa ditou.

Laliberte lekspresyon parey nou tou nou konnen i pa en laliberte san kontrent. I annan serten limit. E si Gouvernman i dir avek *SBC*, oubyen en manm piblik i dir

avek SBC sa ki zot pe fer mon pa dakor avek, se pa en latent a laliberte lekspresyon. Se si ou dir avek SBC pa fer en serten keksoz, oubyen fer en serten keksoz se la ki ou pe antre dan *editorial independence SBC*.

E sa pa akseptab. Me sa pa'n arive. E mon konnen ki ou *CEO*, ou *Board* ek ou *Management* pa pou les sa arive. E si zot ti'n vwar ki ti annan parey i pe ganny sizere par lot kote latab en attempt pou *muzzle* SBC lo laliberte lekspresyon, mon sir ki ou ti'n deza anvoy ou let *resignation*. E si ou pa ankor fer li savedir ki sa pa ankor arive. E tou keksoz i byen. Alor-

### **MR SPEAKER**

Pa tro long Onorab Georges, silvouple.

### **HON BERNARD GEORGES**

Mon le fini avek sa parol, eski-eski olye les tousala arive eski SBC pa ti devret li menm li *take the bull by the horns*. E fer en lotokritik? Pa parey ou fek mansyonnen.

Me *openly* lo televizyon pou ki tou dimoun i vwar. E mon ava dir ou kote mon'n ganny sa lide. *BBC World Service* i fer li. En fwa tou le semenn i annan en programm apepre 15 minit kot on *air*

*Management* SBC i pran tou bann kritik ki zot in resevwar e zot menm zot, zot adres sa bann kritik.

Zot eksplike wi sa i en defayans. Ouswa non nou'n fer li pou tel rezon. E mon sir ki si zot fer sa tou sa bann problem ki nou pe koz lo la ozordi i ava dispartet. Akoz nou pou vvar zot devan *camera* zot menm zot pe aksepte kot i annan defayans.

E zot menm zot pe defann kot kritik i mal plase kont zot. La, la mon sizesyon ozordi *CEO*. E mon ti a kontan tande si ou krwar ki i ava en bon lide pou fer sa. E si ou krwar ki an fezan sa nou ava kapab tir en pe sa move persepsyon ki annan lo SBC. Mersi Mr Chair.

### **MR SPEAKER**

Mersi. *CEO* i annan en pwen ki'n adrese direkteman pou ou reponn. Ou annan laparol.

### **CEO BÉRAD DUPRÈS**

Mersi Onorab pou komanter. Mon pou dir lo bout kot kritik pa en latanta laliberte lekspresyon. Mon krwar nou lo menm paz. E ki nou pe sey e nou pe kontinyen fer pou nou donn lespas, pou nou kapab ganny sa bann *feedback* dan en

fason ki byen, pou nou kapab amelyore.

Sa i nou *commitment*. Sa i sa ki nou anvi vwar konman zesyon ek gouVERNANS SBC. E dan sa konteks, sa programm mon konn tre byen lo *BBC*. Nou pou pran li an konsiderasyon. *At the same time* en pe parey nou ganny dir annandler nou pe tay en pe tro vit oubyen nou pe fer keksoz ki pa tonm dan kad ki vin byen. Nou bezwen konmans *somewhere*.

E fotespere si nou konmans sa programm ler i konmanse, petet li osi ava annan son kontrovers. Mon krwar i enportan ki nou lodyans i konpran ki nou pe konmanse. I pe ganny zermen, pou nou arive dan en sityasyon kot tou parti prezan ek SBC espesyalman, i bezwen kapab konpran ki ou bezwen kapab resevwar kritik e aksepte kritik. Akoz sa ki pou fer ou avanse. Mersi Onorab.

### **MR SPEAKER**

Mersi. Onorab Loze.

### **HON JOHAN LOZE**

Mersi Mr Speaker. Mr Speaker mon krwar mon bezwen dir CEO ki SBC i lo bon semen. Akoz si ou antre dan en lasal plen ek politisyen, e tou le de kote ou a krwar pa tro, tro

kontan ou, *you must be doing something right*.

Mr Speaker les mwan konmans dan sa fason. Leta *unfortunately* son pouvwar i preski absoli. E sitwayen bezwen ganny proteze kont sa pouvwar Leta li. *From rather*. E SBC dan son rol katriyennm Leta, katriyennm *pillar whatever* mon tann dir konmela tanzantan, i annan li en rol lenformasyon, me osi pou servi pou ede dan proteksyon sitwayen.

So Leta pa fer en pti kritik li lo *SBC* parey Anne-Marie Marie i mont lo rezo sosyal i fer en kritik kont SBC. Letan Vis Prezidan i somonn SBC, State House *in the seat of power* sa pa en pti kritik ki Anne-Marie Marie in fer sa. La i en latanta. *The very fact* ki lenstitisyon Leta avek son pouvwar absoli, in nobou somonn ou, la i en problemm.

So mwan kot mon le vini, ki mon le konnen avek SBC, eski zot SBC zot pou pare pou defann zot prop lendePandans fas a avek pouvwar preski absoli ki Leta i annan? Letan mon dir Leta mon *mean* Leta Sesel, Larepublik Sesel, pa LDS ni Gouvernman LDS. 2025 zot pe ale zot! *Whoever* ki pou vin apre, *whoever* ki vin apre.

**(APPLAUSE)**

### **HON JOHAN LOZE**

So letan nou koz Leta letan nou koz – eski bann ki pa konnen i kapab ekoute silvouple. Letan nou koz *nation building* nou pe koz byennet en Nasyon.

So SBC eski zot pou pare pou sers larzan atraver Bidze pour zot fer zot prop resers e vin avek bann Polisi solid ki defann dwa lekspresyon? Nou bezwen plis programm parey “Lopinyon.” Nou bezwen plis programm kot Seselwa i monte i kapab eksprim zot lekor. Nou bezwen plis program politik. Plis diverzans lopinyon lo sa platform Leta ki apel SBC. Nou en demokrasi nesan. Les sa *chaos build up!* Les arive!

As long ki i annan respe les Seselwa koze e eksprim li. Now granted ou pou dir mwan ki bezwen annan serten paramet. E se zisteman sa ki mon le pu fer CEO, si ou kapab sers larzan vin avek bann Polisi solid an beton ki ni LDS ni US ni 3enm lafors or whoever ki vini 2025 pa pe kapab kontre sa lafors lekspresyon demokratik dan sa pei Sesel *anymore!* Akoz nou pa pou kapab kontinyen parey nou pe ale la an se moman.

E Mr Speaker mon dernyen pwen ki mon le adrese.

I annan sa kestyon *press conference US* ki monte de tanzaot. Ozordi partou atraver lemonn, ou annan ou en gro deba depi *Covid* lo sa size *disinformation* avek *malinformation*.

E ou annan ou sa 3 keksoz ki nou isi Sesel nou pa ankor ganny vreman kler, kot en dimoun i kapab donn en *malinformation* pa avek move lentansyon, me in zis sorti. Ouswa in vin donn *disinformation* avek en move lentansyon. En lentansyon manipilatwar e i en pe sa bann keksoz ki mon pe dir SBC fodre zot menm zot i kler dan zot bann Polisi. Fodre i *clearly* set out.

Akoz letan en dimoun in vini in dir en keksoz i posib en dimoun in *get some figures wrong. In get a small fact right, wrong,* Prezidan i fer detanzantan. Dan son *press conference* tanzantan i arive ek Prezidan. E Speaker fek *warn* mwan pou dir pa neseserman en dimoun pe koz mansonz.

E i toultan dir mwan pa dir dimoun pe koz lalang. So SBC ou osi mon ti a kontan si ou annan Polisi kler ki fran lefe *human error* e ki zot kapab annan en pli bon fason pou apros sa bann sityasyon parey konferans US.

Akoz lo sa kestyon *editing* nou konferans, nou pa anvi ler i ariv *editing* zot ganny somonn *State House*. I domaz Vis-Prezidan pa la ozordi. I ti ava reponn mwan li menm. Dernyen fwa i ti dir *SBC* pa kapab vin ek li. La osi li ki pa'n kapab vin ek zot. Mersi Mr Speaker.

### **MR SPEAKER**

Mersi Onorab. CEO

### **CEO BÉRAD DUPRÈS**

Mersi Onorab pour ou bann kestyon, komanter. Ou'n demande si nou annan Polisi solid, si *SBC* i kapab vin avek Polisi solid? Onorab mon krwar nou annan ase.

Si nou konmans avek Konstitisyon, *SBC Act*, *editorial guardlines* *SBC*, Polisi. Par egzanz lo *press conferences* or pour parti politik, nou'n ekrir ase bann *guidelines* kler lo la. Tousala i lo nou *website*. E tousala nou'n diskit avek bann parti prenan, enkli bann parti politik lo sa bann Polisi.

Alors i deza annan en platform la. Parey ou pe dir tou *build upon*. Nou parey ou pe dir i en iterasyon *to get to a better place*. Si nou tou nou konpran pou dir wi nou pou annan bann *bumps*, bann dezagreman *along the way*, me nou senser ki sa i

dan bi pour nou avans nou demokrasi, annou kontinyen travay ansanm. Konsider nou Polisi e akoz nou met li. E akoz nou bezwen fer li dan sa fason.

E parti prenan osi gete ki mannyer zot, zot kapab mars ek nou dan sa *journey*. Nou parey mon'n repete, nou pare pour nou kapab kontinyelman diskit avek tou parti prenan. *Whether it is parey ou pe dir pou defann nou lendepandans editorial, eksetera.*

Nou annan en devwar, ou'n demann nou pour nou defann nou lendepandans editorial, pou nou defann lendepandans *SBC*. E mon krwar *Board* ek governans *SBC*. Gouvernans Administrasyon *SBC* pe fer sa ase byen. E nou napa swa, nou'n mandate pour nou kapab operate without interference of political bodies, the states or any other. Sa i ganny mete dan *SBC Act*. E nou, nou bezwen fer li accordingly san faver, san move lentansyon e san lafreyer.

So mon pou dir nou bezwen pran en rekil. *SBC* i annan 30an sa lannen. E pandan 30an ti ariv dan *SBC Act* 1992, ki son lentansyon ti pou fer li vin en *Public Service Broadcaster*. Mon krwar nou a fer nou prop analiz. Nou'n tat tate pou arive.

Me zisteman akoz sa bann *struggle* pou fer ki nou annan – mon kontan pou dir nou bezwen koz lendepandans *SBC*. Son lendepandans editorial e tou lezot keksoz ki vin avek dan son rol dan 4enm demokrasi, nou bezwen rekonnet ki i annan en ta travay ki'n ganny fer sirtou pandan dernyen lannen.

E pa zis par *SBC*. Bann politisyen ki'n fer ki nou annan en fason pli byen, pour nou kapab apwent *Board SBC*. CEO eksétera ek tou lezot lankadreman ki annan pour *allow* nou. Rekil ki nou bezwen fer se *take stock of where we are*. Bann *achievement* pozitiv ki nou'n fer, both pour *SBC* dan sa domenn.

E annou annan en langazman pour nou tou kapab fer pli byen e donn nou bout pour nou kapab ede pour sa avanse. Sa ki mon pledwaye pour tou bann parti prenan. Onorab, mersi.

### **MR SPEAKER**

Mersi. Annou pa prolonz deba. Onorab si ou annan klarifikasyon, wi ?

### **HON JOHAN LOZE**

CEO mon respe lefe ki ou deza annan ase Polisi an ekrir. Be selman letan mon pe koz ek ou

lo prezervasyon ou lendepandans. Ou avek ou *Board*, si ou ti annan ase Polisi ou Polisi ti pou'n nobou permet ou debout sa ki ou ganny somonn *State House*. Se sa ki mon pe sey dir ou. Se la ki mon anvi ou arive.

E si ou'n nobou fer sa mwan mon pou debout akote ou pour ou vin sa *Public Broadcast Corporation* ki ou pe dir mwan la. Mon ava siport ou *along the way, all the way*. Selman si ou, ou kapab defann ou lendepandans atraver politik.

### **MR SPEAKER**

*CEO* ou annan pou azoute lo sa? In fer en rekomandasyon, mon pa konnen ki mannyer pou apel li. Ki ou pozisyon?

### **CEO BÉRAD DUPRÈS**

Mersi Onorab. Mersi pour ou rekomandasyon. Mon krwar mon'n reponn dan mon premye lentervansyon ki nou annan ase lankadreman pour nou kapab *operate libreman*. Si mon kapab donn ou en lot garanti, sa *CEO* sa *Board* pa pou les li ganny okenn lenfliyans politik *one way or another*.

E nou pe fer nou travay, avek sa *mindful* tou le zour. E nou fer li dan en fason obzektif. Parey mon'n dir *without fear*

*without favour, without malis. Despite the criticism or lezot keksoz. Si nou pou angaz nou avek State House akoz in demann nou pour vini. Nou pou fer li, akoz nou anvi ganny en langazman pozitiv avek tou nou bann stakeholder.*

Nou ganny en diskisyon fran, nou met nou bann pwen devan. E sa i form parti diskors demokratik. As long ki nou konpran kote nou bann paramet, nou bann *boundary* i ete. Mon krwar sa i ava ede ki si nou pa ti pou koz ek kanmarad ditou. Mersi Onorab.

### **MR SPEAKER**

Mersi. Bon mon ti a kontan *move on*. Onorab Vidot.

### **HON AUDREY VIDOT**

Mersi Mr Chair. Mr Chair mon pou ranforsi lo kote *staffing*, bann *challenges*. CEO letan ou'n ganny dir petet pou aksepte kritik ek piblik, mon le met lanfaz lo kote *staff*.

Akoz ou'n dir ki ou pa mal *challenge* ki zot montre pour *retain* novo. Bann ki annan bann novo talan, bann novo *set of skills*. Sa i bokou fwa arive akoz parfwa letan ou ganny bann ki novo ki antre, i pa neseserman zis *package* ki fer zot ale oubyen pou reste.

Me osi la lanvironnman kot zot travay. E mon konnen SBC zot annan en kantite bann *staff* ki lontan in la, espesyalman bann teknisyen. Me petet mon le met lanfaz dan serten sa bann seksyon. I annan *staff* ki ankor *still* petet kantmenm i seye vin devan pou met konsern, me apre zot vwar zot ganny penalize. E sa i anpes zot vin pli devan pour zot koze ki bor defayans i ete.

E ler novo *staff* i vini i vwar sa, se pour sa rezon ki zot ale. Zot pa reste akoz zisteman zot vwar ki mannyer bann ki la, akoz zot kontan zot louvraz bann ki la lontan, ki ou war ki zot reste. Me par kont parfwa lo nivo *Management* oubyen *senior* zot bezwen regard en pti pe serten sa bann seksyon ki annan bokou *staff turnover*.

Si zot regarde bann dimoun ki lontan in la pete dan sa serten seksyon, ki zot vwar zot perdi sa bann dimoun avek bokou leksperyans ki kapab partaz avek en zenn ki antre. So petet lanfaz i ganny mete ladan.

E dernyerman baze lo bann pwen ki lo sa kote latab in met devan ou CEO, eski ou kapab asir nou ki le 26 okenn *staff be it* en teknisyen oubyen zournalist ki santi ki i annan son drwa son lopinyon i zwenn nou lamars nou asire ki i pa pou

perdi son louvraz letan i retourne travay son Lendi? Mersi

### **MR SPEAKER**

Mersi Onorab. CEO?

### **CEO BÉRAD DUPRÈS**

Mersi Onorab pour ou kestyon, ou bann komanter osi. Mon a pran lo kote *staff welfare* ek ankadreman *staff*. I konsern mwan *statement* ki ou'n fer, e i konsern mwan si i ganny zeneralize. Me nou ti a kontan ler i ganny zeneralize, nou ganny legzanp - petet bann legzanp ki ed nou pour nou kapab adres li en pe pli pwenti dan bann konteks ki ou'n mete.

I pa lentansyon *Management SBC* pour penaliz personn pour lev zot *issues* ki valid. Nou obzektif, enn nou bann vizyon se pou *être* en anplwayer ki atrakte e *retain skills and talents*. E nou pa kapab pe *undermine* sa avek pinizasyon pour lekspresyon lopinyon ki zot annan.

Nou ti ava kontan ganny en legzanp pour nou tou *management* annan tye aprann sa e *rectify* si i annan. Nou pa pe dir napa mon dir pou dir i byen ki nou get tou son konteks ek son fe *around it* avan nou fer serten – pran serten pozisyon lo sa bann kritik.

Wi nou annan *staff turnover* in *pick*, in desann. E nou lentansyon se pou kit li *down* pour nou kapab *retain* nou bann *talent* akoz zot annan valer pour nou. E ankouraz nouvo dimoun pou vin *SBC*.

Dan sa konteks mon krwar i annan bokou legzanp kot sa bann ki'n menm ale in anvi retournen, pour diferan rezon, e pour li sa i en lendikasyon osi ki *things are not that bad* parey pe ganny prozekte.

*SBC* i bezwen bann *skill set* ki vre mon kapab dir, pa inik me selman spesyalize pour li kapab kontinyen avans devan e i pa ede ler nou pe donn en lenpresyon ki petet pa ankouraz dimoun pour zwenn nou, avek serten persepsyon ki *deza out there*.

Nou, nou bezwen fer en bon pe travay, pour nou kapab prozekte e fer ki larealite dan *SBC* i en landrwa *condusive* pour *nurture talent*, ankouraz dimoun pour zot developman. Me nou bezwen rekonnert osi ki nou bezwen annan en lorganizasyon kot i bezwen annan serten *professionalism*, serten fason fer, ki napa lese fer.

E petet osi sa i mesaz pour dir ki nou anvi *recruit* dimoun ki profesyonnel e *retain* nou

bann *talent*. So mersi pour ou *feedback*, nou ava gete. Mon le fer pwen ankor ki SBC i zis sel lenstans dan pei kot i annan li en *staff representative* lo son *Board by law*. I annan plis – lavenir pour *staff raise* zot bann *issues*.

Nou annan nou en *head of HR* ki pe fer en bon travay of ou kapab dir akonpannyan nou bann *staff on there issues that they have*. E nou annan lezot lenstans dan nou Administrasyon pour nou get tou bann *issues staff*. E pour mwan mon kapab dir ou *staffing issues* i pran en pli gran parti mon letan. E avek lentansyon pou adres li dan en fason byen.

Garanti ki ou'n demann mwan pour ki *staff* pa perdi zot travay si zot zwenn lamars. E mon'n mansyonn nou Polisi, nou Polisi i kler. E pa kestyion ki lamars *from whichever side*, ki nou pour bezwen annan serten gidans lo la pour nou bann *staff*. E i kapab lamars from any *political parties* e dan ki loptik i ganny fer.

E mon sizere ki i pa pou premye lenstans kot nou pou dir nou pou pou dimoun, akoz in al marse. Mon krwar i bezwen annan en diskisyon avek konpran ki zot rol dan medya. Persepsyon *of being*

*impartial*, i enportan depandan kote ou ete dan ou pozisyon dan SBC. E se sa ki enportan.

Ler ou'n donn en lendikasyon sa pti gin pep 80mil-100mil dimoun kot ou ete politikman, ou pe konpromiz dan lizye sa pep ou pozisyon emparsyalite. Se sa ki nou anvi proteze. Pa zot drwa pour lasosyasyon e zot drwa pour annan en lopinyon politik. Mon pa kapab fer lanfaz ki mannyer sa i enportan. I konmans avek mwan, nou bann *seniors* ek tou bann *staff SBC*.

Parey lezot Polisi BBC i fer *the lower, the more out of the limelight you are the likely you are* – I vin avek sa desizyon pour ou travay pour the *National Broadcaster* sa. I form par ou responsabilite sa. I pa en penalti pou dir ou napa drwa al en lamars oubyen non. I en keksoz ki vin segonder.

Ou personnelman ou bezwen deside ki mannyer ou bezwen vwar ou. Ou bezwen ganny vwar avek ou lodyans konman reprezantan *the Public Broadcaster*. Mersi Onorab.

### **MR SPEAKER**

*Thank you CEO. Onorab Pillay.*

### **HON SEBASTIEN PILLAY**

Mersi Mr Chairman. Premye pwen ki mon le adrese Mr Chairman petet zis adres sa pwen *regarding* serten komanter ki'n ganny fer. Konsern letan nou fer lamars nou pas ek en bwat laket.

Mon krwar i vreman dezapwentan pou vvar en dimoun avek sa serten nivo ledikasyon, ki ozordi i ansarz Zafer Gouvernman dan Lasanble fer en *statement* kot se Gouvernman ki sipoze pe met larzan dan Bidze. Ki mannyer nou kapab espekte en parti politik al fer lamars pou fer sa. Mon vvar sa vreman dezapwentan.

### **MR SPEAKER**

Onorab annou pa konmans fer lakizasyon kot lezot Manm silvouple.

### **HON SEBASTIEN PILLAY**

Dezyenmman Mr Chairman an relasyon avek sa ki *CEO* in dir lo son bann Polisi. Mr Speaker mon Onorab Georges in koze mon pa'n mon pa'n enteronp li.

### **MR SPEAKER**

Non, non i pa'n soz ou li.

### **HON SEBASTIEN PILLAY**

Wi be in fer son pwen li, les mwan fer mon pwen.

### **MR SPEAKER**

Silvouple fer ou pwen, me pa akiz lezot Manm. Mersi.

### **HON SEBASTIEN PILLAY**

Mon pa ava akiz lezot Manm, me selman in sey abes nou e mon krwar i pa fer sans. dezyenmman Mr Chairman ler *SBC* i dir mwan i annan Polisi pour li pa fer *self-censorship*. *Ok?* Mon ti a kontan konnen dan sa Bidze eski zot annan larzan pour zot fer *capacity building*.

Akoz pour mwan i *self-censorship* ler *the state broadcaster* ki ganny en proteksyon Konstitisyonnelle i ganny somonn *State House* pou al reponn kestyon lo en programm ki apel "Lopinyon", kot piblik pe donn lopinyon.

E la i enportan Mr Speaker ki mon etablir byen konteks. I annan plizyer programm "Lopinyon" ki'n atak parti politik ki mwan mon reprezante. In atak nou rikord pandan sa 43an. In atak sa ki'n pase.

In atak endividé dan mon parti. Zanmen nou'n deza somonn ou pou vin *Maison Du Peuple* pou dir ou pa fer sa. Zanmen nou'n deza fer sa. Sa in ganny fer par en Gouvernman *LDS* ki li menm, li i ti fer lamars pou demann ek *SBC* pou rapport

lo sa ki bann dimoun dan Gouvernman pe fer !

Get ki mannyer i annan en lipokrizi enteresan ladan la. Nou zanmen nou'n deza somonn ou. So ler ou dir nou pou dir ou annan Polisi pou pa fer *self-censorship*, mon ti a kontan demann ou akoz zot in aksepte en somonn pour zot mont *State House* al reponn en kestyon lo en programm ki apel "Lopinyon". E ki dan lopinyon tou dimoun, i en lenterferans direk dan lendepandans bann zournalist pou fer zot louvraz? Sa i premye kestyon.

Prezan 2enm kestyon ki mon ti a kontan klarifye. SBC i regroup bann zournalist. BBC osi i regroup bann zournalist. E L'Angleterre ler bann zournalist L'Angleterre i proteste tou zournalist i annan dwa proteste. Sa ki dan BBC, sa ki dan *Skye*, sa ki travay avek en lot *broadcaster* i ganny dwa fer. Sesel ler Mr Gilly Jean ti ganny sispann *Les Seychellois Hebdo* ti ekrir en gran lartik lo la vizavi SBC. Mon pa'n tann le *Seychellois Hebdo* koz ankor lo la. Mon pa konnen si in nepli anvi koz lo medya.

Me sa ki enteresan - sa ki enteresan bann zournalist SBC, eski zot annan dwa osi pou eksprim zot lekor an relasyon avek desizyon *Board SBC*, pou

ganny somonn *State House* pou al reponn en kestyon. Akoz nou pe donn ou en Bidze R120milyon pour être endepandan e *broadcast* sa ki pe pase dan Sesel mannyer SBC i choose to broadcast li dan tout lendepandans? Se sa mon pwennvi la mwan.

Eski bann zournalist SBC, bann travayer SBC i annan dwa osi proteste. Pa pou vin ek en parti politik me pou fer zot prop protestasyon an relasyon ek sa? Rezon mon demann sa kestyon Me Chairman. Petet ou a ed mwan byen etablir sa. Yer mon'n vwar en *posting* lo rezo sosyal par en CEO, ki'n dir pa akoz i en CEO dan Gouvernman ki i napa son lopinyon.

Me selman mon'n osi ganny mesaz sorti kot en travayer dan servis piblik ki'n met en *post* lo *Facebook* ki son PS in *call* li, e dir li aret met sa bann post lo *Facebook*. Savedir i annan en problemm ki pe pase la.

E mon pa ti a kontan ki dan SBC menm lapros pe ganny servi. Akoz mwan mon pe dir ek tou dimoun, si ou anvi desann le 26 pou vin lamas desann personn pa pou kapab fer ou nanryen.

So mon kestyon pour ou CEO, eski when it comes to Governance and

Administrasyon. *Governance* and Administrasyon SBC, eski *Board SBC* i konsider son lekor endepandan oubyen eski *Board SBC* i santi pou dir i bezwen fer *self-censorship* lo keksoz ki pase dan pei? Mon 3enm e dernyen kestyон.

### **MR SPEAKER**

Non, non i fer 3 la. Ou pe al 4. Ok termin avek ankor enn Onorab.

### **HON SEBASTIEN PILLAY**

Mon dernyen pwen Mr Chairman, mon ti a kontan met sa lo rikord, ler nou ganny dir pou dir SBC i pare pour li al ver bann programm ki donn diverzans lopinyon. Mon'n tann en Onorab dir ou ki ou devret pas zis bann bon nouvel dan pei. Mon pa konnen ki savedir bon nouvel dan pei. Ki i pe sey dir ou par bon nouvel. Me selman mwan mon konpran pou dir ou bezwen pas nenport ki nouvel.

Mwan mon pa neseserman satisfe toultan ler SBC i rapport mwan dan nouvel, mon konplent, be mon bezwen aksepte pou dir zournalist i endepandan, so mon konplent fini la. Akoz alors, ki SBC pe ensiste, pa zis pour *United Seychelles*, akoz ki SBC pe ensiste pour pa donn lezot parti

politik dan Sesel loportinite pou vin lo *live TV* e donn zot lopinyon - i kapab en lot lafors politik. I kapab en lot groupman politik - donn li pour vin *live*.

Akoz okenn dimoun Mr Chairman pa pou aksepte pou vin lo SBC pou fer *delayed broadcast*. Akoz si ou pe al *State House* ozordi pou reponn kestyон lo en programm ki apel "Lopinyon", then person pa pou trust ki ou pa pou al ankor *State House* pou fer *editing* lo en programm ki apel *live press conference One Seychelles*, *Live press conference* sa lot, *Live press conference* Mouvman Seselwa. *Live press conference United Seychelles*.

So anba Bidze ou annan larzan pou fer *programming*. So eski sa i permet ou pou fer sa an tout laliberte ozordi ? Mersi Mr Chairman.

### **MR SPEAKER**

Mersi. CEO mon espere ki ou'n sezi tou bann pwen. Annou sey terminen lo la akoz letan pe kit nou.

### **CEO BÉRAD DUPRÈS**

Mersi Onorab pour ou bann pwen. Mon'n sey *catch-up*. Petet mon a pran enn dernyen akoz nou'n koze lo sa bout *live TV*, *live broadcast*. Annou pa konfiz *live broadcast* avek akse ki SBC

i donnen, e pou kontinyelman donnen pour tou parti prenan dan en fason *allow* nou demokrasi you *flourish*.

Sa mon krwar mon'n fer. Nou'n fer li direkteman avek zot an ekrir, e nou'n met en pledwaye avek zot lo la. E *SBC* ki ti fer ki i annan en Polisi pour *live conferences* e in met son bann kriter lo la. Anliny avek sa ki *SBC Act*, son gidans editorial i demann li pou fer. Ki nou pe fer e *live* i ganny fer dan sa kad. Nou ava kontinyen. Si i pa ganny fer dan sa kad nou annan en responsabilite pour nou adres li.

Mon krwar i annan en konfizyon ant *SBC* angaz avek bann *stakeholder*, al *State House*. Apel li somonn. Avek en persepsyon lo ki'n ganny dir *Board* ek ladministrasyon *SBC* pa endepandan. E petet nou bezwen konpran pou dir zisteman akoz nou endepandan i pa *allow* nou to *operate with impurity*. Nou bezwen ekout nou bann parti prenan, *stakeholder*. *Whether it is you or the Government*.

Akoz nou annan en devwar servis piblik *amongst other* – de fwa. E nou'n vwar li koman nou devwar, pour nou asize ek okenn parti, okenn *stakeholder* ki anvi koz ek nou lo nou rol.

E pa pran sa konman en kapitilasyon *Board* ek *Management* ki nou pou bezwen ganny presyon politik. *Otherwise* mon kapab dir nou pa pe pran presyon politik, akoz nou pa devret pe pran presyon politik, Onorab. Sa i dan *SBC* – i dan Konstitisyon e dan *SBC Act*. Koze avek nou bann parti prenan, angaze pour nou avans devan wi nou bezwen fer li. Akoz nou lendepandans i dikte more so, more *scrutiny* by nou bann *stakeholder*. Parey pe arive la.

So nou *SBC* nou *open to dyalog* ki respekte nou lendepandans tout an travay avek nou bann *stakeholder* pour nou avans – pran zot konsern on *Board*. Avans nou Manda ek respektivman zot manda pour benefis nou pei. E se sa mon kapab fer en somer lo la Onorab. Mersi.

### **MR SPEAKER**

Mersi. Ok Onorab annou dakor pou dir nou'n fer en kantite deba lo sa bann pwen. So si ou le klarifye en pwen ki kekfwa *CEO* in manke, silvouple be annou pa prolong deba silvouple. Yes Onorab.

### **HON SEBASTIEN PILLAY**

Mersi Mr Chairman. Mr Chairman dan mon resers avan

mon demann sa kestyon lo *self-censorship*, mon'n regard plizyer lasenn medya. E i annan en konsep parmi bann medya dan serten pei, kot medya li menm li *without* ki i ganny *censored* i santi pou dir i annan serten keksoz ki i bezwen fer akoz sa i satisfer sa *status quo*.

Prezan mwan mon problemm avek sa se ki ler mon pe donn ou Bidze pou fer *programming*, mon pa oule ki SBC li menm li i devlop en konsep *self-censorship*. Re asirans ki mwan mon pe rode avek SBC an traver ou ozordi ki enportan – dan sirkonstans ki nou pe koz lo la. Akoz ou parmi bann dimoun ki apwent *Board SBC*. Menm si ou en *Leader* parti politik ozordi ou apwent bann dimoun lo *Board SBC*, ki mon krwar i enportan ki nou get sa byen la.

Si nou le vreman SBC i endepandan, premyerman petet probableman ou, ou pa devret pe apwent dimoun lo *Board SBC* koman *Leader* parti politik. *That's another - sa aside*, Me selman SBC i bezwen kler ek mwan *regarding* ou *Policy Construct*. Pour en Bidze 120milyon ou bezwen dir mwan pou dir ou endepandan.

E premye keksoz ki pou montre mwan ki vreman ou endepandan, se ki ou pare pou

*allow* bann parti politik *live broadcast* lo televizyon. Se sa ki enportan. E si sa bann parti politik i lalang. Se sa bann parti politik pa pe koz laverite Gouvernman vini vin reponn.

Mr Speaker mon pou dir en dernyen keksoz. Apre ki bann zournalist in fer zot -.

**MR SPEAKER**

Onorab ou ti sipoze lo klarifikasiyon.

**HON SEBASTIEN PILLAY**

Be mon bezwen zis met mon keksoz an konteks Mr Speaker.

**MR SPEAKER**

Lo klarifikasiyon silvouple, sansan zanmen nou pou fini.

**HON SEBASTIEN PILLAY**

Speaker annou get sa an konteks. Zournalist i fer zot protestasyon, aktivis LDS i mont lo *Facebook* i maltret zournalist. Disosye zot avek sa bann aksyon.

*(Interruption)*

**MR SPEAKER**

Silvouple nou bezwen fini sa deba – sorry sa sesyon.

**MR SPEAKER**

Mon'n bezwen permet bann lekspresyon politik, bann kestyon lo Polisi lo soz, akoz evidaman ti sa ki tou Manm ti enterese avek. Me selman i annan en limit e mon ti a kontan fini nou pe deza dan *extra time*.

So si ou annan en klarifikasyon Onorab poz li e nou a kapab *move on*.

### **HON SEBASTIEN PILLAY**

Mersi Mr Speaker, mon remersye ou pou letan ki ou'n donn mwan ou eksplik mon lekor. Sa ki mwan mon annan pou dir Mr Speaker se ki, malgre ki mon pa toulstan satisfe ek sa ki zournalisti i dir, zanmen selman mon pou maltret en zournalisti.

E mon krwar poudir sa i en refleksyon ki mon pa le pas zis pou mon kote latab. Mon oule pas pou tou dimoun, ki apre sa bann protestasyon zournalisti ki annan plizyer komanter ki'n ganny fer. Mon pwen Mr Chairman termin lo la e ki SBC pa *self-censor* son lekor se tou.

### **MR SPEAKER**

*Thank you. CEO in ou'n deza adrese lo self-censorship.* Eski ou anvi met en mo la, me mon *remind* ou osi ki nou *out of time* dan sa sesyon. *CEO?*

### **CEO BÉRAD DUPRÈS**

Mersi Onorab. *I think context self-censorship kekfwa i la.* I pe dir an rezulta sa ki *Leader Lopozisyon* in dir konman en somonn. Be nou bezwen rekonnet poudir SBC i annan en devwar pou li get sa ki li i pe fer kontinyelman *on a day-to-day basis*.

Fer ki i tonm dan son gidans editorial e ki i byen, i pa pe *cause undue harm to anyone*. E sa nou fer li toulstan sirtou ler nou ganny *feedback* by okenn *stakeholder* enkli i sorti kot ou Onorab, nou pran sa serye.

E si nou pou pran li dan sa konteks, mon krwar i enportan pou nou *continually review* nou bann konteni e demann ou lekor si nou'n fer byen, si nou kapab fer pli byen. Me pa an rezulta parey petet i pe ganny fer konotasyon akoz presyon politik.

Me zisteman Onorab mon en pe konsernen akoz ou osi ou'n mete ou dir nou pe al dir nou pe donn Bidze. E eski ou pou *allow live press conference*?

Onorab nou pa kapab *link* desizyon editorial SBC avek *funding*, i mal. E nou bezwen – si nou anvi nou tou parey nou pe koze pou nou kapab avans tou *context* SBC demokrasi, nou bezwen fer sir konnen ki bann

limitasyon. E mon pa pou kapab akoz la nou pe ganny en – pe koz lo Bidze SBC, pou mwan dir wi nou pou les *press conference* pou parti politik *live*.

Nou ti eksplike rezon akoz nou *agree to the live*. We *allowed the live for good reasons* e nou ti ava kontinyen - anvi kontinyen avek *the live for good reasons*.

E dan kad nou manda ki kler e bann limit ki nou manda osi i *allow* nou pou fer. Mersi Onorab.

### **MR SPEAKER**

Mersi. Bon fotespere nou'n kapab terminen avek bann size *issue* politik. E petet si i annan kestyon lo Bidze. Onorab Gill ou ankor annan kestyon?

### **HON CHURCHILL GILL**

Mersi Mr Chair. *CEO* parey ou konnen dernyen Bidze ler mon ti koze, nou ti annan konsern Praslin kot *coverage* i konsernen. Me selman sa letan ki mon ti demann kestyon Bidze ti'n fini fer. Alors ou ti fer mwan konpran poudir ti napa nanryen dan Bidze, so i ok.

Prezan mon pe gete pou lannen 2023 si eski i annan keksoz dan sa Bidze pou amelyor lofis Praslin? Apre pou *coverage* sa pou 2023. Apre nou dernyen pwen se, vi ki bokou

konsantrasyon in ganny mete lo *SBC House in Mahe*, ki i normal, eski ou kapab pou benefis dimoun Praslin, donn nou en nide lo plan lonterm pou sa lofis e kalite servis ki ozordi pe ganny donneen lo Praslin? Mersi.

### **MR SPEAKER**

Mersi Onorab. *CEO*.

### **CEO BÉRAD DUPRÈS**

Onorab mersi pou ou kestyon. Pou lofis Praslin an rezulta nou konversasyon ki nou'n gannyen isi menm, mon kapab dir nou'n *expand* lofis Praslin. Si ou pase ou pou war i annan de. Nou'n apropriye en landrwa nou'n fini *convert* nou pe al ladan, pou nou kapab zisteman *better accommodate* nou bann staff ek servis ki nou donneen.

So lo la mon krwar nou dan en bon semen - i en *achievement* pozitiv. E ki ava fer osi ki nou bann staff Praslin an menm tan ki nou, nou pe ganny en lofis novo, la zot annan en pe plis lespas pou fer. So sa i byen nou'n investir e sa i pou kontinyen dan *building* Fon Pasyon. Avek *coverage* nou annan *challenge*.

Parey mon'n eksplike nou *challenge* i la avek *SBC House* e *the coverage* lo Praslin, to investir pou fer *better coverage*

lo Praslin, i vreman difisil, i vreman ser.

Se pou sa rezon ki nou krwar en servis *OTT SBC*, pou *allow* sa penetrasyon *IP TV Service* ki deza annan Praslin, pou delivre servis *SBC* par *cab*. E nou'n avanse dan sa proze. Nou pe esper laprouvasyon pou nou kapab lans en *IPTV service* ki sa bann *topographical issues* bann zabitan Praslin, e menm Mahe an antye ki annan problemm pou resevwar nou *signal*. I kapab ganny li - pa *free of charge* me *data rated zero*, dan zot lakour parey zot bann dimoun pe fer la avek *Cable TV* ek *Intelvision*.

So mon pe *hope* ki nou kapab ganny laprouvasyon pou sa *OTT service*. E la nou ava *get out* bann zabitan Praslin ki napa resepsyon *DTT*, pou nou ofer zot menm kalite servis lo menm baz, ki pou fer li koumsa. E sa i pli *cost effective* pou *the future*. *Thank you*.

### **MR SPEAKER**

Mersi. Onorab Porice.

### **HON DOYACE PORICE**

Mersi Mr Chair. CEO ek ou lekip tou bann Koleg *MNAs* bonswar. *CEO* mon pou felisit Alison ek son lekip lo Praslin pou sa bon travay ki zot pe fer. E mon ti a kontan konnen si zot

in fer provizyon pou en *camera* e osi en - ou'n dir poudir lekipman i pa tro fasil la -en *soundman* pou nou kapab ganny en pe pli bon son, vi ki i annan de zournalist pou ki zot a kapab anmenn plis nouvel lo Praslin ek La Digue? Mersi.

### **MR SPEAKER**

Mersi. CEO?

### **CEO BÉRAD DUPRÈS**

Mersi Onorab pou ou kestyon. Mon hope Allison pe ekout si non nou ava pas ou *feedback*. Me pa zis Allison *me the whole team* Praslin. Mersi. *Thank you*.

Parey ou'n dir *camera* wi nou pe fer provizyon *additional camera* pou Praslin e osi nou pe fer provizyon *for a drone* pou Praslin osi, pou nou kapab fer bann kouvertir en pe pli pwenti. Lo kote *soundman* nou realize i annan en serten defayans, sirtou apre sa dernyen kouvertir sa konsiltasyon ki ti annan, kot nou'n vvar poudir pa ti bon.

Ki nou'n dir poudir ankor, si nou ti kapab nou ti pou annan *more crew on Praslin* ki *dedicated*. Me i pa *cost effective* la, dan nou bann kontrent pou annan *soundman* ki reste Praslin. Ki nou dir ler i annan gran levennman koumsa, *soundman* sorti Mahe monte. I

ava fer ki nou ganny en *better sound capture* pou nou kapab prezant sa ek lodyans. Mersi Onorab.

### **MR SPEAKER**

Mersi. Onorab Loizeau ou kestyon.

### **HON NORBERT LOIZEAU**

Mersi Mr Speaker. *Bonjour Panel, bonjour tou dimoun.* Mr Speaker mon kestyon i lo *broadcasting* bann levensman sports. Selman avan mon al lo la permet mwan fer resorti en pti keksoz, konsernan sa laliberte lekspresyon ki ozordi in rennyen dan nou pei se gras a nou parti *LDS* ki'n fer sa - nou'n travay dir. E nou pandan nou parkour politik depi letan *SNP*, nou'n fer nou pwen pase dan en fason onnet, zanmen nou'n met bonm Radyo Sesel parey zot ti fer.

*(Interruption)*

### **MR SPEAKER**

Onorab evit lakizasyon. Ale. *Order!*

### **HON NORBERT LOIZEAU**

E mwan koman en ...Wi Mr Speaker. Mr Speaker mwan konman en ansyen travayer *SBC*. Mon'n fer 8an *SBC*. Ozordi

nou pe koz bann zournalistes pe rod laliberte lekspresyon. Mazin byen bann letan ki mon ti travay *SBC* permet mwan rakont zot sa, ki ler nou ti al bann reportaz kot bann Minis, Prezidan la, zournalistes ti ganny anmennen dan lasanm, dan lofis. Wi dan lasanm kot bann Minis pou zot ganny dir ki kestyon zot pou demande!

Mwan mon'n temwanny sa kot Minis Michel ti Minis Finans, nou ti fini *set up* ti kriy sa zournalistes anmenn li anndan. E i ti dir li dan lasanm -tou landrwa ti annan lasanm sa letan Mr Speaker. E i ti dir zot ki kestyon zot pou demande.

Aprezan mon ava vin lo mon kestyon Mr Speaker. Mr Speaker mon anvi demann *CEO* dan Bidze la, vi ki nou pa pe war *SBC broadcast* bann levensman *live sports* sirtou bann final. Mon war Telesesel pe fer ek pti gin resours e zot, zot *main broadcaster* zot pa pe fer sa. Parey Sanmdi ti annan levensman *basketball* final Telesesel ti pe *broadcast* e mon pa ti war *SBC* pe fer sa.

Alors mon pe demande ki kontrent zot annan, eski dan sa Bidze i annan en alokasyon pou zot kapab anmenn sa bann levensman lo lekran nou bann dimoun, nou piblik, pou zot

kapab gete zot osi parey  
Telesesel pe fer. Mersi.

### **MR SPEAKER**

*Thank you. CEO?*

### **CEO BÉRAD DUPRÈS**

Mersi Onorab. Onorab mon krwar i enportan pou rekonnèt osi ki ler SBC in fer nou rekonnèt ler in fer. E nou'n fer detrwa *live* si ler nou pe fer Telesesel pe fer. Oubyen ler Telesesel pe fer nou pa pe fer, petet sa i en dekalaz.

Zis pou donn ou detrwa legzanp sport i enn bann landrwa devlopman *gap* ki nou bezwen envestir ladan. Nou pe ganny nou *studio*. Nou pe ganny nou *hopefully* lannen prosenn ki anndan, *outside broadcast* i en parti enportan dan sa ki nou fer, e *sport* ladan i tre enportan.

Mon a donn ou en legzanp;-SBC in triyange - mon pou dir sa mo - pou li kapab annan detrwa zournalist pou akonpanny bann atlet CJSOI. Avek son bann kontrent ki nou annan la nou'n *commit*. Wi nou ki'n apros Minis Finans, Minis Sport nou dir vin zwenn nou. Nou anvi silvouple donn nou en pti plas lo sa avyon, ed nou pou rod lotel.

Akoz? Akoz nou *believe*, nou krwar sa konteni me pli

enportan;- enspir nou bann zenn, akonpanny nou bann zenn i tre enportan pou nou. Onorab pou reasir ou *sport* i tre o lo nou azanda pou *improve*.

Mon a donn ou zis en legzanp demann mwan si mon annan Bidze pou Zwe Des Iles lannen prosenn? Pa savedir ki SBC pa pou kouver. Nou pou bezwen ankor triyange, pou fer sir ki nou fer li dan sa kontrent difisil mon'n fek *outline earlier*.

So, nou'n envestir ankor e nou pa re-envestir pou nou kapab fer nou *outside broadcast* pli byen. Nou'n aste serten lekipman ki pou fer par egzanp nou bann *broadcast*. Par egzanp *School Championship high definition* lannen prosenn.

Nou pe bouze pou *re-convert* nou *b-van* pou fer li vin *HD* ankor. Nou pe aste ankor *camera*, ankor *switcher*, ankor kapabilite pou nou kapab *update* detrwa landrwa, zisteman akoz nou krwar poudir sa i tre enportan.

So si nou'n manke, wi i byen nou ganny portre me zeneralizasyon ki nou pa pe fer konmsi pa ase byen. Mon krwar nou bezwen konpran li dan konteks nou bann lezot difikilte teknik e *staffing*.

So mon'n donn ou legzanp kote nou *commit* lo bann *High Level*. Tim *Sport* in vini avek en

plan pou fer ki bann *sport event* dan Sanmdi, ki *Championship basketball, volleyball* eksetera nou fer li *live*.

Me nou pe realize poudir nou resours la konmela kot i ete pa pe permet nou. Me sa i pa vedir nou'n *shelve* li. Nou bezwen get ofir amezir. So mon oule reasir ou wi ou pwen i valid konsernan *sport*, e nou pe sey nou mye pou nou kapab *keep up*. Mersi Onorab.

### **MR SPEAKER**

Mersi. Bon mon ava apel bann Manm pou vot lo Bidze pou *Seychelles Broadcasting Corporation* ki pou en total 120 milyon R801mil. Manm ki an faver lev lanmen silvouple? *Thank you.* Manm ki kont? Mersi. Madanm *Deputy* ou'n pare? Lo Bidze pou *Seychelles Broadcasting Corporation* 17 Manm in vot pour, 0 kont e 9 Manm in *abstain*.

Bidze in aprouve par Lasanble. Bon mon ava remersye delegasyon *CEO* e avek lot zofisyе *SBC* pou zot partisipasyon. Mon swet bon kouraz e osi mon pran lokasyon pou remersye zot pou lasistans ki zot in donn Lasanble dan lepase, ki in vreman tenir nou dan letan ki nou ti en pe pli feb lo kestyion medya. Mersi e bonn

rantre. Nou pou pran en pti *pause sanitizing*.

**(BREAK)**

---

<b><u>SEYCHELLES</u></b>	<b><u>MEDIA</u></b>
<b><u>COMMISSION</u></b>	

---

### **MR SPEAKER**

Bon bonswar e byenveni. Mr Ibrahim Afif *Chief Executive Officer* pou *Seychelles Media Commission* e Ms Tessa Anderson *Media Secretary*.

Nou pe pran Bidze pou *Seychelles Media Commission*. Parey mon'n fer remarke avan sa ti en antite ki nou ti'n dakor pou vot lo la san sesyon dan Lasanble.

Me zis pou piblik i neseser eksplike pou sa bann laranzman pou pa pran en deba. I arriv avek en lagreman ant le de kote latab le de parti dan Lasanble.

Donk apre sa *Leader Lopozisyon* in demande pou li kapab poz en kestyion *Media Commission*, partikilyerman lo size son rapor avek *SBC*, son manda an term *SBC*. E anvi sa deba ki in annan monn aranze pou remet *Media Commission* lo latab.

Me selman Mon pe espere ki bann Manm i ava tenir sa langazman ki pou aksepte zot Bidze, e nou a permet *Leader*

Lopozisyon poz son kestyon.  
Onorab Pillay. Yes?

### **HON WALLACE COSGROW**

Yes, mersi Mr Speaker.

### **MR SPEAKER**

Eskiz mwan mon pa ankor demann lentrodiksyon Bidze. Mon pou bezwen demande. Yes?

### **HON WALLACE COSGROW**

Non mon ti pe zis demande, eski zis *Leader* Lopozisyon ki pou ganny drwa demande? Ouswa si mon annan kestyon mon kapab demande?

### **MR SPEAKER**

Well si sa lagreman par egzanp mon'n dir sa lagreman ou pa met en Komisyen, en *body* lo latab i vin par lagreman le de kote parti.

Si sa lagreman napa e en kote i ensiste ki zot bezwen demann kestyon donk lasal i bezwen ouver e nou pou bezwen pran kestyon le kote.

Si i annan en kote si lot kote osi i le demann kestyon mon pa pou kapab refize. Mersi. Mon ti pe mank en pti par ladan e sa se pou demann *CEO* pou fer en pti lentrodiksyon lo son Bidze silvouple.

### **CEO IBRAHIM AFIF**

Mr Chairman, Manm Onorab, *Mesdames et messieurs* e tou dimoun ki pe swiv, bonswar. Rezondet Komisyen Medya i pou permet bann diferan medya travay dan en lanvironnman kot laliberte pou fer zot travay, i ganny respekte, preserve.

E an menm tan tenir standar o nivo kot respe, dinyite imen ki napa okenn diskriminasyon e mentenir entegrite e bon valer. Sa se bann gran, gran prensip e rezon det Komisyen Medya.

Nou annan byensir serten defi. Nou bezwen en Lalwa pli mordan pou nou kapab fer nou travay dan en fason pli efektiv. Mon konpran akoz diferan Gouvernman, diferan lepok in ezite pou donn nou plis pouvwar.

Nou rank lo index mondyal petet par egzanp mon krwar i trezyenm konmela. I kapab desann akoz nenport ki aksyon i ganny persevwar konman en lenterferans dan medya, oubyen en lesey pou koup lekspresyon lo medya.

Me sa i pa nou lentansyon. Me nou krwar poudir egalman i pa byen ki nenport ki dimoun i get away with things ki zot pa ti merit fer. E nou annan serten diskisyon nou'n fer e byento Komisyen Medya pou met serten propozisyon devan.

Nou konnen ki an menm tan bann Lalwa ki nou anvi i sanze, bann modifikasyon ki nou anvi anmenn avek *Code Kondwit medya*. Sa i pou pran petet en pe letan akoz lazanda kalandriye Biro *Attorney General* i sarze avek lezot priyrite nasyonal. Sa nou kapab espere.

Me nou krwar byen ki lannen prosenn nou pou vin devan zot avek serten amannman dan Lalwa ki gouvern *Media Commission*, pou ganny en pe plis pouvwar. E pou donn nou en sans pou vin pli efektiv. E mon espere ki tou dimoun i pou donn nou en sipor. Mersi.

### **MR SPEAKER**

Mersi CEO. Onorab Pillay nou ava pran ou kestyon premye akoz ou'n deza demann laparol. Demann ou kestyon Onorab Pillay ou ki'n demann laparol pou sa.

### **HON WALLACE COSGROW**

Mr Speaker mon ti'n demande boner si nou tou nou kapab demann kestyon. So eski mon pou annan en loportinite akoz mon ti oule demann mon kestyon?

### **MR SPEAKER**

Ou a demann ou kestyon. Onorab Pillay ki ti demann laparol pou fer sa sesyon. So mon pe envit li pou poz son kestyon ki in dir i anvi demande. Onorab Pillay.

### **HON SEBASTIEN PILLAY**

Mersi Mr Chairman e bonn apre midi tou dimoun. Bonn apre midi Manmzel Anderson e Mr Afif. Mon oule fer kler ki ozordi nou pozisyon lo size *Media Commission* i en Bidze ki nou'n toulstan siporte lo sa kote latab. I baze en pti pe lo bann levensnman resan e lafason ki nou vvar sa relasyon ki pe arive, pe ganny anmennen.

Mr Chairman mon ti a kontan klarifye en keksoz an relasyon ek *Media Commission*. Ler mon regard zot Bidze - i en pti Bidze me zot fer en travay plito regilatwar.

Prezan mon ti a kontan ki Mr Afif i klarifye en keksoz pou nou, dan lepase *Media Commission* in toulstan pronons son lekor an relasyon avek serten pronansman ki Gouvernman in fer lo medya.

Well pa Gouvernman me mon parti sirtou in fer, an relasyon lo serten medya. E in menm annan serten komanter ki *Media Commission* in fer an relasyon avek keksoz ki mon parti in dir dan serten

programm. Me sa ki mon war li drol apre ki Gouvernman in apel *SBC State House*, e pou dir *SBC* ki pou dir dan en programm "Lopinyon" nou pa'n tann *Media Commission* dir nanryen lo sa size.

So nou ti a kontan klarifye ki prosedir ki en endivid i bezwen swiv ler i santi poudir en keksoz ki'n ganny dir lo medya pa korek, eski Gouvernman i annan drwa somonn *SBC* oubyen Gouvernman i devret pas atraver *Media Commission* e fer son konplent parey tou endivid?

2enm kestyon Mr Chairman, enn bann rol Komisyun Medya se pou siport bann zournalist, akoz eski Komisyoner ki la prezan, ziska la pa ankor pronons son lekor, menm lo lefe ki lamazorite oubyen plizyer zournalist in eksprim zot lekor lo size lenterferans ou lendepandans pou zot fer zot louvraz?

E sa i relye avek en pwen ki mon oule met devan *CEO* Komisyun Medya. In menm annan zournalist ki'n piblikman dir ki zot in ganny zoure, par Manm zofisytre o plase dan Gouvernman ozordi, dan landrwa piblik apre ki zot ti pe ti pe tyonbo en plakar.

E sa i annan bann *post lo rezyon sosyal* ki montre lo *Facebook*. E dayer Mr Chairman ou ti *remind* nou Lasanble Lopozisyon ki *ARID* i pran. Ou ti kosyonn bann Manm Lasanble lafason ki nou koz.

So mon ti a kontan demann Komisyun Medya alors, dan sa konteks, akoz ki Komisyun Medya atraver Komisyoner ki la Mr Afif, zot pa ankor donn en lopinyon lo sa size.

Akoz nou, nou ti ava espekte dan nou konteks se zot ki zoran e garanti drwa lekspresyon pou bann zournalist. Mersi Mr Chairman.

### **MR SPEAKER**

Mersi. Komisyoner ou respons silvouple.

### **CEO IBRAHIM AFIF**

Mersi bokou Onorab pou ou kestyon. Mon en pti pe etonnen dabor poudir ki i annan lokasyon kot nou'n eksprim nou piblikman anver okenn deklarasyon - okenn parti politik in fer. Akoz mwan mon pa rapel. Petet i ava fer mwan mazinen lekel bann diferan lokasyon ki sa in arive.

Dezyenmman pou en pti koreksyon mon pa en Komisyoner konmela, *ok?* Mon

en Manm, mon *CEO Media Commission* e mon pa en Manm lo *Board SMC*. Alor mon pa en Komisyoner.

Mon swiv lord ki *Board* i donn mwan pou fer keksoz. An se ki konsern sa lensidan kot ou dir Gouvernman - si oule - pa'n pas atraver Komisyon Medya, les mwan met bann fe o kler.

Premye, mwan mon ti swiv sa programm. Mon bann pwennvi personnelman i pa antre ladan. Mon'n get sa programm, mon ti ekspekte pou annan en reaksyon. Programm mon krwar ti pas en Mardi swar. En Merkredi bomaten mon ti ganny en *call* sorti kot *Designated Minister* -Mr Jean-Francois Ferrari, ki'n demann mwan ki pozisyon Komisyon Medya lo la?

Mon'n eksplik li;- nou zeneralman ziska aprezan, ki nou'n fer ki si i annan en konplent sorti kot en kote oubyen lot kote, En dimoun endividiyel nou demann pou met sa konplent an ekrir pou nou. Sa se nou premye ...

Apre osi nou pa sote nou menm e nou konsey sa dimoun ki pe fer konplent, al kot sa dimoun ki'n fer keksoz ki dapre ou in kas Lalwa. Alor, mwan ki ti dir zot poudir silvouple tou dabor al kot *SBC* eksprim ou

dezapwentman, ou mekontantman *whatever it is*, les *SBC* ...

Si zot pa rezourd i pa mon problemm. Retourn kot nou akoz la nou ava konmans *investigate*. E pou zot lenformasyon bann - Chairman Komisyon Medya i pe pran serten lepa e pou annan en *meeting* sa Zedi. En *meeting* Komisyon Medya, pou nou konmans *deliberate on this occasion*.

Nou pa taye deswit ozordi, demen donn en larepons. Nou pa fer sa. Mon pa dir nou pa en Lakour, me selman nou pran letan pou nou *absorb* tou keksoz, demann rapor. Dan sa lenstans nou'n demann rapor. E nou annan osi lentansyon pou nou al vvar *SBC*.

Nou annan lentansyon pou al vvar Telesesel akoz dan sa zafer i annan tou le de kote ki enplike. Apre nou ava fer nou deliberasyon e nou a fer dan sa ka piblik, ki nou'n vvar ki mannyer nou santi sa keksoz in deroule.

Alor, i pa en kestyion ki nou pou anvi. Mwan mon pa oule pronons mwan, lo sa kestyion an partikilye. E mon'n eksplik avek Chairman Komisyon medya, ki pou sa lokazyon la ler zot pe fer zot

bann deliberasyon, mon pou reste an deor.

Etandonnen ki sirkonstans, sa levennman e ki mannyer sa i kapab anmenn mwan ladan, konmkwa en parti pou annan. Alor mon'n demande, e mon pa pou ladan dan sa diskisyon. Dan diskisyon mon pou la pou ekout, donn en konsey, oubyen donn en lopinyon.

Me selman pou al zwenn SBC par egzanp mon pa pou ladan. Mon pa konnen si mon'n reponn kestyon ki - ?

### **MR SPEAKER**

Mersi. Mon pou fer rapel bann manm pou dir, nou la pou kestyonn manda, *Media Commission* an relasyon avek son Bidze, nou pa la pou kestyonn Gouvernman. Ki Minis in fer oubyen kwa, si in byen pase oubyen non.

Manda *Media Commission* an relasyon avek son Bidze. Onorab Pillay oule klarifye keksoz?

### **HON SEBASTIEN PILLAY**

Mersi Mr Chairman. *Rest assured* ki nou pou reste lo manda *Media Commission*, e napa naryen pou la lo sa ki Minis in fer. Si Minis in *call CEO Media Commission*, sa i pou *CEO Media Commission* apre

pou nou regarde ki mannyer nou dil ek sa.

Premye keksoz ki mon oule met lo rikord Mr Chairman se ki, nou, nou annan en let ki'n ganny ekrir par ou menm. Adrese a *CEO SBC* an relasyon ek bann *live press conference* ki nou'n fer, e nou kapab prodwir sa let, ok? Premye keksoz.

2enm keksoz ki mon oule met lo rikord ankor se ki, apre ki ou'n ganny en *call* e sanmenm sa mon oule konn prosedir ki mannyer i marse;-eski se zot ki ti *advice SBC* pou zwenn avek Minis Dezinyen, e Vis Prezidan?

Mon met sa de dimoun an deor, akoz zot an parti prenan la, nou pe koz *Media Commission SBC*, ek sa *channel*. Parey ou'n dir Mr Speaker, nou pa pe koz lo Minis Dezinyen.

E la kot mon oule klarifye en keksoz Mr Chairman. Eski ti annan en *meeting Board*, kot serten desizyon ti ganny kominke avek *SBC*? Manda *Media Commission* se li ki *act koman* sa *go between* ant tou bann konplent ki vini. Eski ti annan en *meeting* ki ti *advice SBC* pou fer sa?

E prezan ki vin lo pwen manda ki Mr Speaker in koz lo la. Akoz ki apre ki tou dimoun in reakte, menm zournalistis in

proteste. E sa programm in pas tou sa letan, in annan tou sa devlopman, preznan ki *board* pe al zwenn. Prezan ki en diskisyon pe al ganny antreprann lo la.

Konmsi pou mwan mon pe war vi ki sa manda zot sipoze pe reakte, lo bann keksoz ki annan pou fer avek medya, mon ti avar le ekspekte pou dir i annan en reaksyon, en pe pli imedyat pou dil avek sa sityasyon.

So petet klarifye pou mwan ki mannyer sa *timeline* in ganny etablir? E mon oule met lo rikord Mr Chairman ki wi nou annan let, ki'n ganny ekrir *regarding nou press conference*. Mersi.

### **MR SPEAKER**

Mersi, sa i en lot zafer. Onorab mersi pou ou kestyon. *Commissioner*.

### **CEO IBRAHIM AFIF**

Mr Speaker si ou ti avar permet mwan, mon ti avar kontan reponn lo zafer let. I vre ou annan let sorti kot mwan personnelman ler mon ti ankor *Media Commissioner*.

E mon ti ekrir zot, e mon ti ekrir zot lo en serten size, *ok?* E i ti parfetman dan nou konteks si nou vwar en keksoz ki nou krwar i mal, nou ekrir, nou konseye.

Set a SBC pou deside ki mannyer pou fer. Nou, nou deside pou dir nou krwar pou sa pratik, i pa byen, *ok*. E nou'n fer li si ou ti anvi mwan al an detay, mon ti ava al fer li, me selman mon krwar Mr Speaker in met en *line*, kot nou pa kapab depase.

Wi, ti annan e i pa sel lokazyon - i pa sel lokazyon kot nou'n ekrir. Akoz mwan personnelman la fason ki nou travay dan en fason trankil. Nou ti a kontan travay si posib san imilye dimoun, ou esey gro lebra. Tou fason mon napa gro lebra.

In en fason kot mon ti kapab fer lev en kantite politik, mon pa'n fer li. I annan keksoz tre enportan ki nou'n rezourd, san fer en tanpet politik, kot mon ti'n riske ganny akize ki mon ti'n annan en bi politik.

Petet i annan dimoun dan tou lede kot i konn tre byen, lo kwa ki nou pe koze lo la. Me piblik deor pa konn ditou. Petet komisyon medya ti merit pli ouver avek sa bann lensidan. E fer li piblik. Kot dimoun i a konnen pou dir nou'n entervenir, nou'n dir serten keksoz.

Me nou pa'n fer li, akoz nou'n vwar pou dir sa i pou vin en kankan politik, e zanmen pou fini. Me selman nou'n

rezourd nou problem, nou'n met nou bann pwennvi avek SBC. E mon krwar serten keksoz in ganny rezourd san ki personn i fer tanpet avek.

Alor wi, sa ti en lokazyon ki nou'n ekrir, i pa sel lokazyon. I annan de lezot lokazyon. La ozordi par egzant oubyen *weekend*. Nou'n avoy en let kot *Leader* ou parti, akoz zot ti ekrir nou e nou'n reponn li. E nou'n dir li ki bann keksoz nou pou fer, pou esey arriv en konklizyon. E ki nou pou fer li konnen. Nou'n ekrir li. Mon'n oubliy ou dezyenm kestyon.

### **MR SPEAKER**

Bon.

### **HON SEBASTIEN PILLAY**

(Off-Mic)

### **CEO IBRAHIM AFIF**

Bon 2enm keksoz akoz nou pa'n azir vit. An zeneral nou'n azir en pe avek prekosyon dan tou ka. I annan bann ka kot nou demann dan nou Lalwa par egzant, i donn nou serten letan pou nou kapab reazir, oubyen reponn kestyon eksetera. E i donn letan.

Me an ka sa ka partikilye par egzant ou *Chairman Commission Medya* ti lo en misyon ofisyel deor, e i ti retournen *weekend*. E nou'n

konvok en *meeting* spesyal sa semenn, pou diskit sa size. I pa pou dernyen *meeting*, i pou annan lezot avan ki nou arriv lo en konklizyon. Alor pasyante, nou pou donn nou lopinyon lo la.

### **MR SPEAKER**

Mersi.

### **HON SEBASTIEN PILLAY**

(Off-Mic)

### **CEO IBRAHIM AFIF**

E lot laspe, wi, nou ki ti dir Gouvernman al kot SBC avan. Nou ki'n konsider zot.

### **HON SEBASTIEN PILLAY**

(Off-Mic)

### **MR SPEAKER**

Onorab, eskiz mwan. Mon bezwen dir, en kestyon direk silvouple, yes Sansan nou pou la ziska demen bomaten. Si ou annan en kestyon direk, poz li, pou *Commissioner* lo son manda.

### **HON SEBASTIEN PILLAY**

Mersi Mr Chairman. Mon kestyon i pou tre direk. Ou dir nou pou dir ou'n *advice* SBC pou al kot Gouvernman. Dan sa konteks *vice versa, ok?* E i paret pou dir ou pe donn *advice*

swa SBC swa Gouvernman. Be kwa ki ti mal avek nou bann *live press conference*, ki ou'n bezwen ekrir SBC e ekrir nou. Akoz mon pa'n vin koz lalang dan Lasanble la mwan, mon pa'n vin koz mansonz.

Ou konnen i annan sa let, e sa let i lo rikord. Me pwen pertinan se ki nou'n osi ekrir en lot let kot ou, *regarding* sa sityasyon ki fek arive, pou nou fer en *formal complaint* parey Lalwa in dir nou fer.

E se sa let ki ou pe refer avek, ki mon ti anvi Mr Speaker i konnen. Me kwa ki ti mal avek nou *press conference* egzakteman?

### **MR SPEAKER**

Eskiz mwan, mon krwar sa bann kestyion sa kestyion in ganny poze avek SBC. E mon santi pou dir sa desizyon, ti en desizyon SBC e pa *Media Commission*. Alor mon pa pe - mon bezwen arete sa *line of questioning*.

### **HON SANDY ARISSOL**

Mon kapab demann en klarifikasyon silvouple?

### **MR SPEAKER**

Lo sa pwen ki pe pase? Wi.

### **HON SANDY ARISSOL**

Mr Chair mon krwar lo nou kote osi, mon pe demann menm kestyion. Parske la nou osi nou kapab fer ne protestasyon parske la in vin en *inquest* prezan.

Ou a krwar i annan en lenvestigasyon, ou a krwar nou Ankour atraver US pe demann bann kestyion ki napa naryen pou fer ek manda ek Bidze. Nou pa kapab kontinyen sa dan Lasanble Nasyonal.

### **MR SPEAKER**

Mon repeete - mon repeete sa dernyen kestyion i en size SBC. E SBC in adrese so nou ava - Onorab Cosgrow ou ti'n lev lanmen. Mon ensiste ki ou annan en kestyion lo manda SBC, an relasyon ek son Bidze.

### **HON WALLACE COSGROW**

Mr Speaker mersi pou donn mwan laparol. I annan manm pe komans fini ziz mwan avan mon demann mon kestyion. Les mwan demann mon kestyion silvouple, apre ou avar zize.

Mr Speaker parey CEO in dir nou osi ekrir en let *Media Commission*, pou proteste. Le 14 Novanm nou ti ekrir en let *Media Commission* pou proteste ki ou'n dakor. Pou nou proteste dan la fason ki sa bann zafer in ganny *handle*, par Egzekitiv anver SBC.

E pou nou demann *Media Commission* pou *investigate* e gete. Koman en parti politik nou'n met nou pwennvi devan, e mon kestyon i an sa ki konsern zot manda *to preserve the freedom of the media*.

*Now Egzekitif ou dir ki pou dir ou'n dir avek Egzekitif kontakte SBC.* Now si demen bomaten i arriv en sityasyon parey in arive, e ou annan pouvwar lo SBC, pou kapab donn li or lo medya an zeneral, pou kapab donn li serten lenstriksyon ki pou fer, ouswa ki pa pou fer.

Dir nou atraver ou lalwa ki pouvwar ou annan lo egzekit, si i pa ekout sa ki komisyon medya i dir. Ki pouvwar ou annan lo li?

E si ou napa, eski ou annan nide revwar Lalwa pou ki zot kapab – akoz egzekitif pou toultan fer e ou pa pou kapab li naryen. E mon pe get zot Bidze, zot Bidze tou le lannen i reste preski parey. Konmsi eski zot pe get dan en lot loptik, pou fer sir ki zot asir *at least* sa premye bout dan zot manda lo *freedom of the media*?

Konmsi demann plis larzan, re fer ou Lalwa dan mannyer ki ou a kapab morde. Ou konpran mwan? Akoz ler ou pa pe morde, egzekitiv pe fer sa ki i anvi. E ou pa pe kapab dir li

naryen. Mersi bokou Mr Speaker.

### **MR SPEAKER**

Mersi *Commissioner*, ou annan en repons?

### **CEO IBRAHIM AFIF**

Mersi bokou Onorab. Enn bann defi ki nou toultan fer resorti devan Lasanble, kan nou ganny sans vin isi, se ki nou santi sa Lalwa konmisyon medya i tro mou.

I pa ase morde si oule, i annan bann desizyon ki nou'n pran kont diferan antite, diferan dimoun, *ok?* E napa fason pou ranforsi sa desizyon, pou met sa desizyon an aplikasyon. E sa enn bann defi ki nou annan, e se sa ki mwan mon'n eksplike taler, ki nou pe reviz Lalwa.

Nou pe fer propozisyon pou reviz lalwa. Pou ki i donn nou en serten keksoz ki nou kapab pran. Pou retourn en pti lo sa kestyon nou'n konsey Gouvernman, pou al vwar SBC, *as far as I know*, otan ki mon konnen sa delegasyon ti al rod lesplikasyon, *ok?*

Akoz mwan mon'n dir ler i annan en problem, demann sa enn ki'n ofans ou. E li i kapab defann son lekor, *whatever*. Si par egzanp Gouvernman ti dir nou pa pou donn Bidze, nou

pou koup ou Bidze oubyen *threaten* okenn keksoz, la i ti pou vin en ka kot nou santi nou pou bezwen entervenir.

Me mwan otan ki mon konnen, sa pa'n arive. Otan ki mon konnen, sa pa'n arive. Parey mon'n demann zot, al rod en deklarasyon, klarifikasyon. Apre si – lefe ki nou pou fer en pe konsern akoz zot in demann *State House. And State House* in demann *SBC* pou mont *State House*.

Mon krwar dan lezot lenstans osi, dan lezot pei deor *BBC*; *BBC* i kapab konvok sa Minis pou lenformasyon ki dan Gouvernman Britanik. Sa i arrive, me sa pa vedir pou dir –.

I mean si mon annan en problemm mon pou mont *State House* pou mwan dir, mon pou asize premye keksoz mon pibliye, mon kriye. Non. Ou bezwen al kot sa dimoun avan e demann en lesplikasyon.

### **MR SPEAKER**

Mersi. Onorab ou annan en kestyon klarifikasyon? Yes?

### **HON WALLACE COSGROW**

Mr Chair Seksyon 13 Lalwa Komisyun, Seksyon 13(2)(a), premye i dir *provide "an independent arbitration medium."* So se ou ki sipoze be the arbitration, ou pa sipoze

anvoy en dimoun laba lo kote pou li al negosye. You should arbitrate in the middle, e anmenn sa de parti ansanm.

La ki'n arive ou'n lav ou lanmen, e ou'n dir en lot i al dil avek sa lot li menm, e ki'n kree en pake problemm. Ki ozordi ou war dimoun pe koz lo freedom of the media, dimoun pe koz lo zot drwa koze lekspresyon. So se sa, i la dan Lalwa.

Kantmenm ou dir Lalwa pa morde, but it's there, nou bezwen fer sir nou fer nou rol koman arbitrer dan sa bann zafer. Mersi Mr Speaker.

### **MR SPEAKER**

Thank you. Commissioner ou annan en repons lo ou rol?

### **CEO IBRAHIM AFIF**

Wi, nou rol medyasyon avan nou antre sa enn ki konplent. Par egzanp si ou ekrir mwan en let. Par egzanp mon'n ganny en let konplent kont en lot lorganizasyon. Nou anvoy sa let dabor kot sa lorganizasyon, oubyen nou dir ou al rod en lesplikasyon.

Ou al esey rezourd ou problemm. Si ou pa kapab rezourd ou problemm, la ou vin kot nou. E la nou pou konvok le de parti si fodre. Me ziska aprezan nou nobou rezourd bann problemm, san ki sa de

parti, i vin an konfrontasyon devan nou.

### **MR SPEAKER**

*Ok, thank you Commissioner, Onorab Loze?*

### **HON JOHAN LOZE**

Mersi Mr Speaker. Mon ti kontan komanse par fer kler ki arbitrasyon se pa konfrontasyon. *If anything it's the opposite of* – be selman Mr Speaker mon pa pe re antre dan sa bann zafer.

Mon ti a kontan sey ganny en komitman ferm avek *Commissioner*. E mon dir sa an tout respe son *years of contribution* ki in fer dan sa pei. Mon ti a kontan ganny en komitman ferm avek li, ki sa Bidze ki la in fini tar. E mon'n note ki ou'n dir *successive governments* in refize pou donn zot plis pouvwar.

*In light of all that*, eski pou ou Bidze 2024 silvouple, si ou pou kapab sers plis larzan. E menm *involve* nou si i neseser dan ou bann negosyasyon avek Minister Finans, les nou konnen boner. Par nou, mon pe dir Lasamble Nasyonal *Commissioner*, e pa *United Seychelles*.

Plis larzan pou kapab zwe sa rol pou *strengthen* latmosfer medya dan Sesel, pou protez

lendepandans medya. Plis larzan ki ou a kapab annan en konsiltan petet, pou revwar bann *policy* SBC li menm. Pou vwar si ase for, ki i pa ganny trennen dan sa bann keksoz koumsa.

E mon pe dir sa en tout senserite, napa naryen pou fer avek *LDS*. Mon konnen bann manm pe pran sa pou zot. Be *2025 and beyond*, *LDS* pe ale li 2025. *Whoever* ki vini, konmsi pou nou pei eski *once and for all apre ki for years* zot in refize, pou donn ou ledan pou morde, si ou kapab – Mr Speaker ou tande ki mannyer i apele.

### **MR SPEAKER**

Silvouple, ale termin ou kestyon Onorab. Termin ou kestyon

### **HON JOHAN LOZE**

Mr Speaker si apre ki *for years* zot in refize pou *strengthen* ou lorganizasyon, si aprezan Lalwa pou tarde vini, ouswa pa pou vini. Ou kapab fer sa menm travay atraver *policy*, atraver bann desizyon administratif.

*Strengthen* ou lorganizasyon, pou ou nobou e tre *proactive* e fer en keksoz, olye ki ou donn nou – ou donn nou en lenpresyon ki zis ou asize ou espere. E ou reakte. So nou ti a kontan ou fer plis.

Rod mwayen pou ou fer plis. Se sa ki nou anvi, be sa Mr Speaker, mwan personnelman *I am not convinced that such a thing is possible.* E napa naryen ki'n ganny dir la ki - .

### **MR SPEAKER**

*Thank you Onorab. Commissioner oule adres sa pwen. Si ou kapab fer plis, pou ganny plis Bidze, pou ou deservi ou manda.*

### **CEO IBRAHIM AFIF**

Mr Speaker, Onorab mon kapab dir ou pou dir dan le pase, nou'n deza soumet serten rekomandasyon pou ranforsi sa Lalwa ki nou annan, pou fer li mord plis. Me sa pa'n arrive.

Mon pa pe dir i pa'n arrive akoz zot pa'n anvi, oubyen akoz sa *Legislative Calendar*. E dernyerman nou pa ankor fer li, nou pe fer li la konmela. E byento i pou vin dan Lasanble.

I pa en kestyon Bidze ki mank nou, i en kestyon sa ki Lalwa i donn nou drwa fer. Lalwa fodre ganny amande, e nou pe travay lo la. Mersi.

### **MR SPEAKER**

*Thank you Commissioner. Prezan nou avarvot lo Bidze pou Seychelles Media Commission, ki pou en total R2milyon 700mil. Manm ki an faver lev*

lanmen silvouple? Mersi, okenn Manm ki kont? Mersi.

Lo vot pou Bidze *Seychelles Media Commission* 19 Manm in vot pour, 7 Manm in vot kont, 0 in *abstain*. Sa Bidze in aprouve par Lasanble.

Nou pou pran osi vot lo *Information Commission* ki lo paz 69 ziska 71. Pou en total R2milyon 987mil, Manm ki an faver le lanmen silvouple? Mersi, Manm ki kont?

Lo Bidze *Information Commission* 23 manm in vot pour, 0 kont e 4 in *abstain*. Sa Bidze in aprouve par Lasanble.

Mon oule remersye bann Manm delegasyon *Media Commission*. Bann manm zofisyen finans pou zot partisipasyon avek nou ozordi.

Mon swet zot tou e bann Manm osi bon rantre e bon swar. Nou ava pas dan Staz Lasanble pou nou *adjourn* silvouple. Mersi, Lasanble pou adjourn ziska demen bomaten 9er.

**(ADJOURNMENT)**

Verbatim Report

NAS Sitting

Tuesday 22<sup>nd</sup> November, 2022

Verbatim Report

NAS Sitting

Tuesday 22<sup>nd</sup> November, 2022